


NOVA
RELATIO HI-
STORICA DE RE-
BUS IN INDIA ORIENTA-
li à Patribus Societatis IESV,
ANNO 1598. & 99. gestis.

P. NICOLAO PIMENTA
atore Societatis IESV, ad R.P. Claudium A-
lwinam eiusdem Societatis Præpositum
Generalem missa.

Cum licentia Superiorum.



MOGVNTIAE

Officina Typographica Ioannis Albini.

ANNO M. DCI. 1601



ADMODVM REVE-
 NDO AC PRÆNOBILI,
 MINO, D. PHILIPPO CRAZ A SCHAR-
 nstein. Metropolitana Moguntina
 non Cathedralis Wormatiensis, item-
 que Collegiata ad diuum Bartholo-
 meum Francofurtensis Ecclesiarum
 Præposito &c. Domino suo ob-
 seruandissimo.

Ioannes Albinus Typographus.

AUDIO, admodū R & Nobilis
 Domine, iis, quæ vel Iaponica
 vel Mogorica, superioribus
 nis, è Typographo meo vulgari, legens
 valde R. & Nob. D. T. oblectari: eaq;
 quænter in Geographicis etiam Tabulis
 eueri. Scilicet, non eo tantum nomine,
 sed nova sint, sed quòd insignem etiam
 Christianæ Catholicæq; religionis amplifi-
 cationem, quam p̄ omnes auidissimè auere,
 direq; solent; contineāt. Cum ergo ex In-
 ipsa Orientali Romā, ante menses paucos


DEDICATIO

*los, è SOCIETATE IESV Pater qu.
nerit, eas, quas ille attulit litteras, Ro.
iam Typis excusas, meis recudere &
easdemq; admo. R. & Nob. T.D. off
vna cum recentissimis & laponicis &
sibus: vt Auctoritate Tua, quæ summæ
eum apud quamplurimos finem, ob
scribi, ediq; id genus noua solent, conseq
tur; vt scilicet in omnibus Deus Opt.
laudetur; ab omnibus, vt operarios in
sem suam mittat, rogetur: demumq; Arc
gelo S. Raphaeli mos geratur, dicenti
pera DEI reuelare & confiteri
norificum est: itemque D. Chrysost
hortanti. Si quid, fratres, audierit
boni, apud omnes proferamus.*



NOSTER ADMODVM R. P.
IN CHRISTO

PAX CHRISTI.



COMPLECTAR his literis meam peregrinationem annuam in lustranda parte Prouinciæ Australi aliasq; Nostrorum missiones, ac felicem ingressum in varia huius Orientis regna, omino cooperante, & magna fidei ostiate præclusa, ipsis aperiente.

Goano è portu solui Prid. Calend. Decemb. anno Domini 1597. cum Sociis odcuiginti, sed pro messis vbertate, & erariorum paucitate penè solus. Cocinappulimus 19. Cal. Ianuarii. In illo regio, & in inchoato Collegio Terræ æ, seu Vaipicotæ, atq; in singulis vtri. Residentiis sesquimenssem consum- De fructu, quem in illa vinea Nostri runt tam ex traductione Gentiliu ad a, quam ex reductione Christiano-
A, rum

Historica Relatio

rum antiquorum S. Thomæ, ad Eccle-
catholicæ vnionem, per eosdem dies
P. certiore feci, sed incertum adhuc
effecerim: namq; ex litterarum exem-
remanfit vnum ob euentum sane ni-
rabilem. Nauis enim, quæ Franci
Gammam Proregem aduexerat, & e-
antecefforem Matthiam Alboquei
reuehebat, in portu Cocinenfi pri-
diei, quo erat in altum deducenda,
dem momento, quo pretiofarum mer-
um iustum onus acceperat, repenti-
gne correpta conflagrauit. Incendia
lud cum nulla industria posset resti-
ad triduum miserandum omnibus
etaculum præbuit: at enim non breui
temporis spatio exarsit aliquorum c-
ditas, qui nauem flagrantem catenis
reis igni scintillantibus alligatam, re-
co, longisque contendentes funibus a-
ducere conabatur, vt aliquid spoliū fla-
mis ereptum acquirere possent. Quoru
temeritatem nauis impune non tulit: e-
plosis enim identidem æneis tormen-
& pulueri iaculatorio furibunda igne
immittens, partem virorum neci ded-
partem nauigiorum flammis inuoluit.

An

De India Orientali.

Antequam Cocino discederem duas
missiones institui, alteram ad regnum
engalæ, alteram ad regnum Pegu. In
engalicam missionem electi sunt Patres
anciscus Fernandus, & Dominicus So-
quibus iam duos alios Sacerdotes sup-
etias misimus, Melchiorum Fonssecam,
ndream Boues. Hi paulo ante solue-
ex ora Choromandelensi. Primis
u n feliciter res successerint, ex ipso-
u a litteris V. P. intelliget, quamquam
per ipsos à Deo gestas, eos humiliter,
demisse commemorasse existimo, nam
illinc ad nos veniunt, eximia quædam
trant, quæ in laudando extollunt, ut
ene miracula videantur.

XEMPLVM LITTERARVM P.

*Francisci Fernandi Syripure oppido Ben-
gala 16. Cal. Febr. 1599.*



VÆ diuina freti misericor-
dia in hac missione Bengalica
egerimus quæ V. R. auere sci-
re non dubito, his litteris ex-
ponam. In portu Cocinensi ad V. nonas
Maias nauem conscendimus Bengalen-
sem, quæ Portum paruum (sic enim vo-

cant) in ora Bengalica petebat. In altile
deductis, in ipso conspectu perstantes
in Cocinensi statione nauium, birem,
occurrit Malauarorum piratarum, quæ
directo in nos cursu mox congressura vi-
debatur. magnam ea res nobis attulit mo-
lestiam & trepidationem, nimirum nau-
sea laborantibus, & cœpto cursu pergere
potius, quam cum hoste congredi cupi-
entibus. Nostri nihilominus arma expe-
diunt, & pugnae se accingunt. hostes, si-
mulatque nos bellum non detrectare co-
gnouere, demissis velis, lento cursu ferri,
& paulatim se relinquere sinunt. Ceilani in-
sula à tergo relicta, è regione Nega pata-
ni intempesta nocte vchemens, & repen-
tinus ventus irruens, aduerso flatu velum
percussit, nauemque ita obuertit, vt pa-
rum abfuerit, quin fluctibus absorbere-
tur. Media hora in magna fluctuatione
consumpta, naui in alterum latus impul-
sa, atque inimicum salum bibente, vix
tandem potuimus vela contrahere. Hoc
animaduerso periculo, raptim omnes ad
confessionis, & orationis perfugium, tã-
quam ad fidissimam anchoram confuge-
runt. Ventis interea ita bacchantibus,
aquisq

De India Orientali

isque concitatis, ut iam mare nare, sed per conuexa montium, & val-
m curuos anfractus iter facere videre-
tur. Toto triduo in his angustiis exacto,
ndem Deo fauente sedata tempestate,
dies aliquot prospere nauigauimus. In
mo periculo præter vota priuata publi-
cum illud fuit, quod velum anterius, à
quo salutem suam pendere omnes ani-
maduerterant, B. Virgini vouerunt, atq;
in templo Gullano, quod propè Benga-
lam magna religione colitur, eiusdem ve-
li pretium obtulerunt.

Post hæc in aliud discrimen, mea qui-
dem sententia maius, in ipso portu inci-
dimus. Sunt enim in ostio Gangis fyrtes
quædam arenosæ, quæ Brachia à nautis
dicuntur; præter has cum magna vigilan-
tia nauigaremus, ab alueo paululū per er-
rorem deuiantes, in breuia & loca vado-
sa incidimus. Sed ex omnibus liberauit
nos Dominus. Portum tandem ingressi,
decimo octauo die postquam Cocino di-
scessimus, à faucibus fluminis vsq; ad Gul-
lum alios insuper octo dies cōsumpsimus.
Est autem Gullum statio Lusitanorum,
quæ ab ostio Gangis ad ducenta & de-

cem milliaria , aduerso flumine c

In hac statione ab omnibus Lusit
& Christianis incolis maxima gratul
ne , & amore excepti sumus. Domos d
as instructas, in quibus honeste diuersare
mur , ipsi dederunt , & affatim omn
necessaria ipsi nobis suppeditarunt. Pu
rorum effusa turba in ipso portu nob
obuiam processit, qui enixè rogarunt ,
ipsum doceremus , carebant enim præ
ptore, & huc illuc ociose, & perditè v
bantur: nobis renuentibus, illi magis,
gisque instare, & à nostro latere nunqu
discedere. Horum precibus victi , vnu
ex comitibus ; qui mediocriter scribere
sciebat, scholæ præfecimus, existimantes
non esse id alienum à V.R. voluntate, cum
nostrum neuter hanc prouinciam in se
susceperit, quo minus cœpto itinere pro
gredi possemus.

P. Dominicus Sosa è vestigio linguæ c
discendæ operam dedit, idq; tam serio , ac
tanta animi contentione , vt breui mul
tum profecturus videretur, si boni inter
pretis , & magistri copia fuisset . at vero
qui lingua Bengalica vtuntur , Lusitani
cam fere ignorant, & contra , qui Lusita-

loquuntur, Bengalicè plerunq; loqui-
ciunt; & neq; hi, neque illi Christiane
ntrinæ vocabula tenent: quare mature
satisfieri eius votis non potuit. At ego
hac difficultate minime fractus, tracta-
tum breuem vtcumq; edidi, quo Christia-
næ fidei capita explanaui, indubitata
veritatem defendi, Gentilicæ atq; Maho-
meticæ superstitionis dogmata confuta-
i. Hunc Sosa in linguam Bengalicam
ducendum curavit, & eo vtitur per-
modè, quoties cum gentibus sermo
habendus est. Huic catechismum bre-
uem adieci, ad modum dialogi, quem i-
dem P. Bengalicum fecit, quem pueri,
qui scholam frequentant, memoriæ man-
dant, seruis & ancillis tradunt domesticis,
signum crucis, & reliqua ad doctrinam
Christianam spectantia, simul & discunt,
& docent. Hæc quæ pro tempore potui-
mus, illic præstitimus, in posterum spera-
mus Deo annuente perfectiora futura. E-
go Dominicis diebus in summo Templo
concionabar mane; doctrinam Christia-
nam vesperi, pleno auditorio explicabat
Sosa. In statione multi in morbum inci-
derunt, vt in tanta ægrotantium multitu-
dine

Historica Relatio

dine nullus otio locus esse potuerit. I tui generaliter confessi: multi milites, furtis, & latrociniis assuefacti, in flumi transeuntes spoliabant, ad meliorem vi rationem reducti sunt: alii à peccandi o casionibus liberati, alii coniugio copul ti: denique in omnibus æternæ salutis mor, & frugi melioris studium eluc bat.

Cum primum ad hanc stationem v nimus, nihil prius faciendum nobis put uimus, quam vt nosocomium in subfic um ægrotorum ædificaremus. Vidim enim passim tam Christianos, quam et nicos in plateis sub dio animam agente alios in campis defunctos, à feris, spar per agros ossibus, concisos, & dilaniato faciebat nobis stomachum ea res. Sed i colæ, quorum opera indigebamus, tempus restiterunt. Concio habita est laudem eleemosynæ, & nosocomij co dendi necessitas luce clarius ostensa eit sententia: nec mora, pecunia corro ta, ædes coemptæ in optimo situ; sup lex, vtenfilia, annona comparata. I mui præpositi sunt duo, alter Lusitar alter Indus: quibus exacto mense, ali,

De India Orientali.

nam ordine succedebant. Nobis ibi-
cōmorantibus , mortem obiere ad-
nta , quorum plerique ex Gentilibus
Mahometanis Christiani sunt facti,
ter aliquos promiscui sexus, qui deci-
m ætatis annum vix dum attigerant.
his profectis nuntiaturum est , domum
optime administrari , ægrotos esse
minus triginta , & vnius mensis spa-
t iisse viginti.

arochus nostri amantissimus , diuini
quij, atque animarum zelator, nobis
intibus huius nosocomij curam su-
it, vt magis nobis sperandum sit, hāc
um perennem , ac propriam futu-
maxime si Episcopus Cocinensis
Gullenfibus parochis multum, & se-
ommendauerit.

iuersati sumus in hac statione vsque
al. Octobris, quo tempore extrema
ayeme iter adornauimus ad hunc lo-
quem Portum magnum vocant. Di-
n potest, quibus lachrymis incolæ
um discessum sint profecuti. Primū
ntes retinere , & quasi vim inferre
i, deinde sublatis manibus obtesta-
t, saltē vt quadragesima reuertere-
mur

Historica Relatio

mur, se nauem, & alia omnia oportune missuros: nos cum rerum, quæ hic gererentur ignari essemus, de reditu nihil certi promittere ausi, bene tamē sperare iussimus. Apud Mongolos (quos vulgo Mongores dicunt) in more positum est, ab eū-tium nauigiis inspectis notam imprimendi, & vectigalia exigendi prætextu, sarcinas excutere, & miseros nauigantes spoliare. Nos vt huius molestiæ immunes essemus, omnes incolas, qui aliqua gratia, & auctoritate valebant, deprecatores habuimus, qui telonium concitato cursu petentes, à Publicano, quem ipsi Monsifum appellant, obtinuerunt, vt has iniurias à peregrinis, pauperibus, amicis depelleret, quo factum est vt nobis, & iis, qui nobiscum conscēderant parceretur. Quare læti vela dedimus, & tandem ad Portum magnum, qui sexcentis milliari-bus à Portu paruo distat, salui peruenimus; non tamen sine magno vitæ discrimine, quod cum à tigribus, tum à latronibus imminebat, qui per totum Gangem infesti, mortem nauigantibus sæpe inferunt.

Antequam ad Portum magnum veni-
remus

remus in medio itinere occurrit statio
usitanorum, in regno Chandecani, cu-
ius Rex missis ad Gullum litteris iam an-
tea nos inuitaverat; & Lusitani, qui in il-
lo regno agebant, per litteras, & nuntios
orabant, vt ad se veniremus, eo quòd to-
to biennio sacerdote carebant. Quare il-
lis nauigia, & cibaria præbentibus ad eos
diuertimus, & maxima omnium gratula-
tione sumus excepti. Vno : iense, quo
illic substitimus, omnes de confessione
audiuimus. Et cum ferme omnes intesti-
nis inter se odiis decertarent, Dei summa
clementia factum est, vt omnium animi
pacati, & ad cōcordiam redacti sint. Mul-
ti concubinas, & pellices abegerunt: mul-
ti, quas legitime poterant, vxores duxe-
runt. In concionibus publicis, & priuatis
colloquiis hortati sumus, vt pacem cole-
rent, pietatem amarent, omnibus bonum
exemplum præberent. Ducentos partim
liberos, partim seruos sacro fonte ablui-
mus. Illud prætereundum non est, obstu-
puisse omnes, cum videbant hæc, & hu-
iusmodi præstari gratis, & neque cereos,
& munuscula quædam, quæ in baptisma-
te offerri solent, in nostrum vsum cedere.

Hæc

Hac fama permoti multi Indi, qui post susceptum baptisma aliquot annos in terris infidelium delituerant, relictis latebris in lucem prodierunt. hos ingenti cum gaudio susceptos, & salutari poenitentiae sacramento expiatis, Ecclesiae matris gremio restituiimus. Concubinas si quas adduxerant, legitimo matrimonio coniunximus, & liberos in paganismo susceptos sacro fonte abluimus.

Audito Rex nostro aduentu, misit illico nuntium, qui nos suo nomine saluaret, & ad ipsius conspectum deduceret: perhonorifice ab illo sumus excepti, & promissis magnificis ad magnam spem erecti. Munera ad hospitium mittit de more gentis, oryzam, butyrum, saccharum, & haedos. haedum vnum, ne inurbani videremur, remissis ceteris, accepimus. Orauit Rex, e suis terris ne discederemus diplomate regio pecunias assignauit, quibus arcam, & terras Ecclesiae, atque aedibus construendis idoneas, emeremus. Sallis praeterea magnam copiam adiecit, & cerae modios quinquaginta. quae omnia sexcentorum aureorum pretium exsuperant. Nos in ripa Gangis agrum optimo
loc

loco delegimus, quo Ecclesiam, & domū ædificaremus, & Christianos vndiq; confluentes hospitio exciperemus: quem cāpū Rex, a motis Mongolis, & Pataneis quibusdam, qui eum occupauerant, nobis liberum reddidit; promisitque se suis sumptibus Ecclesiam structurum, quæ reliquas in Bengalæ regno ædificandas, pulchritudine anteiret. Aliud diploma concessit, quo dedit liberam facultatem Euangelij promulgandi, & baptizandi, præter alia multa, quæ ad rem Christianam promouenda maxime conducunt. Hanc amplissimi Regis propensam voluntatem ne tergiuersando læderemus, diligēter curauimus: gratissimum etiam V. R. fore non dubitauimus, si tam patens ostium, vltro nobis apertum non præteriremus. Quare vt Regis animum aliqua spe delinitum teneremus, respondimus nobis esse imperatum à superioribus, vt quam primum Portum magnum peteremus, quo certiores faceremus V. R. de rebus, quæ Syripure, & Chatigani gererentur. his cōfectis, & à V. R. responso accepto, Deo annuente nos regie voluntati non defuturos, imo quam maturrimè ad ipsius regnū

reuerfuros. Magnum profecto meff
hæc Chandicani regio nobis promit
quæ tam ampla eft, vt plerumque qu
decim dies, ne dicam viginti, nauigan
infumantur, antequam eius regni limit
præteriri poffint. In nemoribus, & lo
fylueftribus maxima ceræ copia confl
folet, quam inde mercatores per tota
Bengalam, & per Indiam vniuerfam d
ftrahunt. & cum hæc Chandicani ftatio
media inter Portum magnum, & Paru
fit vt indidem ad omnes totius Bengal
regiones fit facilis, & cōmoda nauigati

Hæc de Chandicano dicta fint fati
nunc ad Syripurem veniamus. Syripi
ftatio eft pertinens ad Portum magnu
huc mense Decembri appulimus, non a
lio vultu atque animo cum ah̄incolis, tu
à Lufitanis aduenis excepti, quam fi An
geli à cœlo delapfi, eis auxilio veniffemus.
tanta erat illorum calamitas, tot illos cir
cunstabant per eos dies curæ & anguftiæ.
Nam paulo ante ad eam ftationem appu
lerat Præfectus nouus, quem cum parti
cipantibus Concinenfis Epifcopus sacra
mentis Ecclefia, & communionem fideli
um prohibuerat. Quæ res maximas ibi
tur-

Io bas excitauerat. nos vt eam tempesta-
declinaremus data opera in Chan-
ano moram fecimus, sperantes fore vt
cerim omnia ad cocordiam redigeren-
r. sed fefellit ea spes, nam in eiusmodi
mpus aduentus noster incidit, quo o-
nia erant quam maxime turbulenta. Et
iamuis certum esset nobis quoad fieri
offet, quam minime nos immiscere, ta-
en ad eas angustias redacti sumus, vt no-
is non esset integrum nō respondere in-
errogantibus cum Præfecti offensa, qui
bi persuaferat, eximi se per nos à censu-
s posse.

Syripurem vbi apulimus, accersit nos
egulus, qui toti terræ præest, quem vo-
cant Cadarai: accessimus multis comitati
Lusitanis: accepit nos Regulus humanif-
sime, multa dictitans ad gratiam, & amici-
tiam pertinentia: & in signum amoris, fo-
lia aliquot herbæ in tota India notissimæ,
quam Betele vocant, singulis gustanda di-
stribuit. quid multa? hortatus est, vt mane-
remus, terram penes nos esse, se nobis o-
mnino non defuturum. Denique faculta-
tem dedit Euangelium prædicandi, sex-
centos aureos in annuos redditus diploma-

et ob signato concessit, Ecclesiæ condendæ aream in optimo situ dispicere iussit, & quæcumq; opus essent, dixit se suppeditaturum. Nostro rogatu priuilegia condidit in rem, & gratiam Christianorum.

In concionibus sumus assidui, auditores adfunt magna frequentia, aures afferunt sitientes, fructum pollicentur vberimum. Affirmant multi, qui non ita pridem ad has terras venerunt, sibi tamquæ pueris opus esse Christianæ doctrinæ pita de integro perdiscere. Concionæ fama excitati, accedunt nonnunquam Principes gentiles, qui licet non conuertantur, tamen Christiana decreta cum audiunt, admirantur, laudibus extollunt, nihil sibi videri affirmant perinde honorificum, ac religionis Christianæ præcepta. Mitto V. R. duos ingenuos pueros Bengaleses instituendos in Collegio Sanctæ fidei: vertente anno alios duos mittam, sicut V. R. nobis discedentibus præcepit. Quod reliquum est, oramus R. V. vt nos suis, & nostrorum omnium sacrificiis, & orationibus cõmendatos habeat, quo hæc missio eum, quem V. R. maxime cupit, effectum, & finem sortiatur. Datæ Syripure 14.

re 14. Ianuarii anno Domini 1599.

Postquam hæc scripsi Chatiganum appulimus, quo nomine vocatur statio in Portu magno. huius stationis viris primariis causam nostri aduentus exposuimus, nempe ut Christianis tam veteranis, quam Neophytis sancta sacramenta administraemus, & infideles ad fidem perducere-
mus. Illi vno ore responderunt, primum
tam esse regionem in tota Bengalica
one, in qua maior, & paratior esset rei
Christianæ messis, quam in terris Regis
Aracani, & Mogosii: deinde Regem Ar-
racani profectum esse ad bellum Peguen-
se; is vbi venerit, quod breui fore spera-
bant, nullum esse Regem ex omnibus, qui
in Bengalicis regnis sunt, qui nos maiori
amore, & munificentia sit complexurus.
Videt ergo V. R. quanto opere hic locus præ
cæteris, subsidiariis indigeat. Hactenus P.
Franciscus Fernandus.

In missionem Peguanam electus est P.
Baltassar Sequeira, qui statim oppidum
sancti Thomæ petiit, inde in regnum Pe-
gù cum socio P. Ioanne Costa in prima na-
uigatione transmissurus. tamen ante ho-
rum discessum nos ad urbem sancti Tho-

mæ peruenimus: quid illis postea successe-
rit, suo loco dicemus.

Cocino profecti, postquam in itinere
Ecclesiam S. Andreae cum noua illa, quæ
recens erecta est in regno Porcà, visitaui-
mus; Colanum contendimus. Colano de-
mum relicto reliquum viæ non sine ma-
gna sollicitudine confecimus. timentes ne
loca vicina à militibus obfessa tenerentur.
Rex enim Trauancoris certiores nos fe-
cerat, Regem Madurenum cum septua-
ginta hominum millibus, & multis Ele-
phantis ad pugnam instructis contra se
venire. At nos diuino auxilio freti, nullo
obiecto obstaculo per totam Trauancoris
oram discurrentes, triginta tribus Eccle-
siis visitatis, Cori promontorium flexi-
mus, quo à tergo relicto, totam oram
Piscariæ Tutucurinum vsque perlustra-
uimus, ibi longe maximo solatio nos af-
fecerunt tot neophytorum tam accura-
tè culta noualia. Conueni in oppido Puni-
cale Patrem Henricum, qui iam inde à
temporibus Patris Francisci Xauerii san-
ctæ memoriæ, sacerdotio insignitus, & ab
ipso Xauerio ibidem relicto, quinquagin-
ta duos annos inconcusso pede eandem
statio-

stationem tenens, etiam num corporis viribus, & animi vigore valens libros plures, in dies Malabarica lingua scriptos, prælo mandat, quibus Christiani nominis splendor etiam apud ethnicos non parum enituit. Quanta nos illi neophyti lætitia, gratulatione, honore, triumpho ubiq; susceperint, commemorare quodammodo piget, quanquam, licet honor ipse præstitus, nos robore suffunderet, tamen beneuoli, & grati animi significatio non potuit non esse gratissima.

Paucis diebus Tutucurini transactis, consenso nauigio, Piscariæ tractum, & insulæ Manaris oram legimus. Ecclesiis Vaipari, & Bēbari à longe salutatis (erant enim consulto à Patribus derelictæ, ob novos tumultus, nuper ab ethnicis excitatos) Periapatani diutius præter opinionem, & contra voluntatem consedimus. Post biduum enim, quo cum illis Christianis commorati sumus postquam vela fecimus, aduerso vento reiecti, ad eundem portum iterato cursu remeauimus, Deo nos P. Antonii Criminalis interuentu, ad illarum gentium salutem reuocante.

Cum enim constet Periapatanum Pa-

rauelinorum esse metropolim, & emporium percelebre, vnde per totum illum sinum, & tractum maritimum, fidei Christianæ semina spargi, & Ecclesiæ catholicæ dilatari spatia percommode possint; viuum est ibidem Residentiam duorum Sacerdotum collocare, qui ciuitatem Tripalacurinam vsq; percurrant, Tripalacurini namq; , atq; Periapatani oppidorum distantia ita se habet, vt quamuis per mare pergentibus Ramanancoris Promontorii obiectu, via reddatur longa & molesta, tamen terrestri itinere brevis sit transitus, eaq; nunc tutior, quam fuit eo tempore, quo ibi P. Criminalis Badagarum telis extinctus est.

Ramanancoris Promontorium prospero vento superauimus, spumantibus hinc inde fluctibus vadosi sali, quod plurimis arenarum cumulis temere congestis, atque incertis alueis perplexum navigantibus iter præbet. Vidimus ibidem Lusitanicæ classis biremem, per eosdem dies syrtibus impactam, cuius tabulas incolæ certatim diripiebant. Anchoram iecimus iuxta insulam, quæ prima nobis occurrit, atq; inde postera die soluentes, quæ fuit
 quarta

quarta feria cinerum, Talemanarem, Manaris insulæ limen, noctu attigimus. In ipsius portus faucibus carina fundum tetigit, quæ res occasio fuit crucis erigendæ in edita pyramide, in signum nauigantibus, & in solatium eorum, qui Christo nomen dederunt. Feria quinta, Parasceues sacrum fecimus in Residentia Carcelis. Inde perreximus ad Ecclesiam S. Thomæ quæ dicitur Carearum, quæ primaria est illius insulæ. Sub noctem locum hunc sumus ingressi, quo tempore Christiani omnes in Templo congregati, solenni tenebrarum officio vacare consueuerant. Cognito nostro aduentu, confestim omnes cum cereis accensis, duobus ordinibus dispositi obuiam procedunt, tanto silentio, tamq; demisso vultu, vt mœrorem ex Domini passione conceptum, facile agnosceres. Quæ res tum quidem magna deuotione accendit, tum vero longe maxima cum diuina illius temporis officia tanta cæremoniarum venustate, cantusq; suauitate celebrari vidimus: deinde cum concionem de Passione Domini audiui-
mus, in qua linguæ Malabaricæ licet ignari, tamen singultibus, & lacrymis ipsorum

edocti, interiore, quo erant affecti, diuini amoris sensum satis perspectum habuimus. Deniq; cum officium Resurrectionis tanta celebritate, & frequentia peragi vidimus, vt non iam in æde S. Thomæ Carcarum, sed Goæ in Templo S. Pauli hæc omnia intueri videremur.

Visitatis reliquis Ecclesiis, quæ nostræ curæ sunt, inde perreximus ad ædes nostras, quas non longe ab arce sitas habemus. Deinde transmissio flumine, terrestri itinere pergentes, margaritarum piscationem illam, toto orbe celeberrimam visimus. Facta est hæc piscatio hoc anno in ora maritima Ceilani insulæ, duodecimo milliari ab insula Manare. Sub solis occasum ad flumen magnum peruenimus, & quia noctu traicere non satis tutum videbatur, pernoctauimus in tentoriis piscatorum, qui plurimis luminibus circumcirca accensis elephantorum incursiones arcebant. at nos nihil præter pauones vidimus, quorum gratior erat aspectus, quam elephantorum, & quam illius viperæ, quæ nobis nescientibus sarcinulis se se miscens flumen nobiscum traiecerat, quam orto mane conuoluto corpore ad pedem cathed-

thedræ dormientem deprehendimus. Ab hac peste, qua qui sunt icti post septimam horam exspirant, seruauit nos Deus tum suæ naturæ bonitate, tum etiam fortasse quia meminuit nos ideo tam sero tabernaculum nostrum ingressos, quia pauper quidam nos detinuit, quē in syluis iacentem, & pene exanimatum inuentum Sacerdotes, & Leuitæ non præterierunt; sed in illa ipsa cathedra, quam dixi, sublatum, & bene refectionem in tuto collocarunt, & ei omnia necessaria ministrarunt.

Non plus tres dies in illa visitatione consumpsimus, ne nauigii copiam à Ceilano opportune soluentis negligeremus, & quia illud temporis satis fuit nobis ad æstimandum quanti intersit, nostros illi piscationi interesse. Est enim piscatio illa hominum frequentia celeberrima, qui ex vicinis regionibus eo confluentes, ad sexaginta millia in castra conueniunt: arma utensilia, suppellectilem, atq; adeo totam familiam huc afferunt; Ecclesias in toto litore statuunt. Nostri sacerdotes sacrum faciunt, lites componunt, pugnas dirimunt, rapinas cohibent, tumultus sedant, Christianos à sexcentis contumeliis, & poten-

potentiorum vexationibus liberant, ut nulli dubium sit, quin tota illa multitudo, ni Patres adessent, maximis incommodis obnoxia dissolueretur, & in fumum abiret.

Nunc ad Manarem nostra redeat oratio. Nauigium cuius supra memini, Calendis Aprilis conscendimus ego, & quatuor è nostris, vento vñ sumus primo mane satis prospero: at postquã fuimus ad decem milliaria in altum prouecti, se nobis ad proram opposuit. Illico iecimus anchoram, suspicati nimirum esse ventum incolis adeo formidolosum, quem Chitaraaram, id est, Aprilis aquilonem nominant; qui sæpe inopinato irruens, miseros nautas osciantes opprimit. Nec nos fefellit opinio. nauigium autem erat paruum valde onustum, & minus expeditum, ventus validus, & procellosus in singula momenta crescebat: quem nos, Deo consilium suggerente, immaniter irruentem, trepidi, sublata anchora, à puppi excipimus, & conuersa prora ad portum conamur reuerti. Ventus interim ab orientali plaga mirum in modum debacchatus, præter pluuias, & tonitrua, ingentes fluctus excitauerat, qui in nauem arietantes, immani
fremi-

fremitu laceſſebant, & ni Deus opem ferret, mortem omnibus intentabant. Verſabatur ante oculos mors P. Pacifici, & Iacobi Soueralis, atque fratris Emmanuelis Pinerii, trium è noſtris, qui eodem in loco non diſſimili procella, fluctibus abſorti perierunt. Metum augebat mors recens cuiuſdam è familia B. Franciſci, qui nuper Negapatano ad Manarem tranſmiſſurus, in eodem freto interceptus, verſa naue merſus eſt. Naclerus metu pene exanimatus, iam ad malum ſubſiderat, è nautis vnus intrepidus ad gubernacula acceſſit, quo iubente, ſinu ex velo facto, viam vtcunq; ſecauimus: at illo velo repente dilacerato, viſum eſt in prora lintheamen extenſum, quatuor nautis validiſſimis tenendum tradere. Hoc pacto, atque opera Chriſtiani cuiuſdam, qui temonis regendi arte pollebat, æſtum pariter, & fluctus ſuperauimus, & tandem eodem die poſt ſolis occaſum ſalui, & incolumas in ſinum tutũ euafimus, in quo iacta anchora, paululum à terra remoti, ne ſcopulis illidermur, noctem illam in maxima iactatione inſomnem duximus. Poſtero die duo nau-
tæ vafiſ inanimis inhærentes, terram na-
tando

tando petierunt, à quibus incolæ certiores facti de nostro appulsu, magna caritate, & gratulatione nobis subuenerunt, eorum opera ad terram peruenimus.

Relicto hoc nauigio vt minus commodo, & tempore etiam tranquillo parum tuto, alia naue conscensa biduo post oppidum Negapatatum attigimus. In æde Misericordiæ diuersati sumus, in qua iacet corpus P. Francisci Perez, quem incolæ vt sanctum venerantur. Fuit aduentus noster Lusitanis incolis gratissimus, eo quod Patres Societatis, quos à multis annis desiderauerant, iam tandem, in illa terra sedem fixuros, quasi diuinantes asseuerabant. Hac de causa conuenère cum Parocho omnes viri primarii & id ipsum à me multis precibus flagitarunt. Quorum votis haud sane illibenter acquieui, multum enim & nostra, & ipsorum intererat, nã in oppido Lusitani multi habitant, & multi à regionibus Sinarum, Bengalæ, Pegu, & Malacæ illuc confluunt hyemandi causa. Est præterea situs iste ad fidem amplificandam in primis opportunus, ex quo tanquam è centro habitantes in circuitu gentiles, qui sunt prope innumeri, com-
mode

mode adire, & loca vicina in toto illo tractu vsq; ad oram Coromandelis facile inuisere poterimus. Ciuitatem continuo summo studio obeunt, vt locum Ecclesiæ, atque ædibus nostris idoneum dispiciant. Placet area in ripa fluminis, è regione maris vento australi obiecta (qui ventus ibi maximè salutaris habetur) & nostrorum ministeriorum exercitiis, ob magnam inibi concurrentium hominum multitudinem, accommodata. Hanc quingentis aureis emunt, multas insuper eleemosynas largiuntur. Patres relictī duo, qui nouæ Residentiæ primam manum imponerent. Res prospere successit, nam & ipse Naichus Taniaoranus in portu, qui Nagapatano nō longe distat, Ecclesiam construī petit. Quin & in Trangabare, sexto ab hinc lapide, cæpta est alia Ecclesia, quæ fidei in illis partibus dilatandæ non parum conducet.

Negapatano profecti, ad oppidum S. Thomæ terrestri itinere contendere statuimus. Quod iter Lusitani nonnulli vehementer dissuaserunt: aiebant enim loca esse infesta & non satis peruia propter Badagas, quos nuper ad Candiam Ceilani regnum

regnum transituros, in Iafanapatano eidem Ceilani regno, Lusitani intercepti male multauerant. Terror iste nullo probabili fundamento niti videbatur. loca nim, per quæ erat nobis transeundum, is Naichis Taniaorano videlicet, & Ggiano parebant. Quare iter arripimus ius tractus videndi cupiditate illecti, si forte spes in futurum foret, hos populum ab idolorum cultu ad veri Dei cognitionem traducendi. ingenti cum voluptate ad duodecimum diem iter fecimus, lucorum nimirum, atq; nemorum amœnitatem, fluminum, aquarumq; perennium copiam, & totius regionis pulchritudinem, soli vbertatem, cæli clemētiam contemplantes. Hanc lætitiā imminuebat immanis, atque inaudita illarum gentium superstitio. Vidimus enim homines ratione præditos, tot idolorum prodigia, hominum, elephantorum simulacra, in templis pulcherrimis permultis, & in aliis fanis minoribus, pene innumeris, non minus superstitioso, quam ambitioso cultu venerantes, atq; illorum idolorum colossos in curribus, qui turres altitudine æquabant, subiectis rotis multis hominum milibus

ous humeros subiicientibus , huc illuc transportantes.

In itinere urbem vidimus Cidambara-um, superstitionis gentiliæ in illa regio-
caput , & metropolim , idolorum tem-
is augustissimis refertam. Horum Brach-
anes in annuos redditus triginta aureo-
um millia habere dicuntur: quamvis non
si duodecim millia hæc tempestate eis
umerentur. Appulerat eodem die, quo
os, Naichus Gingianus, in cuius ditione
ita est hæc vrbs : visum est hominem visi-
tare , quo facilius nobis per illam regio-
nem transeundi copia concederetur; sine
qua absque maxima vectigalium , & nau-
lorum molestia , nullibi pedem mouere,
nedum iter facere licebat. Vrbi cum ap-
propinquauimus , inuenimus omnia oc-
cupata militibus , qui ad triginta millia e-
rant , & elephantes centum , ingredimur,
ducem viæ datum comitantes , qui in fani
cuiusdam hortulo , arboribus confito ius-
sit expectare, donec Naichus de nostro ad-
uentu certior factus , adeundi potestatem
faceret. Is instante nocte, postea quam ex
edito loco exercitum , & elephantes ocu-
lis perlustraauerat, in palatium se recepit.

C

Iussit

tractarent: quod vt melius fieret, vnum è famulis suis, qui nos deduceret, simul mittendum curauit.

Sequenti die iter prosequimur nō ituri fortasse, si quis nobis indicasset spectaculum illud, quod eodem die Cidambarani futurum erat, quod à viris fide dignis accepimus, & ipsi postea reuersi pro comperto habuimus, vtpote iam familiarius habiti, & in ipso Naichi palatio hospitio excepti. Spectaculum fuit eiusmodi. Vingt Sacrificuli, quos logues vocant, à summo templi pinnaculo se præcipitarunt, quod quo pacto acciderit, vt melius intelligatur, rem paulo altius repetemus. Exstat fanum Perimali, in quo summa superstitione colitur simius, Hanimātus dictus, quem aiunt fuisse Deum, & propter nescio quod peccatum, vnā cū aliis multis Deorum millibus in simium trāsformatum in illis locis substituisse, atq; omnibus illis simiis imperasse: deinde necessitate compulsum à Ramanancore ad Ceilanum insulam traiciendi, cum nauigiis careret, ipsum saltando fluctus superasse, atq; ad singulos saltus singulas insulas creantem (qui sunt arenarum cumuli
longo

longo tractu à Ramanancore vsque ad insulam Manarem) sibi suisque omnibus viam struxisse. Huius dentem asserunt fuisse illum, quem memoriæ proditum est, Proregem Constantinum felicissimę memoriæ in ignem misisse, quod ne faceret, ethnici dentem trecentis aureorum milibus se redempturos spondebant. Prorex religione prohibitus, tanta pecuniarum vi se non est passus vinci, quinimo Theologorum quorūdam opinione spreta, sententiam illorum, qui religionem pecunię præferre suadebant, pio, ac magno animo amplexus est. Hæc de Perinali, cuiusq; Simio. Affirmat deinde credula gentilitas virum quendam sanctum, Cidambarani multos annos pœnitentiæ causa in clauo ferreo pedem transfixum tenuisse. Mandauit huic Deus, vt ab hac pœnitētia desisteret, renuit ille; & cū vltro, citroq; multi nuntij intercessissent, affirmavit homo, se nunquam quicquam de pœnitentia remissurum, quousq; Deum ipsum circum se saltantem videret. Tandem Deus eius voluntati obtemperans, ipse cum Sole, luna, & stellis coram sancto choreas duxit, illis citharam pulsantibus, saltanti-

busq;. Deo saltanti armilla aurea à pede excidit, à qua Cidambaranum nomen accepit: idem est enim Cidambaranum atq; aurea armilla. Facta est igitur per hos dies inter gentiles magna digladiatio, an liceret signum Perimalis in templo Cidambaranensi collocare; quod signum nihil aliud est, quam malus inauratus cū Simio iuxta pedem. Aliis repugnantibus, aliis per legatos vehementer vrgentibus, Naichus Gingianus obfirmato animo signum in tēplo collocare decreuit; templi sacrificulis, qui in interiori æde à thesauris erant, valde renitentibus, & si id fieret, à summo fastigio se se præcipituros interminantibus. Idem Brachmanes templi, se facturos postea quam illorum corpora humo mandassent, sanctissimè iurati sunt, quod tamen postea saniore consilio freti, non præstiterunt. Quare eodem die, quo nos discessimus, Naicho Gingiano malum erigere aggrediente, sacrificuli summo templo consensu, se se inde præcipitare cœperunt. Postquam viginti plus minus præcipitio disrupti expirarunt, Naichus id sibi opprobrio ducens, in eos eminus sclopos intorqueri iussit,

iussit, duobus tantum glandium plumbeorum ictu mactatis, subduxerunt se reliqui, & iam desperabundi, huc illuc incertis sedibus vagantur. Nec defuit mulier, quæ hac ipsa de causa tam vehementer exarsit, ut ipsamet sibi guttur præcideret. At malus erectus est cum simio in imo sedente. Speramus aliquando fore, ut diuina prouidentia disponente, Societas, quæ Ecclesiam iam habet, non amplius tribus milliaribus ab hac vrbe distantem, hoc ipso in loco, crucis vexillum veri Dei trophæum, erigat cum Dæmone ad pedem catenis alligato, sicut alicubi pictum videmus, & sicut re vera, crucis inuictæ virtute ligatum credimus. Nos iter prosequimur, & huius Naichi, atque Principum Triuidini, & Salauacchæ, qui huius imperio parent, beneficentia freti, ad oppidum B. Thomæ salui, & omni vexatione liberi peruasimus. Fuit hæc antiqua vrbs Meliapor, Coromandelis regni olim caput, nunc Regi Vissanagorano paret, qui eam certis conditionibus Naicho Taniaorano regendam tradidit.

Ragiù, qui & Rex Vissanagoræ (quæ à Lusitanis Bisnagà, à scriptoribus Regnum

Narſingæ, à Rege Narſinga dicta eſt) ab ethnicis, harum partium Regum Dominus, & ſupremus Imperator habetur, & ipſe de ſe non magis demiſſe ſentit, vt ex conceptis verbis: quæ ipſe ſuis diplomatis adſcribit, manifeſtè patet, quæ ſunt eiufmodi.

Sponſus Subuaſti (id eſt, bonæ fortunę) magnarum prouinciarum Deus, maximorum Regum Rex, & Regum Deus, omnium equitatum Dominus, magiſter neſcientium loqui, trium Imperatorum Imperator; victor omnium quæ videt, & conſeruator omnium quæ vicit; formidolofus octo plagis mundi, Mahometanorum exercituum debellator; Dominus omnium prouinciarum, quas cepit, ſpoliorum, ac diuitiarum Ceilani raptor; qui viros quantumuis fortiſſimos longe ſuperat qui inuictiſſimo Viraualalano caput abſtulit; Dominus orientis, auſtri, aquilonis, occidentis, & maris; elephantorum venator, qui virtute militari viuit, & gloriatur. Quibus honorum elogiis gaudet, militari virtute præſtantiſſimus Vencatapadinus, Ragiù Deuamaganus Ragel, qui hodie regnat, & hunc mundum gubernat.

Rex

Rex igitur Vissanagoranus, qui hodie in regno Vissanagoræ in vrbe Chandegrino solium tenet, magna potentia pollet. Et olim à Cori promontorio vsque ad regna, Goæ adiacentia, ad oram vsque vtriusque maris longe, lateq; dominabatur, donec hinc Idalcanus, inde Reges aliquot, vt Naichi, quorum ante memini, eius iugo excusso imperium detrectauerunt. Visum est igitur rei Christianæ, & Euangelii propagationi valde conducere, missionem decernere Sacerdotum, qui in vrbe regia residerent, vt hac via maior esset nostrorum auctoritas, & gratia apud vicinos Principes, qui & ipsi iam nostros ad sua regna inuitare cœperunt. Rem cum viris grauib; & rerum peritis communicaui. Visa est à Spiritu sancto profecta. Cognito nihilominus Regem esse bello implicitum, quod Naicho Madureno inferebat, paulisper expectandum censui. Interim P. Simoni Sà Rectori Collegii S. Thomæ negotium dedi, vt data opportunitate, missionem auspicaretur, quod ille paulo post optimo cum successu effectum dedit, vt ex ipsius litteris suo loco constabit. Interea pio-

C

rum

rum eleemosynis erectum est Meliapore Seminarium puerorum nobilium Badagarum, & Malabarium adiuncta schola, in qua docetur lingua Tamul, id est Vernacula, & lingua Badagana, qua vtuntur Palatini. Ex hoc Seminario, Deo fauente, transferentur nouæ plantæ, quæ suo tempore in totum illum tractum fructus spargent vberrimos.

Anteaquam à S. Thoma recederem, cœptum est agi de noua missione Peguana, nostris ardenti studio prouinciam illam suscipere gestientibus. Sed re nondum transacta, appulerunt naues Peguorum, quibus de turbulentissimo huius regni statu certior factus, missionem illam in aliud tempus distuli. Vt autem clarius V. P. innotescat, quo loco sint res, & quas maximè ob causas hanc missionem, à V. P. tantopere commendatam, quæque re vera præ omnibus missionibus orientalibus, vberrimos fructus pollicebatur, distulerimus; adiungam ea, quæ à fide dignis accepi, qui huius regni Pegú rebus tum aduersis, tum prosperis, multo tempore interfuerunt; & suis oculis eius ruinam perspexerunt.

*DE REGNO PEGU, ET DE STA-
tu, in quo fuit mense Martio anno
Domini 1598.*



EX Peguanus huius pater, qui nunc viuit, de stirpe Bramarum, fuit omnium, qui in Pegu regnarunt, potentissimus. Duodecim enim regna suo subiecit imperio, nempe regnum Cauclani, unde sapphiri, & rubini optimi proueniunt: secundum regnum Auà, in quo sunt fodinæ æris Cyprii, plumbi, & argenti: tertium, regnum Bacani, in quo multæ auri fodinæ: quartum, regnum Tungrani, quod plumbo abundat, & lacra: quintum, regnum Promi, quod itidem plumbo, & lacra abundat: sextum; regnum Iangòmæ, cupri, musci seu almiscaris, piperis, panini bombycini, auri, argenti abundans, quæ omnia etiam in reliquis Peguani imperii regnis habentur: septimū regnum Lanrani, vbi beiuini tanta est copia, vt ad naues onerandas sufficiat: octauum, & nonum, regna Truconis, unde merces quamplurimæ à Sinis ad nos transportantur.

tur: decimum, & vndecimum, regna Cablani, quæ gemmis abundant, & Aauano regno adiacent, media inter Auà, & Sinas: duodecimum, regnum Sionis, quod vltimo loco subiecit, in qua expeditione decies centena, & sexaginta millia militum fertur armasse, quos ex omni plebe ita conflare voluit, vt ex vnaquaque decade vnum tantum militiæ adscribe-
ret. Is triginta, & sex annos tanta omnium opum affluentia regnavit, vt licet quis centum naues oryza onustas exportaret (tanta erat vbertas agrorum, abundantiaque rerum omnium) nihil omnino imminutum esse videretur. Mitto reliquas merces, gemmarum tanta erat copia, vt qui vnus tantum mensis spatio dato ad gemmas coemendas, multa auri talenta in eis vellet infumere, prius aurum exhauriret, quam gemmæ deficerent. At terra illa tam florens & opulenta, in tantas ærumnas, & rerum omnium inopiam incidit, vt iam in toto regno nulli fere mortales inueniantur, præter admodum paucos, qui cū Rege in arcem se receperunt, quos cū mulieribus, & paruulis vix ad septem millia pertingere affirmant
cò

eò enim miserię, & inopię per hos dies redacti sunt, vt carnibus humanis vulgo famem pellerent, & carnis humanę macellum in publico statuerēt. Parentes à filiis, filii à parentibus non abstinebant. In ciuitate qui erant robustiores, scaphas, & lintres ingressi, in debiliores quosq; impetu facto, quęcumq; cepissent, minutatim in frustra dissectum igni torrebāt, & deuorabant. Si quos inuenissent ita fame exesos, vt nihil, nisi pellis & ossa superessent, aperto ventre pulmonem extrahebant: & ne quid fragmenti periret, effracta caluaria, cerebrum crudum exsugebant. Mulieres (dictu mirabile) omne humanitatis sensum exutę, per plateas cultellis armatę discurrebant, & in obuios, atq; infirmiores quosq; detestabile carnificii genus exercebant.

Hanc calamitosam tanti regni ruinam & tot malorum originem, superest, vt paucis exponam. Defuncto Brama, huius Regis patre, qui, vt dixi, triginta septem annos regnauit, filius secundo mense postquam sceptrum est adeptus, cum inaudisset Regem Auani, patrum suum, nouis rebus studere, quadraginta præ-

ta præcipuos regni proceres , qui cum illo conspirauerant , quorum opera Rex defunctus in expeditione Sionica fuerat usus, in custodiam tradidit. Atque hos omnes cum parentibus , vxoribus , liberis, amicis, & necessariis in syluam coniectos , admotis vndique vepribus & ligno arido , immisso igne , miserando post hominum memoriam spectaculo concremauit. Et si quos comprehendisset ex illo rogo elapsos, nulli venia data, bifariam secari iussit. Immani spectaculo Pegusiorum omnium animi aduersi, & deinceps inuiti eius imperio parebant. Hoc intestinum odium Rex, & ciuium à se alienationem, in bello, quod aduersus patrum suscepserat, sæpe suo malo expertus, tandem singulare ei certamen obtulit, hoc pacto interposito, vt vterque sibi mutuo in elephantis concurreret, qui viuus euaderet, is sceptro potiretur. Rex in hoc duello victor existens, occiso patruo Peguani & Auani regni gubernacula suscepit.

At neque sic impendentia mala euadere licuit. Rex enim Sionis, dum in regno Auano Rex & patruus mente, & animo in

mo in bellum insistant; ipse exercitu co-
aeto ad limites regni Peguani, ad vicum,
qui dicitur Satan, cum omnibus copi-
is contendit, sparsa ubique fama, se Do-
mino suo Regi subsidio venire. eundem
nuntium ciuibus Peguanis præmisit,
cum nouem milliaribus ab vrbe regia ab-
esset. Quippe non cum latebat, Regem
cum ad Auanum bellum proficiscere-
tur, optimo præsidio munitam urbem re-
liquisse, atque tres viros principes paræ
potestate omnia moderari, nimirum
Principem Regis filium, atque eiusdem
æconomum, & præpositum aduenarum.
Aduentum Sionii, Rex Bramà ægerrime
tulit: missoque continuo duce cum parte
exercitus, iussit ad se captium trahere.
quod dum exequi Dux conatur, mi-
lites à Rege missi, desperatis rebus, ne-
glecto Regis mandato ad suos lares reuer-
tentes, obedientiam abiiciunt. Bramà
his auditis, ab Aua se maturè expediens,
furibundus ad urbem reuertitur: mis-
so nuntio Sionium blande rogat, vt ad
se veniat. Respondit ille, se vltro ad o-
pem ferendam Regi venisse, à regni pro-
ceribus male acceptum, tantam imma-

nitatem æquo animo ferre nec posse, nec debere: quare se adduci non posse, vt ad Regem vnquam, aut ad vrbem in posterum accedat: tributa vero semper daturum, & imperium non detrectaturum.

Hoc responso accepto, Rex biennio interposito nongentorum millium hominum exercitu comparato Sionem versus signa mouet, vrbem regiam obsidione cingit. Sionius blandis internuntiis Regem detinet, & quasi vrbem confestim traditurus, vsque ad tertium mensem procrastinando tempus terit, eo consilio, vt hyberna inundatione, quæ mense Martio in illa regione solet accidere, Rex interceptus, exercitum perderet. Ille enim ignarus tanti periculi, in locis campestribus castra posuerat, & terram illam depressiorem vsque ad præsidium Meragri, totam multitudine repleuerat. Aquæ vero, Nili modo, inunte Martio totam adiacentem regionem vsque ad centum viginti milliaria circumquaque inundant, atque omnem consistendi, aut quoquouersus pedem inferendi facultatem tollunt. Hac
cluuiio-

eluuione repente ingruente, Bramà cum ipso exercitu in vltimum periculum deuenit, nec quo se verteret, aut quod cuiq; præferret satis perspectum habebat. Sionii interim lintribus, & scaphis conscensis, milites natantes toto æquore trucidabant; alios æstus, & torrentes in profundum rapiebant: quo factum est vt è tanta multitudine vix septuaginta millia, eaque sine equis, & sine elephātis Martauanum redierint. Huiusmodi expeditionibus semel, atque iterum frustra tentatis, tandem Rex fratrem suum Regem langomanum cum multis ducibus misit; Filium quoque bis cum ingenti exercitu eo contendere iussit: atque hi licet magna clade hostes affecerint, agros vastauerint, prædas auerterint, tamen & ipsi male multati nunquam nisi plus media parte exercitus amissa, domum redierunt: quin & filius in vltima expeditione, plumbea glan-
de traiectus occubuit.

Bramà amisso filio magno dolore percitus eiusque vlciscendi studio efferatus, ipse ad Sionis regnum rursus proficisci statuit. Quapropter commeatus copiam, quam potuit maximam comparari iubet,

D

ac Mar-

ac Martauani , & Murmulani , nec non in Tauà , & Tanassarino maximam annonæ vim in horreis asseruari præcipit. In hoc apparatu toto triennio exacto , secum Peguanos omnes ad bellum educere decreuit. At illi recentes innumeras clades , & tot aduersa prælia animo versantes , lucem & conspectum hominum perosi , partim in eremis , & locis syluestribus se abdiderunt , partim Talapoiorum habitum sumpserunt. Sunt autem Talopoi , qui se mundo nuntium remittere profitentur. Denique non pauci se in captiuos vendiderunt , ne quis eos ad bellum proficisci cogeret. Bramà ubi aduertit Pegusiorum animos à bello abhorrere , mandat auunculo suo Ximibogo , vt omnem regionem perlustret ; & ex monumentis , & tabulis publicis , cuiusque genus & conditionem perdiscat : atque ex iis , quos bello idoneos compererat , dimidiatam partem in militiam ascribat. Is tota peragrata , deprehendit , eos , qui bello utiles forent , pro magna parte in Talapoiorum ordinem transiisse : cæteros incertis sedibus errare , præter eos , qui ad ipsius Ximi patrocinium confugerant. Hæc cum Ximibo-

mibogus Regi nuntiaffet , edicto publico statutum est , vt omnes , qui per illos dies in Talapoios euaserant, ad pristinum vitæ statum redirent. Deinde Ximibogo præcipit Rex , vt iuuenes ad bellum cogeret , senes ad Bramarum regionem in exilium mitteret : quos idem postea in exilium missos, equis permutandos curauit. Iussit præterea, vt Pegusiis omnibus à maximo vsque ad minimum, in dextera stigma inureretur, quo cuiusque nomen, patria, conditio constaret.

Pegusii cum viderent se per summum probrum stigmaticos factos , Talapoios habitu spoliatos, senes equis in exilio permutatos , tum demum immenso dolore discruciat, à Bramà penitus deficere cogitauerunt. Primi rebellarunt Cosmien-
ses , & Regem sibi constituerunt. Bramà in eos ducem immittit , virum strenuum, & bellicosum. Is Regis iussu per flumina discurrens, omne frumentum , oryzam, atque omnem supellectilem pretiosam, & quicquid alicuius momēti inuenire poterat, nauigiis imponens , in urbem asportat: si quid supererat, totum ignibus tradit: quin & plurimos vtriusq; sexus ad

Regem captiuos ducit. is immani illa consuetudine, palis, & spinis circumseptos, admoto igne comburit. Hanc immanitatem cum toto anno in miseros exercuisset, ac propterea multi in nemora, & loca asperiora se abdiderunt, cum neque pecora, neque annona illis suppeteret, despondentes animum, se Regi tradiderunt. ille omnes exquisitissimis tormentis interfecit.

Cosmii regno ita consumpto, in regnum Auà furorem Rex conuertit: filio, qui ibi summæ rerum præerat, ad se vocato, iubet ut Auenfes omnes vtriusque sexus, & omnium ætatum solum vertere, & secum venire cogeret, hoc consilio, ut agros Peguanos, à cultoribus desertos coleret. ii sedibus patriis relictis, mox ut alienas terras tetigerunt, aëris intemperie, pustulis erumpentibus, ægrotare cœperunt. Mox eadem contagione reliquis Pegusiis communicata, tam immaniter hæc pestis in omnes grassabatur, ut multi doloris impatientes, se in flumen præcipitarent.

Interea Pegusi nonnulli, qui Murmulanum confugerant, adiuuantibus Sionis,

niis , arcem in potestatem redegerunt. Hos Bramà annua obsidione premit. Sionii hoc nuntio accepto, cum omnibus copiis improuisi adsunt, Pegusios fugant, equos, elephantes mactant, milites partim occidunt, partim captiuos ducunt, aut in flumen præcipitant. Hoc pacto tota illa regio Pegusiis erepta, in Sioniorum potestatem venit , ac ipsi Pegusiorum Principes, qui Bramæ iussu, huic bello interfuerunt suis fortunis desperantes ad Sionios transfugerunt. Horum vxores, & liberos, familiam omnem, & vniuersam sobolem, Bramà suo more, flamma, ferro, aquis ad internecionem vsque deleuit. Etiam totus ille tractus à Pegù vsque ad Martauanum, & Murmulanum, incolis, terra, mariq; ad Pegusios confugientibus, in solitudinem redactus est.

Per eosdem fere dies , quibus Murmulanum obsidione cingebatur , filium minorem , quem Bramà ante ad regnum Promi cum imperio miserat , ad se reuocat : is alacer, & lætus ad patrem contendit, ratus se ideo reuocatum , vt fratri maiori Auano Principi prælatus , hæres regni Peguani renūciaretur. Hæc illi sibi so-

omnia fingenti imperat pater, vt ad Murmulanicam obsidionem proficiscatur. Filius primo indignari, deinde excusationes obtendere, se videlicet imparatum venisse, existimantem non ad pugnam, sed ad alia negotia euocatum. Pater ira excalescens, verbis asperis filium compellat, iubetque vt fratre maiore salutato, ne minima quidem mora interposita, proficiscatur: si secus faceret, capitalem poenam proponit, exemplo terret Ximi Chadulli cognati, qui nuper ob similem culpam capite plexus est. His auditis tacuit adolescens, & ad naues quibus à Romano regno venerat, vesperi se recepit. Deinde, intempesta nocte decedente æstu, sublatiis anchoris, cum tota classe domum reuertit, & patri bellum inferre cœpit.

Sionis Rex his cognitis, & per exploratores certior factus, in quantis angustiis versarentur Pegusiorum res, iterum arma capit, & infestis signis ad urbem Pegù recta contendit. Erat hoc tempore messis matura, agricolæ raptim quod poterant, in horrea intulerunt; quod restabat, iubente Rege, tradiderunt igni. Sionius urbem obsidet. Numerabatur eo tēpore in vrbe, & in

& in arce, & per muros dispositi homines, ad centum & quinquaginta millia, partim Pegusii, partim Bramenses, & Canranenses, ac Sionii nonnulli à regno Tangù. Tormentorum omnis generis tria millia, in quibus tormenta ærea mille, & ex his centum & quinquaginta symbolis Lusitanicis insignita. Cœpta est obsidio ad 10. Cal. Februarii, soluta octauo Cal. Aprilis, anno huius seculi nonagesimo sexto. Peguanas partes adiuuabant Lusitani sexaginta, Turcæ viginti, qui nisi fuissent, proculdubio Sionius arcem cepisset. Soluendę obsidionis causa fuit rumor temere sparsus, Lusitanos per viam Cambogiæ manu armata Sionis regnum ingressos. non temere dictum Sionius putabat, inaudierat enim Proregem Albuquerque Pegusiis auxilia missurū. Quare veritus ne dum aliena appetebat, amitteret sua, collegit vasa, & ad sua regna reuersus est.

Post Sionii discessum, cum ciuitas ingenti fame laboraret, ineunte hyeme Langioenses, Sionij, Peguani, Bramenses, & Rex Tanguanus relicta vrbe fugerūt, & ad suos lares reuersi sunt: manserunt admodum

pauci, atque ij commeatu à Tanguano regno importato viuebant. Missis itaque literis ad Tanguanum, imperat Rex, vt annonam omnem, & messem, quæ per eos dies colligebatur, nauigiis impositam ad urbem mitteret: ipse relicta domi vxore, & paucis viris in præsidium ciuitatis & arcis cum reliquis omnibus incolis confestim adesset. Rescribit Tanguanus, iniquum videri, ciuitatem & arcem annona priuare; iniquum etiam, venire se cum omni populo: dimidium commeatum, & populi mediam partem libenter misurum: se quoque aut filium, alterutro domi relicto, ad Regem venturum. Cum sæpe Tanguanus in hanc sententiam respondisset, iratus Rex quatuor viros primarios cum milite ad eum mittit; his mandat, vt totam annonam & ipsum Regem adducant: ni pareat, vim inferant. Tanguanus hoc cognito mature præueniendum ratus, quatuor viros à Rege missos obtruncat; milites & nauigia in potestatem redigit: tum edicto publico cauet, ne quis ad urbem redeat, aut eam commeatu iuuet. Per hos dies annonæ pretium in immensum creuit, & Pegusii de nocte per urbem grassan-

grassantes, se mutuo mactabant, & carnibus humanis vescabantur. Hoc perspecto, Rex vniuersum populum iubet recenserī; catalogo facto, in primis Sionios ad septem millia iubet occidi. Tum reliquis annonæ certam quantitatem vititim distribuit. Sioniis extinctis, in vrbe non amplius triginta millia, omnium ætatum, atque vtriusque sexus restare compertum est.

Antequam ad reliqua pergamus, regni Promani ruinam, quæ per hoc tempus incidit, paucis perstringam. Rex Promanus, filius Bramæ, natu minor, cuius modo meminimus, postquam totum triennium aduersus patrem in armis constitisset, pœnitens facti, per legatos veniam petit, adeundi facultatem flagitat, & secum è regno Promano omnes incolas, qui quinquaginta millia erant, ad urbem traducturum promittit. Hoc nuntio lætus Rex, sibi paululum respirare visus est, & filio resipiscenti ingentia misit munera, delicti copiam fecit, & diplomate publico factum confirmat. Adolescens dum reditum adornat, senex eius educator & altor, atque huius defectionis auctor.

veritus ne Bramà cum filio redeunte in gratiam, in ipsius, ut aiunt, caput hæc faba cuderetur, eum veneno sustulit. Hunc vicissim proceres ad regnum adspirantem post septimum diem è medio tollunt: atque hoc modo octonis quibusque diebus è Dynastis alii, atque alii inter se mutuo de imperio decertantes, cadebant. Quo intestino bello factum est, ut bimestri spatio è quinquaginta millibus, vix quinquaginta viri bello idonei superfuerint: atque hi demum in nauigiis terni & quaterni impositi, & ad urbem Peguanam delati, Promanum regnum omnino desertum, feris habitandum reliquerunt.

His diuturnis præliis tam domesticis, quam externis Pegusij licet valde imminuti sint, non tamen ita omnino extincti sunt, ut multi non supersint, qui fuga sibi consulentes in alia regna transfugerunt. Numerantur in regno Iangomèsi ad centum & viginti millia, partim Pegusij, partim Bramenses; in regno Oracano viginti millia; in Sione, & regionibus superioribus, centum millia. Rex Iangomæ trecenta & quinquaginta millia numerat, imo

imo & decies centena millia si voluerit, armare posse affirmant.

Dum regnum Pegù his tempestatibus iactabatur, Talapoi Bramæ tyrannidem exosi Iangomenfi Dynastæ Regis fratri, auctores fuerunt, vt regnum Peguanum sibi vsurparet. Ille se religione prohiberi aiebat, adstrictum videlicet iureiurando, quod pater ab vtroque filio viuens exegerat. Contra Talapoi instant, nullo sacramento teneri, quo minus fratre deposito, sibi sceptrum assumat, hac tamen lege atque omine, vt fratrem in Vahat, id est, aureo folio collocatum, populo pro Deo adorandum proponat. Vicit hæc sententia, atque omnem scrupulum exemit. Exco-gitata est etiã alia ratio, qua Regulus non solum sibi persuadet, sed & serio iactat, se heredem regni legitimum, & fratri omnino præferendum: primum, quia fratrem maiorem genuit Rex adhuc priuatus, ipsum vero dum regnabat: deinde, quia mater ipsius filia est Regis Peguani antiqui, qui adhuc viuit, cui nomen Naichimo, mater vero Regis nullo regali sanguine illustratur.

Huius regis thesaurus immēsus esse creditur,

ditur, quem ne quis proderet, ducentos eunuchos, qui ipsi ministrabant, è medio tollendos curauit. Sunt qui affirmant, huius patrem trecentas sexaginta sex combalengas (genus est cucurbitæ rotundæ, ac prægrandis) ex auro fuisse, quarum singulæ centum octoginta auri pondo habebant. Hæ ubi sint repositæ nemo scit, tamen intra urbem esse certo constat. Hic etiam sexaginta septem inanum Deorum statuas ex auro fusiles fecit, omni gemmarum, & vnionum genere ornatas. Habet præterea quatuor armamentaria cum ingenti apparatu tormentorum, plumbi, & æris Cyprii, quorum pondus vix æstimari potest. Atque hic erat regni Peguani status, ad vnā tantum ciuitatem redacti, eamque pene funditus eversam, & noua obsidione à Mogo Rege Oracani, de integro afflictam.

Quare ego cum de omni spe missionis Peguanæ decidissem, rursus huius damni reparandi fiducia, ad missionem Vissanagoranam animum appuli. Ab oppido S. Thomæ cum fociis discessi non sine magno desiderio locorum & monumentorum insignium, quibus passim gloriosus Christi

Christi Apostolus hanc regionem illustravit. Claret in primis Ecclesia Metropolitana, Apostoli sepulchro: claret Mons parvus eius domicilio : claret Mons magnus ipsius martyrio, & crucis, quæ adhuc exstat, insigni miraculo : ab his monumentis ægrè diuulsi, iter prosequimur. In via inopinato incidimus in gentilem, qui nos non mediocriter recreavit. Erat is ætate prouectior, aspectu grauis, ex colloquio videbatur prudens & catus. Vitæ instituto miles erat, secta Permalis, vt ex cinere coniecimus, quem frōte ostentabat. Hic facile concessit ethnicorum simulacra non esse adoranda, vnum esse Deum cœli, & terræ conditorem. Et cum paulo altiore sermone ad diuina Christi mysteria ventum esset, ille repentino impulsu concussus. Quid est hoc (inquit) quod patior Patres? ad singula verba, toto corpore, atque omnibus artubus contremisco, comæ etiam arrectæ, vox hæret faucibus. Quærenti deinde, quando, & quo loco de his plenius instrui liceret, Nagapattani respondimus licere. Promisit se venturum, & deinceps, relictis inanum Deorum simulacris, vnum Deum verum

veneraturum. His ego auditis, quando (inquam) Deus tibi hanc mentem, & intelligentiã concessit, nobis gratissimum feceris, si antequam discedamus (eramus autem sub arbore vmbrosa, meridiano feruore) cinerem istum, quo frontem signatã geris, excusseris, & penitus aboleris. Quid, inquit ille, momenti in cinere est? res est penitus extrinseca, tum nos quantũ interesset, similitudine quadam ostendimus, ille victus dat manus, paulisper recedit, & sub nostrum discessum rediens, cinere iam prorsus ablato, cum discedentes videret, ita ingemuit, tamquam qui sciret; quantum bonum inopinato repertum tam repente amitteret: denique tam familiariter, & tãta amoris significatione, abeuntibus vale dixit, ac si a multo tempore cognouisset. Fieri non potuit, vt (quod maxime cupiebamus) vna nobiscum proficisceretur, coniugatus enim erat, & tam repente se expedire, & in viam dare non potuit. speramus fore, vt Deus pro sua infinita clementia, & hunc & alios multos, quos ab illis tenebris ad æternæ vitæ lumẽ vocare destinauit, suo tempore suauiter ad se trahat.

Ad urbem Gingi peruenimus, vbi Nai-
chus residet, vt promissum, quod ipse à
nobis Cidambarani flagitauerat, imple-
remus. Ciuitas est omniū maxima, quas
in India vidimus; si cum Lusitanicis con-
feratur, vni Olyssipponi cedit. In medio
urbis arx est, quæ etiam ciuitatis instar,
muris altis, lapidibus magnis affabre se-
ctis cingitur, & fossa aquæ plena circū al-
luitur. Intra arcem rupes prærupta, saxi
prominentibus in altū erigitur. hanc na-
tura bene munitam ars inexpugnabilem
reddidit, saxo continuo in turre, & pro-
pugnacula formato, & exculpto. Idolo-
rum templa per totam ciuitatem & arcē
disposita. Ædes habet non admodū pul-
chras, præter paucas, quæ ad Principes, &
primarios ciuitatis pertinent: in quibus i-
psius Regis duo palatia maxime elucent,
barbarico quodam apparatu, qui atrio-
rum, turrium, & pergularum magnificen-
tia constat. In his aliquot arcus, & forni-
ces vidimus è ligno odorifero, quod Lu-
sitani Sandalum vocant. Primæ noctis
quieti locū elegimus, in quo nos ipsa nox
occupauerat: atrium erat illud amplum,
& spatiosum; at hominum ingens con-
cursus,

curfus, camelorum, & elephantorum perpetui transitus fomnum omnino prohibebant.

Mane palatium petimus. dum in turba expectamus, Naichus pedibus fanum petit, quod quotidiano in more habere dicebant. nos vbi videt, hilari vultu, Mox, inquit, reuertar. post paululum rediens, iubet introduci, palatium, gazam, supellectilem pretiosam ostendit. Vidimus lectum aureum, lectulos aliquot argenteos, hydrias magnas partim aureas, partim argenteas : duas hydrias aureas mediocris magnitudinis, quas è ministris aliquis in humeris ligneo crate baiulabat aqua plenas, quam Regi foris deambulanti, bibendam promebat. Harum & materiam, & vsum merito prætulimus aliis hydriis, quas in palatio vidimus in humeris cuiusdam Ioguis, qui nuper à Bengala terrestri via reuersus, Gangeticam aquã palatinis officiis distribuebat. Ferebantur hydriæ pannis immundis, & vilibus inuolutæ, quas illo ornatu tanquam vasa sacra exosculabantur. Harum similes multas in peristylo palatii à laqueari inaurato pendentes vidimus. Naichus nobis in arcis quo-

dam propugnaculo hospitium parari iussit : at nos ad lucum coacti confugimus, licet idolo sacrum, propter calores, qui tum maxime sæuiebant: quos tamen sub dio in atrio palatii loques, in ardentissimo sole tolerando, summæ patientiæ estimationem captabant; meridianos tantum calores aliquando, licet rarissime, suspensio subtili velo arcebant. Nihil est istis loquibus laudis auidius. Vnum vidimus, qui cauea ferrea inclusus, cui tanquã perpetuo carceri sese addixerat, exertis pedibus, & capite ita ambulabat, vt nec sedere vnquam, nec procumbere posset. à lateribus caueæ, centum lampades prominebant, quas loques quatuor, huius comites, statis temporibus accendebant. Ambulabat ille gloriabundus, ac lætus, tanquam qui suo splendore mundum illuminaret.

Sequenti die interiora arcis ostēdi placuit. In primo ingressu tormentorum explosione, tubarum sonitu, & sciomachia militari fumus excepti. Quod ad reliqua attinet, quicquid ad arcem, penitus inexpugnabilem requiritur, in hanc vnā collatum esse videtur. Ex omni parte inaccessi-

E

cessi-

cessibilis, portis tantum patet, quas tamen vigiles perpetua custodia seruant. Muri alti lapidibus quadratis totam cingunt. In media exstat area, in qua hortus, & Præfecti domus, & horrea commeatu referta. Tyrones in atrio concurrentes certaminibus ludicris militariter exercentur. In locis eminentibus, arma, puluis tormentarius, incendiariæ ollæ, plumbeæ & ferreæ glâdes asseruantur. Inferius sub rupe excauata fons est pereñis, profundus, limpidissimis aquis sub fornice scaturiens. In hoc præsidio Naichus, iubente patruo, mortuo patre, custodię traditus est. At à suis liberatus patrum eodem coniecit: quẽ erutis oculis perpetuo carceri tradere, quam occidere maluit. Ab arce ad Regiã equo insidens Naichus, mille armatis comitantibus, nos deduxit. In platea stabant longa serie, hinc, inde dispositi trecenti elephantes, tanquam ad bellum instructi, omnes auersis ad parietem tergis, & versa ad plateam proboscide. hac de industria sumus deducti, vt huius magnifici spectaculi oculati testes essemus. In regiæ vestibulo stabat quidam tanquam orator, veste purpurea, qui Nai-
chi

chi laudes decantabat. quod aiunt in more positum, quotiescunq; solenni pompa comitatus Naichus, se in palatiū recipit. Noluit ibi morasnectere, sed illico ingressus nos dimisit, quia instabat nox.

Die tertia aliud præsidium visimus extra ciuitatem, de quo eadem pene dici possunt, quæ de priore. Hic in præcipui honoris, & beneuolentię signū, nobis ipse suis manibus tradidit Naichus fasciculum florum, quem gestabat. Erat fasciculus ad sceptri similitudinem compositus, tribus cōstabat angulis; in summo tria poma aurea fulgebant. Hoc insigne solent gestare Naichi, quoties ciuitatem, vel regionē obequitant. Quam eximii honoris speciem cum nobis deferri viderent, summa fuit omnium admiratio. Præfectus arcis duos pannos bombycinos ingredienti obtulit. horum alterum nobis dedit, alterum misit filio Cholgana. Est autem Cholgana ex præcipuis proceribus, is qui præsidio præest in portu illo, quo Naichus nouam ciuitatem condere cœperat. Huius filius, qui quartum decimum ætatis annum vix impleuerat, multis viris primariis, & grauib; in palatio comitatus incedebat,

à Chistapanaicho (hoc Naicho nomen est) magnopere contendebat, vt ipsi suum nomen imponeret, vt sellam gestatoriam inauratam , & terras aliquot largiretur. Hic tanto nostros Patres amore, & beneuolentia cōplexus est, ac si esset Christianus, non gentilis; non Badagà, sed Lusitanus. Faxit Deus , vt Patres , quos in suis terris vicinos habebit , ita amet, vt aliquando ex Chistapanaicho (quod nomen tanta ambitione quærit) Christianus euadat.

Quarta die proficiscendi facultatem petimus. ostendit tunc quoque familiariter Naichus auri , & lapidum pretiosorum copiam non paruam. Nostris facultatem dedit residendi in noua ciuitate, cui Chistapatamæ nomen indidit, ibique Ecclesiam ædificandi : qui velint Christo nomen dare , id licitè posse concessit, retento nihilominus pristinæ cuiusuis dignitatis aut facultatis gradu. Sacerdoti illius Ecclesiæ curam suscepturo , ducentos aureos assignauit in alimenta. Atque hæc omnia litteris patentibus , duabus linguis Tamulana & Badagana conscriptis , addito regio sigillo con-

lo confirmauit. Dicebat fore sibi gratum si in itinere ciuitatem illam nouam uisiteremus. Ex aulicis quendam tanquam viæ ducem dedit, scriptis litteris ad Cholgana, patrem pueri, cuius ante memini, ut res nostras sibi commendatas haberet. Ab hoc tanquam vicino, & potenti, huius nouæ Residentiæ successus totus dependet.

Hæc facta sunt in frequenti ducum, & procerum confessu, qui Regi assidebant. Cæterum stantibus sedebat inter primos filius Cholgana. à Rege petimus, ut huic patris loco, & nomine nos commendaret. Naichus adolescente ad se uocato. Hos, inquit, tibi tanquam patris tui personam gerenti, commendo, & in manus trado; ut in regionem illam libere intrare, & tuto versari possint. Gratissima fuit adolescenti, & eius amicis officiosa Regis commendatio, & honorifica mentio. Qua de re datis ad patrem litteris, vehementer rogauit, ut si nostri illac iter facerent, hanc Naichi commendationem ipsi fuisse gratissimam intelligerent.

Ab vrbe Gingiana discessimus leti perspecta procerum, & plebis ad agnoscendam

dam veritatem propensa voluntate. At vero cum terras illas festinanter, non tam concionandi, quam explorandi studio lustraremus, quæ ad ethnicorum conuersionem spectabant, quasi obiter, & tanquam aliud agentes tractauimus, ne videlicet officio visitandi fratres, quod maxime nobis incumbebat, vlllo modo deesse videremur. Accidit autem non semel, vt dum in palatii vestibulo adeūdi Regis opportunitatem expectabamus, cum iis, qui concurrebant, de rebus diuinis verba faceremus. Atq; hoc ideo commodius præstare licuit, quod optimo vtebamur interprete, qui linguæ Tamulanæ pariter, & Badaganæ peritissimus habebatur. In his colloquiis nonnullos admiratione tanquam attonitos, & ab interpretis ore quasi pendentes vidimus, qui multo plura libenter audiuiſſent, nisi tempore & loco fuissent exclusi. Per idem tempus Brachmana quidam cum videret locum multitudine refertum, Nō est, inquit, hic locus ad hæc agēda satis accommodatus, ad vestrum diuerſoriū ibo, vt hæc plenius percipiam: sed & diuerſorium erat, in tam aperto & propatulo loco, vt vel ipsi elephan-

phantes à meridianis caloribus ad eius umbram confugerēt. Vidit nos in palatio adolescens quidā septendecim annos natus, quem dicunt de stirpe regia oriundum. Hic ad fidem Christianam animum adiecit, & nobiscum abeundi studio vehementer ardebat. Instante iam nostro discessu sub noctem, ad nos venit, & vni è nostris sociis sua cōsilia patefecit, certus relinquere domū, parentes, & sponsam. Res nobis visa est plena periculi, & Dæmonis quoddam inuentum suspicati sumus, atq; eo tendere, vt excitatis in vrbe tragœdiis lex diuina odiosa redderetur, cuius promulgandæ libertas eodem ipso die fuerat concessa. Quare adolescenti suafimus, vt vbi commode posset ad Patres, qui Negapatani erant, se conferret, atq; illorum dictu, ac suasu se Regi sineret: & nos iter persequentes Cidambaranum redimus.

In medio itinere in quendam vicum Brachmanum, & sacrificulorū gentilium incidimus. Illi frequentes circumstare, nos de rebus diuinis sermonem habere cœpimus. Totius negotij arbitrium tandē referunt ad sapientē, quem propè habitare aiebant: accedere iubetur. adest. interro-

gat Pater, quot Deos coleret, Multos, inquit ille, & singulorum nomina recenset. Ex his omnibus, inquit P. quis primum, & præcipuum locum obtinet? cum illo enim res agitur. Sol (inquit Brachmana) meo quidem iudicio omnium maximus est. Solem igitur quis fecit, ediffere nobis, an forte à seipso potius factum contendis? perspectis ille incommodis, quibus vrgebatur, si concederet solem à se factum, ab alio factum, concessit, & patrem habere, ac matrem. at quos tandem? quo nomine? patris nomen profert, cum vellet nominare matrem, hæsitavit. Brachmanes interea stomachari, cur, inquit, matrem habere asseris, si quæ sit, ignoras? Agedum, inquit Pater, sit illi pater, accipio, nil moror: sunt ergo duo Soles, Sol pater, & Sol filius. illo pernegante, Probo, inquit, qui generat hominem, nonne homo est? maxime. Qui equum generat, nonne est equus? Est, inquit: elephantem qui gignit, nonne est elephas? omnino, inquit. Ergo pari ratione si Soli pater est, erit & ipse Sol, & sic duo erunt Soles. Ad hæc ille, Nequaquam: Sol enim in principio non erat Sol, sed homo sanctus, qui
suis

uis meritis , & in præmium obsequii factus est Sol. Qui igitur Solem hunc tanto præmio affecit, ipso Sole superior fuit, an inferior? Superior, inquit, Recte fane; qui enim alteri præmium obsequii præstat, necesse est, ut maior sit illo, cui præstat obsequium: quemadmodum Naichus, qui armilla aurea militem donat, præstantior est milite, qui sub illo meruit. Illo annuente, conclusum est, esse iam alium Deum Sole maiorem. Quod cum non negaret, licet prius contrarium dixisset, censuit tamen magnam illam Deorum multitudinem non esse admittendam; tres tantum esse Deos, nimirum Pyramam, Vidhunum, & Vnitirem; horum officia ita esse comparata, ut alter faciat, alter destruat, alter conseruet. Hæc impossibilia esse demonstratum est. Ille victus, deinde quibusdam quæstionibus implicitus, quis esset Deus, qui Angeli, qui dæmones, nescire se ingenue fassus est. Scitote igitur, inquit Pater, vnum esse Deum, æternum, immensum, omnipotentem, cœli ac terræ conditorem, qui Solem sublimem in cœlo creauit, quo tanquam lychnucho, aut face mundus il-

luminaretur: Angelos esse spiritus quosdam, qui nostri curam, & tutelam gerunt, & tacita quadam suggestionem mentem ad meliora vocant: Dæmones Angelos esse malos, qui vos in fraudem illiciunt, & debitum vero Deo cultum & honorem, sibi ipsis per summum scelus arrogant. Hinc prouenit nefandus idolorum cultus, Dæmonum adoratio, hinc tot ac tam diuersa in orbe terrarum inanium Deorū profana templa, impia simulachra. Atq; hac arrepta occasione altius rem repetens Pater, originē mundi, Angelorum & primi hominis creationem, & mox lapsum principium idem idololatriæ, salutem demum à Christo Domino reparatam narrauit. His ille auditis vehementer admirans, Nunquam, inquit, hæc, aut his similia audiui-mus: at sane vera sunt. Alius Brachmana suspirans dixit, O felicem, qui hæc bene perciperet. Cui nos, Quid? si hæc non breuiter ac festinanter dicta, sed diligen-ter & serio tractata audiretis? In præsentia Ecclesiæ sanctæ modulos quosdā, & ima-ginem externam veluti carbone raptim delineauimus. Quid si ipsam sua virtute fulgentem, quid si speciem internam, & immen-

immenſam pulchritudinē oculis contueremini? quanta lētitia, & voluptate afflueretis? Veniet actutum ſacerdos Chiſtapa-tanam, huic ſi voletis adhibere aures, ſi fidem habere, ille vobis veritatis hactenus incognitæ lumen oftendet, & ad æternæ ſalutis ſemitam manu ducet. Hæc vbi dicta, illinc digreſſi ad locum ciuitatis nouæ peruenimus.

Sita eſt hæc ciuitas in terra, quæ dicitur Arungor, iuxta oſtium fluuii Velarii. Gentiles in illa permulti domibus ædificandis operam dabant, quibus data facultas ad libitum aream eligendi, & extra oppidum tantum fundi, quantum quis arare & ſerere poſſet. Locum Eccleſiæ & domui ædificandæ ſignatum reliquimus. Patrem Alexandrum Leni prudentia, linguæ peritia, zelo, & exemplo ſingulari, virum, ab ora Trauācoriana poſtea miſimus, vt huic nouo incœpto primam manum imponeret. Petierat hic antea, vt ſibi liceret in habitu Ioguis totam illam terrā obire: ſperabat. n. fore, vt hoc artificio Chriſtianæ fidei ſemina in vulgū ſparſa, nō pœnitēdos fructus aliquādo redderent. At cū hac ſingulari, & inexpectata occaſione ſuis votis ſatis-

satisfactum videret, à lacrymis præ gaudio erumpentibus sibi temperare non potuit.

Perlustrato hoc loco, inde ad Colorem flumen venimus. Dynastam Cholganam visitauimus, octogenariū senem, quem incolæ valde timent: nam iniuria laceffitus nemini parcit; quo fit, vt & ipse sibi timeat, & arcem, & loca vicina ad aliquot milliaria intentis vigiliis custodita seruet. Ac ne hostes facile fluuium, qui arcem præterlabitur traicerent, crocodilos iniecit, dato præcepto, ne suorum quemquam læderent. At illi hoc præcepto nihilo mitiores facti, hominem deuorant. Iratus Cholgana, nescio qua industria, seu veneficiis (vt creditur) duos crocodilos, qui hominem occiderant, captos, & iniectis collo ferreis catenis, in stagnum lutulentum præcipitauit, vt à populo prætereunte, lapidibus, probris, & conuiciis fatigati, fame perirent. Ex his vnum ipsi vidimus. Senex multa cum humanitate nos excepit. Mox litteras Nai-chi, & filii, quas ei reddidimus, publice legi præcepit: filius honorem, quem sibi Rex nostra causa detulerat, exaggerauit.

Post-

Postquam omnia senex, quæ ad corporis curam pertinebant, affatim præstitisset, profecturis comites assignauit, quorum cura ab omni molestia liberi, ciuitatem Trangambaranum attigimus. Illius vrbs ciues quidam Christiani, oriundi ex Piscaria, nos inuitarunt perhumaniter, & Negapatenum vsque profecuti sunt.

Ingenti gaudio nos hic affecit illorum incolarum propensa in Societatem voluntas, quæ res spem non dubiam fecit, fore vt huius Seminarii fœcunda germina aliquando ad vicinas regiones propagentur. Hic paucis diebus quieti datis, postea Tanjaorem contendimus. Est hæc ciuitas Naichi Tanjaorani sedes, mœnia habet lapide quadrato structa. Regem non visitauimus, nec enim erat operæ pretiū: recens enim mundo nuntium remiserat, & nihil hoc tempore nisi mortem meditabatur. Idem faciebant vxores ad septuaginta, quæ viuæ flammis, quibus se deuouerant, cum cōiugis cadauere erant concremandæ. In hunc diem Rex aureorum quinque millia in sandalum coëmendum profuderat.

Ad terras Naichi Madureni deuenimus.

mus. Hic est, qui oræ Piscariæ præsidet, & aliis regnis nonnullis. Quam ob causam, & maxime propter Ecclesiam, quam in eius vrbe regia habemus; visum est eum visitare: multum enim nostra intererat, consuetudine, & familiaritate nostrorū paulatim hominem allicere, vt rei Christianæ negotia, quæ ante hac per gentiles tractauimus, per nos ipsi deinceps tractare possemus. Ad limites huius regni opportune se nobis obtulit P. Consalvus Fernandus, qui ab vrbe Madurè, & à Rege venerat, eius diplomate bene munitus, quo freti totam illam terram nullis molestiis obnoxij transiimus.

Est Madurè vrbs aliis duabus, quas supra descripsimus, nequaquam inferior. In ea domum habemus, & Ecclesiā, minime quidem sumptuosam illam, ne pinnaculis, & turribus inauratis cum illius regionis idolorum templis conferendam: at certe pulchram, & religionis plenam. Postera luce Naichum visitauimus, is ex morbo, in quem in Trauancoris ora inciderat, vix dum conualescēs, recessum suburbanum, amœnum, ab hominum frequentia separatum sibi delegerat: minime tamen solitarium

tarium inuenimus, imo salutantiū, & comitantium non exigua turba impeditum. Huius solitudinis alij aliam causam afferebant. Regiæ urbanæ idolum quoddam contiguum est, cui nomen Chochanadæ. Huius imago de nocte sacrificulo apparens, ita dixisse fertur, Vade, dic Regi, aut illi, aut mihi in hac domo manendum. Rex ut est superstitiosus, Chochanadæ domum concedens, in suburbanas ædes se contulit. Fuimus ab illo beneuolè, & humaniter accepti. Singulis pannos pretiosos (incolæ pachualones appellant) impertiuit, insuper & tiaram suam dedit; atque de rebus omnibus ad victum necessariis domui nostræ per illos dies abunde ab eo prouisum est.

Dici vix potest, quanta Rex iste, Deorum falsorū inani religione teneatur. Vno exemplo res fiet illustrior. Singulis diebus populo ius dicit, etiam ægrotus. Ius dicenti, & quantūuis seria negotia tractanti, adstat Brachmana, qui ad singula pene momēta modicis quibusdam interuallis, fracta & flebili voce nomē idoli Aranganassē, ei ad aures suggerit: atq; hoc tanta perseverantia, ut vni fesso, succedat alter, etiam si Rex

si Rex ad quinque vel sex horas pro tribunali sedeat.

In ædibus nostris non raro de religione Christiana sermo est habitus, Brachmanis ad nos, vel amore, vel nouo audiendi studio confluentibus. Habet Pater, qui hic degit valetudinarium publicum fama notissimū, in quo pauperibus, omnia necessaria gratis ministrantur. Habet & ludum litterarium puerorum gentilium, qui legere & scribere discunt, præceptore Brachmana quodam, quem Deus ad veritatis cognitionem traduxit, adeo ut S. Baptisma suscipere in animum induxerit. Hic nos etiam nostro more præmia pro cuiusque meritis distribuimus. Quod ubi parentes cognouerunt, ingenti sunt affecti gaudio, & admiratione. Itaque nobis in dies magis beneuoli euadunt. Adueniet tempus (ut speramus) cum hi omnes Christiana sacra suscipient, atque ex hac diuini verbi semente, aliæ subinde, atque aliæ segetes ad messem inalbescent. Ad eam rem promouendam non parui momenti illud est, quod P. Nicolaus Leuatus, linguæ Tamulanæ studiosus auditor in concionatorem euasit, & vnà cum P.

Con-

Consaluo Fernando Piscariæ ora relicta, ad hanc vineam colendam accessit.

Ab vrbe Madurena Tutucurinum venimus exacto iam mense Iunio, postquam totum mensem itinere terrestri totum illum tractum perlustrauius. Iam tandem paulisper à labore quiescendum rati, partim lassitudine, atque ipsius aeris intemperie; partim ob aquas, quas passim parum dulces, & lutulentas bibimus, vno die omnes, qui quatuor eramus, & senex, noster interpretes in grauem morbum incidimus. Interpretem illico morbi vis absorpsit. Nos feбри diuturna iactati parum abfuit, quin omnes ad vnum moremur. Vnum illud male habebat, quod putabatur esse venenum. aliud maximum erat incommodum, quod neque medicum habuimus, nec infirmorum præfectum, qui morbi huius curandi gnarus esset. Patres sane, ac fratres magna frequentia accurrebant, inuigilabant, & fouebant omni genere caritatis. At nos Deus sanitati restituit nullo remedio humano fretos, præter stibii potionem, & venæ incisionem, sibi vnoquoq; remedium, & medicinam distante, quæ pro tempore opti-


F

ma vi-

ma videbatur. Patres enim qui in ora Piscariæ rei Christianæ operam nauant, prospera valetudine perpetua vtuntur: quinimo obseruatum est à nostris, qui hætenus apud illos è vita migrarunt, eos, vel hostium repentino incurfu, vel casu simili fuisse oppressos; morbo vero extinctum fere neminem. Tutucurini per illud tempus maximi sæueiebant calores, & venti admodum noxii omnia perflabant. Quare Punicalem etiam tum ægroti contendimus, eius regionis amœnitate, & cœli clementia paulatim conualuimus. & vix dum firma valetudine ora Piscariæ peragrata, ad oram Trauancoris euasimus, ad quam non immerito suspirabamus. Hic enim aliam faciem rerum inuenimus, à caloribus nempe translati ad pluuias, id est ab æstate ad hyemem; quam vtranque diuersam tempestatem montes Gatei, & Cori promontorium dirimunt, hoc pacto, vt hic vigente æstate, illic sæuiat hyems, & è contra. Colani vt vires reparauimus, Cocinum contendimus. Hic ego antequam penitus conualuissem, graui apostemate laborans, rursus decumbo. In illo dolore dies
trigin-

triginta altero semper latere iacens, cauteria, & incisiones perpeffus sum. Inter-
èa Goam remeandi necessitas, & curæ a-
nimum torquebant. necessario nauem
confcendi, cum adhuc intra cutem sub-
effct vulnus: demissis funibus in lectulo
iacentem nautæ in nauem sustulerunt.
Goam attigi ad 3. Cal. Decembr. post-
quam annum integrum (ni deessent duo
dies) à discessu expleueram.

Per hos dies in regno Vissanagoræ, seu
Bisnagà aperiebat Dominus magnum o-
stium fidei Christianæ amplificandæ. Mis-
sus est ad illa regna Pater Simon Sa, vt
Regis & Procerum conciliatis animis,
aditum quoquo modo aperiret. Huius
rei successus tum ex ipsius litteris tum ex
ipsa fama, quæ illico tanquam è Ciuitate
Regia in omnia loca permanauit, facile
fuit cognoscere. idem V.P. ex ipsarum
litterarum exemplo, quod hic
ap nam, plene in-
telliget.

*EXEMPLVM LITTERARVM P.**Simonis Saba vrbe S. Thomæ ad decimum Kalend. Decembris**1598.*

V O B V S tabellariis ad V. R. Cocini agentem, litteras dedi, ineunte nempe Augusto, & eodem exacto. In harum postremis scripsi, me tempestatem commodam expectare, Chatiuorum proficiscendi: in quo oppido Obo Regulus (qui ab incolis Oboragiu nuncupatur) vnus è præcipuis regni Bisnagensis proceribus, & Regis focer, me expectabat, & missis litteris (quas etiam ad V. R. misi) ad se euocabat. Sed cum per pluuias adhuc me in viam dare non possem, ad Obonem rescripsi, me, quam primum torrentes detumerent, affuturum. Has litteras Chatiuorum misi, ratus ibi esse Obonem Regulum (est enim Chatiuorum præcipuum Obonis domicilium, & sedes, in qua arcem, & præsidium validum habet) At ille Regis iussu, Chandegrinum profectus erat, Rex enim, seu potius Imperator (ita enim à suis appellatur, & ante aliquot an-

nos

nos more maiorum in vrbe Chandegrino imperialem coronam suscepit) Obonem accersiri iussit, vt anniuersariis sacrificiis Soli dicatis, cum reliquis illius imperii proceribus & Dynastis interesset. Festi dies sunt octo. Procedit Imperator apparatu regio, magno stipantium Procerum comitatu. Hostis Reipublicæ iudicatur, si quis tantæ solennitati aut non interfit, aut se subducatur. Missis in primis fortibus, diuinant, an sit illo anno futurum bellum, an pax. Sortes sunt sagittarum iactus. Primam sagittam Rex, deinde reliqui ordine in aerem iaculantur. Si qua sagitta arbori infixam guttulam rubeam eliciat, bellum portendi dicunt. guttam albam pacis omen esse volunt, & ipsi à bello abstinent. Sors hoc anno videtur accidisse ex animi sententia. Imperator enim Cangeuaram versus profectionem instituens, diuersoria certis interuallis in toto illo tractu præparari iussit. Post illos octo dies redditæ mihi sunt litteræ Obonis Reguli, Chandegrini datæ, vbi nunc Imperator est. Scripsit, se putasse me Chatiuèrum venturum, quod cum factum non esset, orauit vt Chandegrinum venirem.

Hac accepta epistola à Collegio S. Thomæ profectus sum sexto Idus Octobris, socio P. Francisco Ricio, qui Tamulanam linguam scit. Alium præterea interpretem adhibui, mercatorem Christianū genere Badagam, quem postea honesto loco Chandegrini natum accepi. Hic mihi tum in itinere, tum in vrbe magno adiumento fuit. Lente admodum iter faciebamus. Vbiq; valles profundæ, torrentes rapidi, campi stagnantes effusis paludibus transitum prohibebāt. Inter hæc fragosi montes, saxis obruptis attollebantur, qui nemoribus inuiis altissimo cacumine viam obstruebant. Populus plerunque in vallibus amplis, & amœnis habitat, agricolæ solo fertili gaudent; armenta lætis pascuis luxuriant; magna ibi templorum, & idolorum multitudo. Incolæ vbi nos videbant, obstupere, concurrere, vultum, vestitum nouorum hominū eminus contemplari. nobis vocantibus, vultuque & sermone blando saluantibus, statim aderant: gaudebant, de Deo colloquentes libenter audiebant: quæ in suæ sectæ detestationem obiter à nobis dicebantur, non ægre ferebant. Alij alios alliciebant, Venite,

nite, inquit, audite magna quædam, & inaudita, quæ nobis proferunt hi. Alij scientes nos à Rege accitos, ideo accersiti aiebant, ut terra nobis traderetur, atque eam rem sibi nō molestant fore significabant. Ad radices cuiusdam montis paululum à via publica declinātes, instante nocte substitimus, adest rusticus, benigne salutatur, domum inuitatur, & ut patientior esset aditus, ablato ostio parietē aperuit; deinde maximo amore, & obseruantia petiit, ut sibi liceret bona cū venia nobis cœnam parare: nobis annuentibus valde gauisus est. Postera luce orauit, ut in reditu ad domū suam diuertere dignaremur. Hoc ipso in loco vidimus gētiles quosdam, in idoli vestibulo hædos immolantes. nos factum improbamus: iniuriam vero Deo illatam à sacrificulis, & plebe expostulamus. Docemus, quis sit ille Deus verus, ab omnibus iure colendus, & timendus, cui soli sacrificium debeatur. Illi cum nescirēt quid responderent, fassi sunt esse vera, quæ à nobis dicerētur; se vero ita esse instructos à suis Brachmanis, quos sacerdotes, & sacrificiorum magistros haberent. Nec defuerunt gentiles, qui dicerent, se libenter

nobiscum ad S. Thomæ ituros. quibus respondimus, fore propediem, ut sacerdotes ad ipsorum terras venirent, Ecclesias ædificaturi. quibus illi auditis minus ægre discessum nostrum tulerunt. Terra pro maiore parte fluminibus & riuulis scatet, plurimas habet valles, sylvis felicissimis, & omnium generum arboribus viridantes. Hinc inde montes ac cliues atolluntur. Gens optimo corporis, & oris habitu, vestitu non ineleganti, colore mediocriter albo. A rebus ad cultum diuinum pertinentibus, nō abhorrent, ut valde dolendum sit, tot, & tales animas sacerdotum inopia perire. Ventum est ad regionem, in qua late dominabatur potens quidam Dynasta, nomine Papàragiu, id est Papus Regulus. Ibi forte in ripa fluminis sub arbore cōsedimus. quo multi quoque gentiles confluxerant, coquod in subuicinis locis alimenta venalia proponebantur: nec longe erat domus quædam ampla illius Dynastæ, in qua ipse quotidie trecentos Brachmanas alebat, & peregrinos suscipiebat, qui ad idolum in illa regione celeberrimum, cui nomen Tripiti, religionis ergo contendebant,

bant, aut illinc domum reuertebantur. Templum illud in monte situm est, non amplius tribus milliaribus Chandegri-
no distans. Huc vicinæ gentes magna
frequentia confluunt, munera quam plu-
rima offerunt, inter eundem nomen ido-
li Goia perpetuo repetunt: idem respon-
dent omnes clamore quodam nautico
nomen ingeminantes. Cum veniunt ad
templum, antequã ingrediantur, Brach-
manarum monitu peccata purgant, id
est, barbam & capillos abradunt, & cor-
pus lauant. Dùm in illa ripa, cuius modo
memini, moram aliquantisper facimus,
accedit puer tredecim annorũ cum ma-
gno elephantorũ, & equitum comita-
tu. is erat nepos Obonis Reguli, qui vbi
nos vidit, magna comitate accurrit, ad-
uentum nostrum auo suo gratissimum
fore significauit. Postea à nobis digres-
sus ad suos, dolenter conquestus esse
dicitur, quod nihil haberet in promptu,
quo homines virtute præstantes, dignita-
te Gurupos (quo nomine sacerdotes lit-
teratos appellant) pro tempore posset
honorare. In tota illa regione sicubi flu-
mina erant traicienda, prolatis litteris

Obonis, omnes demisso capite, dicto audientes, liberum transitum præbuerunt. Quod ni facerent (qua erat ille potentia) se morte multandos certo sciebāt. Vbi ad tria milliaria prope Chandegrinum ventum est, misimus, qui Obonem de nostro aduentu certiozem faceret. Is hoc cognito. vesperi ad hospitium longe à ciuitatis arce, deduci iubet. Erat illud, palatium quoddam Regium, inauratum opere magnifico, cum amplo, & perpulchro peristilo exstructum. Postero mane nobis per internuntios verbis honorificis aduentum gratulatus est. Virum primarium ad nos misit, qui ingenti apparatu ad urbem deduceret. Ibat hic multis Ducibus & Reguli familiaribus stipatus, vexillis, & insignibus militaribus conspicuus: addo elephantes, equites, & pedites quamplurimos. Hoc apparatu, & pompa incedens, me semper manu tenebat: vtrumque ferebant baiuli singulis tetraphoris: pone sequebatur in alio tetraphoro P. Franciscus Ricius; huic adiunctus est interpretes quam ornatissimo vestitu. Post hos ferebatur munus Regulo offerendum. Singulos certis intervallis, incedere voluerunt, ut instructior, & magni-

magnificentior videretur ingredientium apparatus. Hoc ordine ab hesterno hospitio ad Reguli palatium, quod tria miliaria aberat, deducti sumus, in via tantus erat omnium ordinum, & ætatum cōcurfus, vt præcones, & lictores ad turbam amouendam non sufficerent. Dalauayus, id est Dux, inter eundum nihil fere aliud, quam crebro interrogare, an bene me haberem, an animo iucundo, & læto essem. Inter hæc mutui sermonis officia ad atrium palatii venimus. Exeunt obuiam primò iuuenes, qui mensæ operam dabant, & qui Betele uerbæ ministrandæ curam gerebant. Post hos alia, atque alia aulici ministerii officia, deinde magistratus, sequitur Regulus, crocino totus conspersus, amiculo bombycino indutus, altera manica exutus, quam sub brachio collectam gerebat, capillos rosis albis redimitus, latus accinctus ense falcato, vagina è serico viridi incluso. Post mutuas salutationes, munus præferimus, quod rebus variis de gentis more constabat. Ille singula accurate notabat, & etiam manum admouebat, maximè inter cetera arridebat cistella, vitrea è Lusitania,

nia, & poculum testaceum Billiganicum, aureis bracteolis obducto orificio. Hæc omnia cum aspexisset, de repente, nemine salutato, se è medio subduxit. Post paululum introduci iubet. Inuenimus sedentem in tapete, fulciebat à tergo puluinar sericum villosum rubri coloris, quod forma & magnitudine dolium referebat. nos ad latus in alio tapete iussi discumbimus. Locus erat vndequaque patens, tecto columnis suffulto. Post varios sermones Regulus omnia summa promittit, meum esse explorare, quo loco Ecclesiam, imo & oppidum, & portum ædificari vellem, se omnia largiturum, quæ ad operas conductas, & sacerdotum alimenta opus essent: neque in eo oppido quicquam, nisi de nostro arbitrio administratum velle. Cum gratias egissem, & me locum in itinere electurum, deque omnibus ipsum certiorum facturum dixissem, ipse vicissim munera nobis, & pueris distribuit: Sacerdotibus pannos bombycinos binos variis figuris inauratis, reliquis singulos. A pueris multa interrogauit, an ego illa veste, id est superpelliceo, & cappa candida damasce-na quotidiana vterer: illis negantibus, ego

ego huius rei rationem reddo, me nimirum illo die primum memet in conspectum, & colloquium dedisse Reguli præpotentis, qui pro singulari ipsius benevolentia Patres non solum in suâ Satrapiam euocauerit, illorum patrocinium suscepit, verum etiam in terris suis Ecclesias ædificandi potestatem fecerit: quapropter æquissimum visum esse, coram tanto, & tam benefico patrono, qui Ecclesiæ Christianæ ministros tantopere foueat, ipsius Ecclesiæ sacris vestibus indutum apparere. Quo ille responso valde lætus, Parua sunt hæc (inquit) præ iis, quæ faciam in posterum. Mox de nostra Republica Lusitanica multa percontari cœpit, quis regnaret, Hispanus an Lusitanus? quot equites Lusitania posset inducere in pugnam? an equi è Lusitania ad Indiam traduci possent? quot miliaribus distaret, quis pro Rege Indicam rempublicam administraret? an Prorex ad ipsum litteras esset daturus, sicut constat Proregem Edouardum Menesium ipsum litteris, & muneribus dignatum esse? Ego facile factu dixi, maxime vbi constabit, Ecclesias in eius ditione esse erectas. Gauisus est cum didicisset,

cisset, Proregem hunc esse illius Menesit generum. Hac ratione multis verbis vltro, citroq; habitis, sub noctem cum lych-nuchis, & parte exercitus ad hospitium remisit. Præcepit mercatori cuidam, vt oryzam, ciceres, butyrum, gallinas, & arietes in optonia suppeditaret. Die sabbathi per nuntios frequentes salutauit. Nuntio dixi, me in salutato Imperatore ex vrbe excedere, nec posse, nec debere: si id Reguli opera fieri posset, ad reliqua eius beneficia hunc quasi cumulum accessurum. Quæsiuit Regulus, an esset, quod offerrem. Respondi esse quidem, verum illud tam parui momēti, vt pro nihilo reputari possit: me verò ita affectum esse, vt existimarem Regiæ maiestati non vilia quælibet, sed quam pretiosissima dona esse offerenda. Quod ego cum præstare non possem, me satis officiose munere meo functum videri, si vnius, & veri Dei conditoris, & redemptoris thesauros reconditos, huius imperii mortalibus prodere incipiā. Respondit Regulus, Imperatorem ea benignitate esse, vt quantumuis tenue, & exile donum æqui boni consulere soleat. Quare in tertium diem paratos esse iubet. Sabbatho,

batho, & die Dominico, Duces, & Præfectos Obonis, officiis & munusculis placavi, vt facilius illis fauentibus ad Regis cōspectum, & gratiam viam munirem. Feria secunda mane Regulus nuntiari iubet, se ad Regiam præire, ibiq; nos præstolari. Quare vestibus quibus antea, & eodem apparatu Regem conuenire statui, Domus, atq; atx regia longe distabat ab ædibus Reguli. Vt eo peruenimus, iussit Rex in loco, Regū legatis excipiundis deputato, paulisper subsistere. Dum expectamus, ingens hominum multitudo vidēdi causa confluxerat. Nos per interpretem multa differrimus, errores detegimus, quibus miseri implicabantur. Illi non ægre ferre nō grauātē audire, aduentum nostrū sibi gratū esse non obscuris indiciis significare. Interim Rege iubente ingredimur. Sedebat Rex in peristylo angusto, q̄ ipsum solum capiebat, ad q̄ per gradus ascendebat. Tapetū humi stratum, & puluinar, cui incumbebat, ab Reguli apparatu non differēbat. Iuxta Regē in extrema ora tapetis sedebat Princeps, regni heres, iuuenis albo & decoro vultu. Ex alia parte ad latus iuxta tapetem sedebat Regulus cum fratre. Gerebat Rex amiculū croco infec-

tum,

Etum, vultu erat venusto ad nigredinem vergente, oculis magnis statura mediocri, corporis forma decora, in qua Regiæ maiestatis augusta quædam grauitas cū mira comitate elucebat. Rege de mora salutato, coram eo steti, vt cæteri Dynastæ & viri primarij, tam exigua interposita distantia, vt cum extrema veste nonnunquam tangerem. Rex se nostro aspectu non minus recreari dixit, quam mundus exorto sole, ac proinde multis honoribus, & muneribus cumulos dimissurum: ego quis essem ab Obone Regulo se cognouisse: Gratiis actis munuscula profero, quæ ille humaniter accepit. Inter quædam vitrea crepundia aureola, è Lusitania, cordis figuram filis aureis cōtextam obtuli. Quæsiuit Rex quid rei esset, an esset ad esum efficta? Respondi figurā esse cordis humani, ex auro & argento elaboratam. cor autē Regi deberi in signū synceri erga suam maiestatem amoris, & fidei. Ad hæc ille placido vultu, materna lingua inquit. Mahà Santo seam, Mahà Santo seam. id est. valde lætor. atque aliis donis nos vicissim donauit: mihi quatuor pannos bombycinos, Patri Francisco Ricio duos, tum pueris

pueris & interpretibus singulos. Tempus reliquum percontando consumpsit, quis nostræ vitæ esset status, quod institutum, qui cibi, quis vestitus quotidianus, an aliquando nudi incederemus? Ego ad hæc nos esse homines, obsequio diuino, & salutis proximorum procurandæ addictos, atq; hac de causa mundo nuncium remisisse, vt liberius & nostræ, & aliorum salutis & diuini verbi prædicationi vacaremus: vitam in pœnitentiis, & mortificationibus agere: vestibus pullis indui, nudos honestatis causa non incedere. Tunc ille, Sunt, inquit, nostrorum Sanassium similes, attamen Sanasses nostros hi superant in hoc, quòd sunt Gurùpi, id est, docti Sacerdotes. Sunt autem Sanasses apud illos Brachmanes quidam, qui in magna sanctitatis opinione habentur, quia scilicet ab hominum consortio remoti, in solitudine degunt, & nonnunquam ex omni parte nudi in publicum prodeunt. Interrogauit, an omnia promiscuè comedere-mus? gallinas, an ipsi occideremus, & quomodo? videlicet an cum cæremoniis, more Mahometanorum, an potius more Brachmanarum? deniq; an essemus con-

G

iuga-

iugati. Ad omnia cum esset satisfactum nostrorum continentiam vehementer admiratus, bis, terue idem rursus interrogauit. Respondi, Christianorum Sacerdotes per omnia Deum imitandum sibi proponere, vt sint mundi, puri, & sine labe, & macula, quo in ipsis Dei, & creatoris imago perfectius resplendeat. Ad hæc ille, Nonne igitur (inquit) vos met aquis abluitis, vt mundi, & sine peccato ad Deum accedatis, & cum eo familiarius agatis? Imo, inquam, nos alias lymphas habemus, ad peccata delenda magis accommodatas; nempe Baptismum in ipso aditu ad Ecclesiam, deinde peccatorum confessionem corde contrito factam Sacerdotibus, quibus Deus potestatem dedit suo nomine peccata dimittendi. His aquis, inquam id est, pœnitentia peccatorum, & vitæ in melius commutandæ proposito placatur Deus; non autem istis vestris lauacris, quæ nullam in se virtutem habent nihil salutis possunt conferre. Quærenti, an omnia peccata oporteat confiteri, respondi, nullum in confessione peccatum posse tegi, omnia Sacerdoti indicanda; hæc autem confessionem semel quotannis, & in-

& instante mortis periculo fieri oportere. Tunc ille ad suos conuersus, Eia Brachmanes, inquit, quid vobis videtur? Illi mirabundi nihil præter Suami, Suami. id est, Domine, Domine. Interroganti, an P. Riccius, & ego essemus fratres, & ex qua terra; respōdi, fratres esse, nō carne, sed spiritu, quos nempe eiusdem Religionis institutum, & mutui amoris vinculum fecit esse germanos: natione hunc Italum, me Lusitanū. Docuit interpretēs Olyssipponem esse ciuitatem regiam, non solum regni illius caput, sed etiam omnium ciuitatum maximā. Interrogauit, an Lusitani ciuitates, & arces, atq; eas in montibus sitas haberent perinde atq; ipsi? Respondit interpretēs, se Lusitaniam non vidisse: at cum rerum non esset ignarus, se certo scire, ciuitates habere, & arces munitissimas, quæ has omnes, & propugnaculis & pulchritudine longe superent. Cum in hanc sententiam multa dixisset, Magnum, inquit Rex, imperium, & magnum Regem narras. Quæsiuit tum quod esset Regi nomen, quotum annum regnaret? quot essent anni ex quo Rex ille (Sebastianum intelligebat) in bello periisset? Nos Re-

exceptus, pudore obmutuit, & ne hiscere quidem deinceps ausus est. Tandem Rex multa de Christianorum Regum potentia deque præliis, ac victoriis Imperatoris sciscitatus, reliqua cum Obone priuatim locutus est, Obo ad nos reuersus, dixit Regem duo oppida nobis donare, alterum in Sacerdotum alimenta, & Ecclesiæ fabricam; alterum in structuram Emporii, quod in illo oppido condere volebat: donare præterea tetraphorum auratum, quod optimatibus, & Gurupis concedi solet. Ecclesias, quas vellem in toto illo tractu erigendi facultatem dare. Atque hæc omnia Rex postea litteris patentibus, à se obsignatis confirmauit. Ego illi, & deinde Regi maximas gratias egi. Regi insuper dixi, quando ipsius munificentia mihi tantam fiduciam contulerit, si liceret, pauca quædam additurum. Primū vt gesta S. Thomæ Apostoli, quæ Cangeuerani in pagellis æreis asseruātur, liceret transcribere. Ecquis, inquit Rex, vobis dixit, hæc gesta in nostris monumentis haberi? Ita, inquam, à maioribus accepimus. Nihil autem ex his monumētis desiderio præter vitam, & gesta S. Thomæ:

hoc si impetrauero, & Regib. Christianis omnibus, & Imperatori, & Pontifici Maximo erit gratissimū. Quid (inquit Rex) an plures sunt Reges Christiani? Interpreter ordinem & seriem Regum Christianorū, & supremam dignitatem tū Imperatoris, tū Pontificis Maximi fuse explicauit. Rex audita Papæ potestate, obstupuit, valde admirans, esse in terris hominem tanta potestate præditum. Quæsiuit, quæ nā esset eius vitæ ratio, quo vestitu vteretur, an haberet vxorem, quo cibo vteretur, ubi habitaret. Ad petitionem per Obonē Regulum respondit, se Cangeuaranum proficisci, ibi velle me præsto esse cum aliquot Lusitanis, se monumenta illa diligenter conquisita traditurum. Secunda petitio fuit eiusmodi: Cum eius Celsitudo tam manifestis indiciis summum in nos amorem, & beneuolentiam significasset, non videri consentaneum, vt ab eius latere, obsequioque discederemus: velle nos in ipsius vrbe Regia manere, in qua ædiculam aliquam erigere liceret, quo facto ipsius nominis fama immensum cresceret: hoc enim solū Regiæ Celsitudini ad summam felicitatem deesse. Hac audita pe-

titione Rex, ad Brachmanas conuersus subrisit, & ad alios sermones nescio quos animum adiiciens, nec annuit nec abnuit, neq; ego deinceps responsum petii. Tertia petitio fuit, vt reditus quosdam annuos, qui Regis ipsius nomine Ecclesiæ S. Iohannis in vrbe S. Thomæ donati fuerant, ipse suo chirographo, ac sigillo comprobareret. Huic petitioni facile annuit. Sic tandem nos dimisit.

Chandegrinum interea venit Lusitanus quidam, quem Obo Regulus, vtpote suum beneficiarium, cum aliis duobus Lusitanis in nostro hospitio manere iussit. Sequenti quinta feria Lusitanus, etiam de nocte, munus quod attulerat, Oboni offerre parabat. Iussit Obo me quoq; vna venire, audierat enim me irasci, eo quod diutius in vrbe detinerer. At ego cum intelligerem accessum meum tunc temporis nullius esse momenti, nuntiari iussi Regulo, me non irasci, neq; vero Patres, qui in totius vitæ decursu inter cætera patientiam maximè colerent, esse ad iracundiam adeo præcipites: ac proinde ne crederet, me Regulo optime merito, & à quo alia plurima sperarem, succensere; quinimo liben-

libenter expectare quoad ipse posset, ac vellet quam commodissimo tempore nos dimittere. Dum hæc Regulo nuntiabantur, aderat mercator, qui nostra negotia curabat, qui, quæ à me dicerentur, vera esse sub capitis periculo affirmabat. Respondit Regulus velle se, Lusitanos quam ornatissimo vestitu in diem sequentem paratos esse, ut cum muneribus omnes ad Regis conspectum perduceret, atq; ita factum est. Nobis autem ad Regiam venientibus, stabat coram Rege Brachmanarum turba è doctioribus, & præcipuis illius gentis. Afferebant hi foliorum sylvestris palmæ magnam farraginein, quibus foliis pro papyro utuntur. Hæc Regi, ni fallor legebant. Interim P. Ricius, & ego usitata veste, ac palliis nostris induti, cum Lusitanis adsumus. Accepit Rex lætiore vultu, quam antea, & familiarius etiam tractavit. Lusitani munus proferunt, petunt, ut nos mature dimittat: in oppido S. Thomæ recte rem geri sine nobis non posse affirmant; Regis munificentia factum esse, ut vix iam superfit, quod ipsi amplius exoptare possint, cum Patri omnia sint iam concessa, monumenta nimirum, quæ

de vita Apostoli loquuntur; Portoriorum relaxatio, Ecclesia in Regia construenda. Vnum tantum rogare, vt quod comneatum inuehendorum nomine in opido S. Thomæ soluitur, ipsis remittat. Rex ea, quæ concesserat rata habens, omnia se facturum promisit, vbi Cangeuaranum venisset. Distat hæc ciuitas à S. Thomæ vnius diei iter. His actis, de religione Christiana fit sermo, ingens omnium ordinum concursus; Procerum, Dynastarum, Magnatum magna frequentia. Res nouas audiendi cupidine, & interrogandi studio. tempus à mane vsque ad meridiem protrahitur. Verba fecimus de incarnatione filii Dei, de redemptione humani generis. de Deipara Virgine & matre. Quæsiuit Rex, an essent apud nos pictores, aut tabella aliqua picta, quæ rem, de qua erat sermo, oculis repræsentaret? Ex templo profecto B. Virginis imaginem, quam de industria in tetraphoro paratam habebam. Hanc coram Rege sisto ita erectam in debita distantia, vt ab ipso commodè, & à reliquis cerni posset. Huius picturæ formam, & elegantiam Rex miris in cœlum laudibus extulit, atque intimis sensi-

senfibus , & toto animi affectu, puerum, & Virginem matrem contemplatus; pictores, qui forte aderant, vt propius inspicerent, hortatus est; & an ipsi tale quippiam pingendo imitari auderent, sciscitatus est. Illis negantibus, quæsiuit quis esset ille puer. Respondi esse filium Dei, cui nomen I E S V Christo, atq; hoc nomine Salvatore mundi significari, esse secundam personam Sanctissimæ Trinitatis, pro nobis incarnatam, de quo paulo ante docueram. Quid? inquit ille, si Deus est spiritus, & incorporeus, atq; ab omni peccati labe immunis, quomodo poterat habere filium? & si filius eius est Deus, quomodo poterat mori? Ad hæc omnia pro tempore & loco respondi. Docui præterea, & rationibus, atq; cōparationibus ostendi, quomodo Virgo cōceperit, peperit, & virgo permanferit. His mediocriter intellectis, iterū interrogauit, an Deus certam aliquā viam salutis hominibus patefecerit, & an nostra lex Deū inuestigandi, & cognoscēdi modum præscribat? Maxime, inquā: imo si sua Maiestas vellet viā illam ingredi, oportere decē præcepta decalogi obseruare. Rege iubēte, Chryso-

mus

mūs noster, vnus è pueris, decalogum clara voce recitat, tanto feruore, & efficacia, vt non ipse, sed Spiritus sanctus in ipso eloqui videretur. Rex attentissime audiebat, & si quis, vt fit, obloqueretur, mota manu silentium indicebat. Recitato decalogo, & habito breui sermone de hominis creatione, & mox lapsu, de miraculis quamplurimis, quibus religionis Christianæ veritas comprobaretur, Rex & Obbo Regulus & reliqui Proceres vnanimi voce dixerunt, Mahà à lassa, id est, valde bene. Et Rex Brachmanas intuens, disertis verbis affirmavit, Christianam legem sibi veram videri. Mox ad imaginem reuersus, interrogauit, an in S. Thomæ esset pictor? Non deesse, respondi: Ipsam illam imaginem, si tantopere placeret, Regi donare; sin potius expectare placeret, aliam statim pingendam curaturum, pro Ecclesia noua, quæ Chandegrini bona cum Regis venia esset erigenda, vt hoc tanquam magnete, vel succino Lusitani & Christiani incolæ huc attraherentur. Imo ô Rex, inquiunt Lusitani, nisi sit hic Ecclesia, nullo modo poterunt Lusitani in hac vrbe Regia consistere, nec ad eā venire.

re. Rex hoc audito, iussit me totam ciuitatem obire, & locum Ecclesiæ ædificandæ ad libitum eligere: Obonem curaturum dixit, vt ex animi sententia perficeretur; & si quid præterea vellem, se omnia præstiturum. Ego Regi maximas gratias ago, me Indiæ Proregem de amplissima Regis munificentia certiores facturum promitto, me auctore in Lusitania atq; Europa vniuersa tantorum beneficiorum memoriam sempiternam futuram. Ad hæc Rex, Dono te, inquit, tetraphoro aurato honoris causa, quod nuper Obom Regulo perficiendum mandauit: ingredi, & urbem ad speciem ouantis, totam perlustra. At Obo, cum tetraphorum nondum, perfecisset, suggessit Regi, non esse istum faustum diem, ac proinde tali die tetraphorum nouum non licere ascendere: tempus nimirum, quo erat in mora, dierum delectu purgare voluit. Die Sabbathi, & Dominico ciuitatem obimus, vel potius partem illius exiguam, non enim duo dies satis esse poterant ad tantam ciuitatem totam perlustrandam. Fit magnus ciuium concursus, qui cum scirent nos locum Ecclesiæ quærere, alia atque alia loca mon-

monstrabant; nec piguit pedibus incedere, nostrorumque lecticariorum gradus comitari, sed nos lecticis gestabamur, rationem habentes Guruporum, qui pedites sine magnæ ignominiaë nota incedere non possunt. Atque hoc adeo gentibus illis inoleuit, ut nihil fere nisi exteriora sapiant, aut curent. Quare cum per hos dies instante nocte, Obonis Reguli domum peteremus, qui in plateis erant, animaduertentes nos sine lychnis oleaceis incedere, qui Brachmanis, & Gurupis noctu præferri solent, Adeo, inquit, parci & miseri sunt Lusitani isti, ut ne vnus saltem lychnus illis suppetat? Ad hæc puer, qui interpretis arte fungebatur, non ita est, inquit, sed pone sequuntur lychnuchi, qui faces accensas afferent; neq; vero sunt oleacei, sed cerei: apud hos enim cerei longe pluris æstimantur, quod cereos illi cōflare nesciunt, & foris importatos in magno pretio habēt. Nemini vero debet mirum videri, nos Regulum noctu cōuenire solitos. hoc enim tempus tam optimates, quam ipse Rex mutuis visitationibus, & negotiis tractandis tribuunt; matutino tempore corpus exercent: quem ad finē domum

domum quandam accommodatam habent, cuius pavimenti media pars, gypso crustata, ad instar vitri perlucida renidet: altera pars tenuissimo pulvere rubro confersa, molle exercentibus stratum præbet. Huc exercendus ingreditur detractis vestibus, comitantur Geytii: quo nomine vocantur fortissimi quidam iuvenes. qui in hac palæstra cum domino collufuri in arenam descendunt, ac modo gladiaturam exercent, modo luctantur, modo maxima quæ possunt pondera, attollunt, modo calcibus, & pugnis se mutuo tundunt. His peractis in eodem pulvere heri corpus, sudore fluidum conuoluunt Geytii, brachia & crura magnavi, prope ad luxationem intorquent, postea oleo totum perungunt, & aqua calida redolente lauant, sindone tergunt, & vestiunt. Deinde hora opportuna prandium ministrant. Hoc exercitio tam prospera vtuntur valetudine, vt qui septuagenarii sunt, vix trigessimum annum videantur attingere. Nec exercitium vnquam omittunt, nisi graui de causa idq; perrarò, sicut accidit per illos dies, quibus Regem matutino tempore conuenimus. Lusitani igitur, &
ego

ego cum socio Reguli domum, vale dicturi ingredimur. ille singulis singula munera donat : ægre ferebat discessum nostrum, eo quod Rex quæ donarat, suo sigillo nondum cōsignauerat. Ego vero hyemem instantem & Collegii nostri negotia causabar, nihilominus si diut us expectandum videbatur, & id ipsi placebat, dixi me libenter imperata facturum. Ille periculum facturum, an esset in nobis illa patientia, & in negotiis peragendis cura & industria, quam alii de nobis prædicabant, quamq; ipse postea sibi compertā esse affirmavit, profectionem nostram usque ad finem mensis suspendit. Interea quasi immemor nostri, idolorum festis, quæ per illud tempus magna frequentia fiebant, totus se dabat. Festa hæc tanquam parentalia quædā in memoriam defunctorum, multis cum pyris, & facibus celebrantur. Strenas & xeniola etiam absentibus mittunt, ad conuiuia inuitant. Hoc tempore magna celebritate colebatur idolum Tripiti, cuius ante meminimus, quod tria milliaria ab hac ciuitate distat, in acciui, & gelido mōte collocatum. Inferius cingitur amœnissimis vallibus, quæ fructu abun-

abundant quidem, sed quem nulli tangere fas est. Ingens in his sylvis simiorum multitudo, qui adeo cicures euaserunt, ut metu deposito è manducantium manibus cibos excutiant: neq; vero id vulgo ægre ferunt, putant enim gentem esse deorum, cumque Dæmonum principe, quem Permalem vocant, familiaritate coniunctam. Permalem adorant sub multis figuris, nempe hominis albi, cærulei, flauī, item sub figura bouis, equi, leonis, porci, anatis & galli. Vidimus Chandegrini è nostro hospitio, Obonem Regulum mane flumen traicientem, cum magna equitum, peditum, & elephantorum multitudine, idolum istud Tripetinum petentem, eundemq; vesperi reuertentem cum lychnis innumeris, qui totam terram illustrabant, atq; interim tintinnabulis, & crepitaculis omnia resonabant. Idem ab aliis multis magnatibus, multorum dierum serie factitatum vidimus. Aliud nobis spectaculum alius dies præbuit, quod fuit eiusmodi. Ibat Obo Regulus tanquam ad bellum profecturus: stipabat ingens militū manus, signiferi cataphractis elephantis infidebant, magnates latus cingebant:

Hoc

hoc comitatu ad templū quoddam contendebat, vt ibi dignitatem nescio quam, Gurupi, suo filio puero conferret. Erat hæc dignitas quædam quasi dispositio, vel aditus ad supremum alterius cuiusdam dignitatis gradum, quæ Brachmanis primariis decerni solet, ad quam hic puer paucorum dierum intervallo ab ipso Obone erat euehendus. Puerum igitur ad templum deductum in columnæ capitello statuunt. Quo facto primus ille Regulus iunctis ad pectus manibus, illi caput inclinat, deinde reliqui procures idem faciunt. Mox puerum aurato tetraphoro impositum, cum toto illo comitatu per urbem gestant. Per eosdem fere dies Rex ad hortulos suburbanos oblectandi animi causa Reginas inuitauit. incedendi pompa erat eiusmodi. Præibat vnus è primariis Ducibus, secta Mahometanus, insigni equitum turma comitatus, cum quatuor, aut quinque cataphractis elephantis, & sericis vexillis versicoloribus, cum tiliarum & tympanorum hilari pulsu, quem camelorum sessores edebāt, cum quibus permulti lancearii pedites permixti incedebant. Hos sequebantur magni
Dela-

Delauayi, id est supremi Duces, pedites cum hastis, sclopis, & vexillis pene innumeris: tum elephas Regius, nonnullis Regni proceribus stipatus, vexillū Imperiale gestabat. Post hunc tympanum ferreum ingens, quod longitudinē duorum doliorum, sesquidolij latitudinem implebat; quatuor baiuli duobus contis suspensum ferebant, & quatuor milites pulsabāt. Sonus quidē minor erat, quam pro tam vasti tympani magnitudine. Sequebatur Rex in tetraphoro aurato cum magna famulorum, & aulicorum caterua: quatuor umbellæ pulcherrimæ, quas quatuor pedites ferebant, solē arcebant. Sequebantur Regis insignia, hastis infixæ, nēpe vaccarum syluestrium caudæ crinitę, niue candidiores, quæ apud orientales in magno pretio habentur; piscis effigies non vulgari magnitudine, & leo: deinde vexillum, postea magnus regni Delauayus, postremo Princeps cum vxoribus Regiis amplissimo apparatu, quas comitabantur fœminæ quamplurimæ in cathedris ex argento, & auro solido fabrefactis.

Ibant Reginae in tetraphoris auro splendentibus, quæ conopea serica polymita

aureis filis intertexta, vnionibus distincta, tegebant. Singulis teraphoris binæ vmbellæ sericæ, auro rigentes, ad solem ar-
cendum accommodatæ. Hincinde fœ-
minæ permultæ, pedibus incedentes, fla-
bella tenebant, aureis & argenteis bacil-
lis inserta, quibus ventulum faciebant,
assiduo caudarum iactatu euentilando.
Eadem pompa de nocte reuerterunt, tot
lychnis lumen præbētibus, vt pulsīs tene-
bris diem reducere viderētur. Mense iam
elapso, Oboni nuntium misi, qui nostris
verbis oraret, vt meminisset, moram, quā
in vrbe trahebamus, cum multis expen-
sis esse coniunctam. Vocauit, adfui, mu-
nuscula de more dedi, promisit se nos po-
stridie dimissurum morę culpam contulit
in festos dies, & frequentes Optimatum
visitationes, & in duas filias Reginas, quas
Rex in vxores duxerat, quæ per illos dies
paternas ædes assidue frequentabant.
Tandem munusculis datis dimisit. Tre-
centos aureos dedit in annuos redditus,
quos è pagi cuiusdam annuis pensionibus
extrahi iussit, & si quid deesset, in aliis lo-
cis iuxta Condurem, suppleri voluit. Con-
dur oppidum est nouum, quod ipse ædifi-
cat,

cat, & muris circundari iubet. Portū in ripa fluvii Areomagani habet celebrē, ad quem variis locis huius septentrionalis tractus plurimi conueniunt. Ecclesiam ibidem suis sumptibus, se ædificaturum promittit. Priuilegia in fauorem incolarum, & aduenarum multa condidit. Dat facultatem in tota ditione sua Ecclesias ædificandi, & Euangelium prædicandi. Tres aut quatuor Dynastas Conduri vicini, nostrorum obedientiæ subiecit, quibus præcepit, vt Patribus morem gererent, & quæ ipsi ad Ecclesias, & domos construendas peterent, omnia suppeditarent. Hæc ex ipsius litteris patentibus; & legibus in commune incolarum bonū conscriptis, perspicua sunt. Quorum omnium exempla nobis dedit; authographa apud se deposita conseruat. Mihi vale dicenti suasit, vt antequam discederem, urbem totā in lætica obirem cum Ducibus & Dynastis, & festæ lætitiæ signis. At ego cum eiusmodi pompis dissimulandum ratus, postridie vesperi me è ciuitate subduxi. In itinere visitaui Dynastam illum, cuius ante memini, quem quotidie ducentis Brachmanis alimenta præbere

dixi, quem Papum Regulum vocant. Hic domicilium sibi delegit in montibus, quos in altissima culmina confurgentes vndiq; cingunt vmbrosæ syluæ, & longi anfractus per obliquos viarum flexus in se recurrentes, pene inaccessibiles reddunt. Ciuitas longo, & accliui tractu, à radicibus montis ad supremum vsq; cacumen attollitur. In huius oppidi porta occurrit nobis Præfectus, honoris causa, multis militibus comitatus, qui nos ad Reguli conspectum in sublime deduceret: qui labor lasso, & triginta horarum inedia laboranti, nescio an satis opportunè acciderit, Regulus in ædibus satis commodis, iuxta arcem quiescere iussit, vt ex labore itineris recreatos ad se postea vocaret. At enim tantus exemplo factus est ad nos omnium concursus, vt salutandi, & de Deo colloquendi maximè, comedendi vero copia nulla daretur. Postea Regulus nos iubet accersiri. Inuenimus sedentem in aula per ampla munera in primis proferimus, quæ ille grato animo, & benigno vultu accepit, mox in interiorem domum, auleis, & pristromatis egregie ornata deduxit. Hic quatuor horas integras interrogando,

do, & minutissima quæq; perſcrutando conſumpſit. De lege diuina differentem libēter audiuit ipſe, & Brachmanes ad audiendum conuocauit. B. Virginis matris, filii effigiem diu, multumq; contuitus, vix à ſuo conſpectu reuelli paſſus eſt. Cum ex me didiciſſet, Regem libertatem dediffe, Eccleſias in toto Regno ædificandi, reſpondit, ſe mihi ſi vellem, etiam in ſuo palatio Eccleſiam cōdendi facultatē dare. Egi gratias, & primum velle me dixi, eius bona cum venia, in ſummo arcis culmine crucem erigere, qua arx ipſa Dæmoni formidoloſa, & hoſtibus inexpugnabilis redderetur. Crucem enim telum eſſe Chriſtianorum, quo freti Duces, Reges, & Imperatores ampliffimi maximas victorias ab hoſtibus reportauerunt. Quæſiuit ille, quid eſſet crux, & cuius generis, aut figuræ telum: Hoc myſterium vt declararem, neceſſe fuit, de morte & paſſione Domini fuſius diſſerere. Cum ille Chriſtum Dominum, Dei filium, hominibus viam veræ ſalutis enunciantem, indigna multatum morte didiciſſet, ira accenſus, Ecquis inquit, tam immane facinus perpetrare auſus eſt? quæ gens? quæ natio?

H 4

quibus

quibus in terris habitat? quo nomine vocatur? & quasi illico pœnam exacturus, quæsiuit, an esset adhuc in terris aliqua vena superstes, vel reliquiæ illius gentis, quæ Christum occiderat? Ego vt hominem placarem, Dei filium sponte se morti obtulisse dixi, vt homines ab æterna morte redimeret. Esto, inquit, an vero illi Deum vera prædicantem occidere debuerunt? non est hoc rectæ rationi consentaneum. Quid plura? post multos sermones, vltro citroque habitos interrogauit, an ad globulos illos filo insertos, preces persoluerem: petijt decem præcepta Decalogi iuberem recitari. Sub digressum. Quando inquit, discessum tuum tantopere acceleras, quod te propter impendentem hyemem facere non dubito, Cangeuerani, quo rex proficiscitur, te expectabo, ibi pluribus tecum agam. Postea vbi ex Chandegrinum reuerteret, ego nulla in re tibi deero. Ecclesiam etiam in ditagone mea ædificandam in me recipio: nec enim scio, quo genere beneficii tam singularem amorem, & beneuolentiam, in me antea ignotum, hodie à te mihi exhibitam compensare possim. Hæc ille

ille. Ego vero mihi persuadeo nostræ Societatis homines si ad hæc Regna mittentur, huius opera, & auxilio haud exiguum operæ pretium facturos, tum quia naturæ bonitas, quam hic præsefert, id à me exposcit vt credam; tum quia & ipse, & ipsius Brachmanæ facili consensu, quæ à nobis dicebantur, audierunt. Vt mihi videatur ostium magnum apertum ad Euangelium in his terris promulgandum, & incolas ad veram pietatem, & virtutem erudiendos. Atq; hoc nō solum in illo longo tractu maris, verum etiam in interiore continente in tot regna, & satrapias diuisa, in quibus non solum plebs, sed etiam Procures, non rustici solum, sed & Brachmanes, omnes denique omnium ordinum & ætatum, res diuinas libenter audiunt, & Ecclesias poscunt. Quid quod in vrbe Chandegrini permultos vtriusque sexus Beatissimę Virginis, & pueri in vlnis maternis effigiem in publico expositam venerantes, & magna religionis significatione certatim concursantes, seque mutuo exhortantes, in terra prostratos adorantes vidi? Quare diuinitus factum existimo, Spiritu sancto suggerente, vt V. R.

ad has terras explorandas animum appu-
lerit. Imo & res ipsa tam prosperis princi-
piis innixa, feliciores indies successus
promittit, vt non sit dubium, quin si hæc
scintilla semel ignē corripiat, maximam
vbique flammam sit excitatura. Ac proinde
V. R. non dubitet primo quoque tempore
multos subsidiarios mittere, qui pruden-
tia, animarum zelo, patientia, & morum
quadam lenitate præditi, maius in virtu-
tibus solidis momentum, quam in litteris
constitutum esse ducant. Ad minus sex
ante quadragesimam mitti placeat, duos,
qui Chandegrini resideant, quæ est ciui-
tas Regia, à qua in terras adiacentes, nimi-
rum in oppidū, Tripetino idolo coniun-
ctum, quod præcipuū est gentiliæ super-
stitionis caput, & in terras Papi Reguli
non longe distitas expatiantur: item duos,
qui Conduris oppidi noui Ecclesiæ con-
stituendæ curam suscipiant. Situs est enim
Condur in fauce fluuij Areomagani, quo
in loco constituenda sunt vectigalia, &
Portoria, & alia, quæ ad emporij celebris
futuri administrationē conducunt. Huc
enim ab vrbe Chandegrino magnus est
mercatorū concursus, quia via brevis est:
atque

atq; hinc Paleacatem vsque per interiora continentis facilis est accessus , nempe per flumen quod præter Paleacatē fluens, in Areomagani fauce se exonerat. Facit hoc flumē insulam magnam, in qua multi sunt pagi, Oboni Regulo subiecti, quo fit, vt hi duo sacerdotes, quicquid terræ à Paleacate vsq; ad oppidum S. Thomæ inter-iicitur, possint colēdum suscipere : deniq; duos, qui ab oppido S. Thomæ vsq; ad Canameiram animarū culturam exerceāt ; imo & vsque ad Teuanapatanā, quæ magni Regis Delauayo patet, qui in suis terris Ecclesias fieri postulat , præcipue in portu quodam, qui fluuiū habet præterlabentem, qui in nulla hyemalium torrentium inundātia arenis suffocatur, & semper aperto aluco nauigia suscipit. Hic nobis per Naynam Mudeliarē, nostri studiosum, nuntiari iussit, se omnes expensas facturum, quę opus essent. Qui aut mittendi sunt, veniāt ante Quadragesimam per oram maritimam vsque ad Periapatatum, atq; illinc opera nostrorū, qui Periapatani residēt, adiuuante P. Gasparo Dabreo, Marauasiorum amico, vsq; ad Nagapatanū, & S. Thomę peruadere poterunt, neq;
vero

vero expensis, quæ in hoc itinere accelerando contingent, parcendum cenſeo, ne refrigeſcat iſte feruor, & elabatur occasio noſtris, qui commode cum ipſo Rege, Cangeuarano redcunte Chandegrinum proficiſci poterunt. Veniet enim Rex Cangeuaranum ante ducſ menſes. Imo exiſtimationi noſtræ valde conducere intelligo, vt Condure primo quoque tempore Eccleſia ædificetur: quo nimirum res mature tranſigatur cū mercatoribus, qui à Gergilino, & Bengala, atque ab aliis portubus negociandi cauſſa illuc conueniunt, & Collegium hoc, ac Seminarium ſubſidia opportuna habeant, quibus primum lapidem maiore cū fiducia iaciant, & prima fundamenta, quaſi in ſolido ponant. Habeo præter hæc Pandiuacam, pagum qui nouem milliaria à S. Thomæ diſtat, huius obiter poſſeſſionem adii, cum redij Chandegrino, paganis & agricolis maximè vrgentibus, vt ſe ad hos agros colendos ſtatim admitterem. Quin etiam Obo Regulus Montem paruū fundis additis amplificauit. Atque hæc omnia literis patentibus confirmauit. quarum exempla in linguam Luſitanicam verſa, ad

V. R.

V. R. mitto. Iuxta Pandiuacam exstat alius pagus instar ciuitatis, quem vocant Chelauagaranium, cuius incolæ ad agros colendos frequenter nostris operam locant: hi maxima congratulatione & lætitia nos exceperunt. His occasionibus speramus fore, vt tam hi, quam cæteri vicini reiecto Idolorum cultu, sese ad Christianam Ecclesiam aggregent. Ego interea donec V. R. opem ferat, omnia parabo, & Condure, quam primum crucem erigendâ curabo, ne Obo Regulus, à quo omnia pendent, spem abiiciat. Dabo quoque litteras ad Dynastas, & magnates illorum locorum, ad quos iam Obo in eandem sententiam scripsit. Et si fieri poterit, ipse Condurem contendam, vt arcam, situm, & reliqua diligenter inspiciam, vt V. R. de omnibus certior fiat. Leges etiam, & priuilegia Condurenfi Emporio indulta, in itinere promulgare decreui. Dei opem confido non defuturam, qui sicuti huic rei tam felicia dedit initia, ita feliciores (vti spero) dabit exitus, quo opus ex obedientia inceptum, & à V. R. tanto opere commendatum, cum eadem obedientia ad finem, à Diuina prouidentia constitutum

tum perducatur. Datæ Meliapore in Collegio S. Ioannis 20. Nouemb. 1598.

Cum hæc Goæ nuntiabantur incredibilis fuit omnium animorū motus? Christianis gaudio exultantibus, ethnicis dolore confectis, his atque illis arbitrantibus actum iam esse de secta gentilica, si vnde tota illa superstitio permanauit, inde ostium aperiretur ad fidem Euangelicam promulgandam. Nostri inuisitato feruore vltro se huic missioni obtulerunt. Quare præmissa oratione, ex tota Prouincia delectu habito, missi sunt P. Emanuel da Veiga, Domus Professæ Præpositus, P. Gaspar Stephanus, & ipse professus, ac Theologiæ antiquus professor, P. Franciscus Ricius, P. Ioannes de Costa, P. Petrus Eutitius, P. Melchior Cotinius. Verum quia P. Ricius, vt supra docuimus, iam ibi erat, misimus P. Consaluum Monterium, qui in oppido S. Thomæ in eius locum succederet.

Emmanuelem Campellum Patrem, Patri Alexandro Leni socium misimus in terras Gingianas, ad urbem Chistapatanam, cui loco Portum S. Michaelis nomen indidimus: ecclesiam vero Beatissimæ Vir-

mæ Virgini de Spe dedicari placuit. Speramus enim fore, vt Beatissima Virgine, & S. Michaelē deprecatoribus, ac patronis, tota hæc regio ab idolorum superstitione ad Christianam fidē traducatur. Quid postea successerit à prioribus litteris vsq; ad nostrorum aduentum, ex aliis eiusdem Patris litteris V. P. cognoscet.

EXEMPLVM LITTERARVM P. Simonis de Sà Reſtoris Collegij S. Ioannis in urbe S. Thomæ prid. Cal. Aprilis. anno 1599.

LITTERAS quas de nostrorum Patrum aduentu V. R. ad me scripsit, dici non potest, quanta cum animi lætitia acceperim, atque adeo, vt ingenue fatear, expauidum considerabam opera Dei. Obstupui plane dum mecum reputabam, quam apte & concinne omnia votis responderint. Admiratus sum, & toto animi affectu exosculatus, tot, ac talium Patrum ad hanc prouinciam suscipiendam conſpirationem & consensum. Litteras cum sociis communicaui, omnes pari gaudio feli-

felicem nuntium exceperunt: beatos prædicabant, quibus tam fausta fors obtigerat. Nec minor in ciuitate lætitia, cum Patres aduentare nunciatum est. Ludouicus Macedus, Lusitanus eques, Oboni carus, illico ad Obonem scripsit. Præfectus nouus certiozem fecit Naynam Mudeliarem auunculum suum, amicum nostrum, qui per eos dies Paleani agebat cum Delauayo supremo Duce, cui nuper, Regio diplomate, huius ciuitatis administratio collata est. Nunc id agam, vt ea, quæ à postremis litteris, quas ad V.R. dedi, successerint, intelligat. Condurem profectus est frater Antonius Consaluez, vt nouæ Ecclesiæ principia constitueret. Exceptus est ab incolis humaniter, & honorificè. Interea Delauayus militum supremus Dux, qui multum apud Regem valet auctoritate & gratia, vehementer contendit à Rege, ne committeret, vt condendæ nouæ ciuitatis studio Areomagani sui antiquissimus portus damno afficeretur: orauit vt quemlibet alium locum Ecclesiæ ædificandæ eligerent. Primas litteras, quas Rex in hanc sententiam scripsit, voluntati Delauayi obtemperans, Obo Regulus, cuius

cuius opera, & facultate Ecclesia cœpta erat, fictas, & commētittias iudicauit. Quare totis viribus in opus incumbere iussit. At frater licet, ne Obonem læderet, non penitus cessaret, tamen ne Regem sibi infensum redderet, tardissime progrediebatur, donec secūdis litteris à Rege missis, ex ipsius Obonis sententia parendum ratus, pro tempore destitit. Interea instante Quadragesima fratrem ad colloquium euocaui, iussi tamen ita veniret, vt relictis in loco Ecclesiæ aliquot Christianis, videretur ad tempus discedere, postea opus inchoatum perfecturus. Per idem tempus, cognito Obonem Regulum vnus diei iter in castris abesse, de consilio nostrorum, adhibito in socium Ludouico Macedo, eum conuenire statui. Prima Dominica Quadragesimæ iter ingressus, feria tertia ad castra perueni, Obonem Dynastarum legationibus intentum eo die nemo interpellauit. Postridie se in colloquium dedit: iratus ostiariis, qui pridie nostrum aduentum non indicaerant, vnum ex eis supplicio affici iussit. Causam aduentus dixi non esse aliam, quam vt litteras à V. R. allatas, ipsi ostenderem.

derem, & vt Patres in eius ditionē venire nuntiarē; quo sciret quanti ipsum nostri facerēt, & quantopere æstimaauerint Goę, ac totius Indiæ Christiani summa in nos collata beneficia. Grata fuit hæc oratio Oboni Regulo, ac mox cum illo agere cœpi de Ecclesia, quam Condure, iubente Rege inchoatam reliquimus. Dixit se ad Regem scripturum, vt facultatem daret eam perficiēdi, sed cum id mihi valde non placeret Rege tantopere renitente, tandem suavit, vt Areomagani Ecclesiam conderem, esse quippe ciuitatem illam in primis celebrem, si id non placeret, Cotapatanam eligere iussit. Respōdi Areomaganum in ditionem Delauayi esse (erant autem inter Obonem, & Delauayum inimicitia) me velle in ipsius Obonis ditione consistere. nihilominus hortante ipso Obone, & se fortasse Areomaganum in suam potestatem redacturum non obscure significante, ita consensi in Areomaganum, vt simul Cotapatana Ecclesia ædificandi facultatem peterem, quam ille libenter concessit, publicoque diplomate confirmauit, asserens se nihil aliud velle, nisi quod mihi gratum foret. Tandem
pannis

pannis bombycinis de more donatum benignissime dimisit. Inde digressus ad Papum Regulum cum exercitu descendentem contendi. Hic me vt antea humaniter, ita quam humanissime accepit P. Riccius vbi esset, & alia multa suo more sciscitatus est. Muneribus pro consuetudine donauit. Discedentem monuit, vt ab arce Ludouici Macedi, quam ipse rebellantem suis militibus obsederat, in itinere declinarem. Ea nocte perueni ad ciuitatem Triualurem, hortis & nemoribus confitam, piscinis affabre structis circumdatam, idolorum delubris celebrem. Hic in fano quodam aperto, sicut antea feceram, pernoctavi. occurrerunt mox Brachmanes & milites; de lege diuina verba facientem audiunt; gentilizæ superstitionis fallacias ita detexi, argumentis conuici, vt ipsos suorum Deorum pigeret, puderetque; Christi Domini legem veram esse affirmare non dubitarent; imo & Ecclesiam in ipso vrbis foro construere per ipsos licere dicerent. Alij dicebant, Perbelle actum est nobiscum hætenus, qui à Brachmanis in fraudem illecti, tam turpiter errauimus. quid autem superest, nisi vteis

cerebrum elidamus fustibus prius, deinde vero Deo debitum cultum exhibeamus? Hunc præposterum feruorem dum ego moderari aggredior, alius qui confidentior videbatur, Imo ego, inquit, spondeo me in posterum horum Deorum delubra non ingressurum, neque manus, aut oculos Diis tam turpibus sublaturũ: quinimo potius Deo vero, cœli & terræ conditori, honorem delaturum, donec Ecclesia fiat. Postera luce discessimus, in itinere occurrit elephas, cuidam idolo sacer, hic Ludouicum Macedum præteriens, me delegit, quem proboscide peteret, forsitan vt falsorum Deorum præcipuum aduersarium vlcisceretur. At me Deo vno & vero protegente, comitibus metu cadentibus, proboscidis ictus in canistrum Ludouici delatus, illud longissime proiecit. Ad Collegium demum reuerso allatæ sunt litteræ à Rege, in quibus negotiũ quoddam peculiare mihi cõmendauit. Simul admonuit, memor essem, se vni mihi, & Societatis Patribus ciuitatem illam, & terram totam credere; curare iussit, ne quid iniuriæ à Lusitanis antiquis incolis fieret, si quid noui accideret, ipsum vt facerem certio-

certiorem hortatus est. Aliam in eandem sententiam à Delauayo epistolam accepi. addebat hic, se valde cupere me conuentum, milites ad deducendum petere iussit à Præfecto ciuitatis, quem Adigarem nuncupant. Dixit se mihi suam terram commendare, eo quod Præfectum iuuenem, & rerum imperitū agnosceret: quare velle ne quid alicuius momenti Patribus inconsultis aggredereetur. Atque hoc idem ad ipsum Adigarem scripsit nō Delauayus solum, sed etiam Nayna auunculus, qui ab incolis Mudeliar dicitur, nempe ciuitatis, & terrarum, quæ Delauayo parent, Quæstor ac Moderator. Hic sexcenta millia Pagodium (monetę genus est quod sesquialtreum valet) in annos singulos Delauayo stipendij nomine pendit, cuius tributi adminiculo vniuersæ Delauayi fortunæ nō parum fulciuntur. Quare ipsius litteris inuitatus, eum conuenire decreui, & Dominica secunda Quadagesimæ Changuela Batepaleanum versus contendit: cum prope eam ciuitatem ventum est, Naynam nostri amantissimum in colloquium euocaui, qui per amicos, & familiares aduentum meum gratulatus,

ipse sub noctem accessit lychnuchis plurimis, & militibus comitatus. Ad urbem postridie deduxit, ac tanta liberalitate, & munificentia non solum mihi, sed etiam omnibus, qui mecum venerant, omnia necessaria ministranda curauit, ut nec vnus quidem teruntij expensam facere necesse fuerit. Ad Delauayum tandem perductus, inueni vulnus alligantem, quod illi in tibiam incidens equus impigerat. Hic ut me vidit, tanta repente lætitia se affectum dixit, ut se sanum reputaret, ac se suosque omnes aduentu meo à peccatis mundatos. Multa illi de me, de imperio Lusitaniæ, de lege diuina sciscitanti, Gubernator Nayna admodum honorifica prædicauit; ut cōciones quas ad populum habemus, & vocum intentiones, ac remissiones, ipsos deniq; gestus & motus omnes non solum narraret, verum etiam ipse immitando representare conaretur. Tantam hæc audiendo voluptatem cæpit Delauayus, ut ipse postea sæpe suis Ducib. in memoriã redigeret, quæ Gurùpus ille de rerum terrenarum contemptu, de elemosynis largiendis, de fraude, & damno non inferendo, deq; aliis Christianæ Religionis

gionis documentis, ipso audiēte dixerat. Hęc Dynastis ipsum visitantibus inculcabat, ac prædicabat, ut iam non tantū Nayna Patres, sed & ipsi quoq; Delauayus in concionando imitari videretur. Sequenti biduo thesauros ostendit, quorū magnam partem ad Regem Vissanagoræ olim pertinuisse aiebat. Dum hæc omnia mōstrat. Scio inquit, vos Patres nihil ex his desiderare, aut hæc vidēdo delectari, cum mundo vale dixeritis. Cui ego, Imo, inquam, quod maxime me delectat, illud est, quod in hac Regia gaza multa video ad crucis imaginē formata. Ille his multo plura se Chandegrini reposita habere respondit, eaque mihi si quando se offerret occasio, ostensurū: Ecclesiam quoq; optimo loco Chandegrini iuxta Regis palatiū se ædificaturum promisit. Locum quem is dicebat, Chandegrini vidi, neque memini me videre in tota vrbe meliorē, aut magis accommodatum. Dixit etiam se omnia quæ ad Sacerdotum alimenta pertinerēt, affatim præbiturum. Vnum hoc orare, ut se singulis mēsis visitarem, & sponderem me semper in amicitia permanfurum, etiam postquā vrbs B. Thomæ in ipsius potestate

testate non esset; se enim non urbem, sed Patres desiderare, quibus se & suam gazam credendam existimauerit. Cui ego, Nos inquam, aliam gazam, alios lapides pretiosos nobis cōcreditos habemus, qui omnibus terrenis diuitiis merito præferri debent; nimirum hominum animas, quas ad creatoris sui cognitionē instiuere cupimus, ac præcipuam inter cæteras animæ tuæ rationem habemus. Tunc ille, Quid, inquit, mihi dabit, si Christianus fio? Nos, inquam, tanto Dynasta dignum nihil præstare poterimus, præter obedientiam, quam non solum tanquam domino, verum etiā tanquam optimo parenti, & rei Christianæ duci, atque protectori nos debere fatebimur. At Deus Opt. Max. qui diues est in omnes, qui inuocant illum, te in amicitiam, & gratiam recipiet, quod omnibus thesauris anteponendum certo scias. Quæsiuit, quo ritu, quibusuq; cæremoniis baptisma conferretur, atque omnia ita approbavit, vt Brachmanes nonnulli timerēt, ne Christiana sacra susciperet. Postremo die, nobis præsentibus, cōsueto illo corporis exercitio vti placuit, ad quod nemo nisi admodum familiaris admit-

admittitur, quod erat eiusmodi. Ipsum toto corpore extenso, in tapete iacentem quatuor iuuenes robusti conuoluunt, & fricāt, ac subinde infiliunt, & pedibus prementes largum sudorem eliciunt: ipso interim tortores suos increpante, & tanquam leues, & nullius ponderis homines, vt impēsius premant, adhortante. Ego interea, ne ociosus spectator adessem, illi varia interrogāti ad omnia respondi. Et antequam exirem, effeci vt diplomata aliquot daret, quæ huic Collegio & nostris Neophytis è re futura essent. Primum annuis redditibus S. Thomæ, centum Pago-des adiecit. Deinde Collegio centum, & quinquaginta aureos dedit, quos Sadramapatamæ annuis pensionibus solui voluit. Postremo Brachènæ scripsit, vt Arcomagani sedem aliquam idoneam quæreret, in qua Patres habitare, & Ecclesiam ædificare possent. Iam antea Brachena mihi promiserat, se Arcomagani terras quasdam Ecclesiæ donaturum. At de his nihil adhuc certi statui, omnia integra seruabo quo ad festum paschæ prætercat. tunc denuo V.R. scribam fusius, cum per otium licebit, & tabellarius minus vrgebit.

Cum hæc scripsi, appulit P. Emmanuel da Veiga, secunda feria vesperi ad 4. non. Aprilis cum sociis. Vnus P. Eutitius cum sarcinis in via substitit. Maxima & nostra, & ciuium omnium gratulatione sunt accepti. Paucos dies quieti dabunt quoad Rex Cangeueranum veniat. Ibi Regi sistam subsidiarios hosce milites, qui diuina clementia annuente, hoc amplissimum regnum è grauiissima Dæmonum seruitute in suauissimam Christi libertatem imo iugum liberrimum afferent. Vicinos primum Dynastas de eorum appulsu fecit certiores. Literas V. R. in sermonem Badaganum transferendas curavi, vt vna cum diplomatis legantur. P. Campellus Nagapatani relictus est, inde ad portum S. Michaelis recta contendet; & si Ecclesia Sadramapatamæ erit, speramus fore, vt nullo negotio inter nos communicare; conuenire, & mutuo nos consolari possimus. quia inter P. Alexandrum Leni, & Sadramapatamam, & urbem. S. Thomæ, viginti miliarium; denique à Changue lapide Sadramapatamam vsque non amplius duodecim miliarium traiectus est: flumen in ipsis faucibus

eibus trium brachiorum altitudinē continet fundo labitur lutulento, introrsum magna profunditas, nauium stationibus apta aer salubris, aquæ dulces, gens nostri amans, ipse Delauayus, à quo omnia pendent, amātissimus: quare quam maturissime illum conuenire decreui. Impedior occupationibus, ne plura hoc tempore. V. R. suam benedictionem mihi imper-
tiat. Vale. Datæ in Collegio S. Ioannis in vrbe. S. Thomæ Prid. Cal. Aprilis anno. 1599.

Per idem fere tempus dū nostri ad huius potentissimi Regis curiā viam, affectāt (quorum ingressus ad tempus dilatus est eo quod Rex contra Madurenum Naichū ingenti cū exercitu contendebāt, quem ipse tamen debiti stipendii nomine datis duodecim millionib. siue cēties vicies cētenis aureorū millibus à se facile auertit) ex alia parte nostris ad Regis Calecutani regnū patuit aditus, renouato inter ipsū & Lusitanos fœdere, quod superioris anni simultatibus ruptum erat, & nostri inchoatam Calecutii Residentiam ad tempus deferere coacti. Quam rem ita vt contigit, breuiter enarrabo. Anno huius sæculi

culi nonagesimo octauo classis maritimæ Præfectus, cum fœdus cum Zamorino, Cunalis Mahometani astu non coalesceret, antequam ei bellum indiceret, nostros è Residencia exire iussit. Zamorinus pro amore, quo erat in nostros affectus, eos retinere nitebatur. nostris nihil periculi etiam ingruente bello impendere affirmavit: posse eos saluis suis rebus in Residencia manere. Vicit tamen Præfecti sententia, inueterata in nos Saracenorum odia perpendentis: quippe nulli dubium erat quin Mahometani, qui loca maritima tenent, sibi à nostris illata damna in nos, & Christianos nostros vlciscerentur. Qua de causa Præfecto obtemperantes maturè se subdixerunt. At consolatus est eos Dominus. Nam Princeps quidam Zamorini consobrinus, nostrorum colloquiis, & assidua conuersatione attractus, ad Christianam Religionem animum adiecit: & eadem nocte, qua nos fugam adornabamus, summis precibus baptismum petens, à Patre baptizatus est, deinde ab Archiepiscopo chrismate inunctus: atque in hunc diem, licet occultus, boni Christiani specimen præ se ferre perseuerat.

Nostris

Nostri absentibus, Zamorinus ad me sæpe numero scribere, orare vt Patres sibi restituerem. Ecclesiam interea, & reliqua omnia integrè seruari præcepit. Saraceno cuidam, qui cruci per contemptum plagam inflixerat, ceruices amputari iussit. Nostri quotidie illi spem faciebant, se confecta pace quam primum redituros. Zamorinus interea tum propter simulatum veteres offensas, tum vt Lusitanis magis complaceret, Cunali archipiratæ stipendiario suo iam olim rebellanti, bellum indixit. Hic à multis annis piraticis biremibus mare infestum habuit, & optimis spoliis ditatus, ad Regii nominis dignitatem, à suis euectus, à paruis initiis ad potentissimi principis instar accreuit. Prorex hanc occasionem nactus, & ipse aduersus Cunalem validam classem instruxit, in qua duo ex nostris missi. Arcem Lusitani statuto die ingenti impetu oppugnarunt, arbitantes se primo congressu victores euasuros. At hostibus, efferato animo propugnantibus, cedere necesse fuit, aliquot ducibus, & militibus desideratis. Nostri Sacerdotes tam mari, quam terra suo officio fungentes, in
anima-

animarum salutem totis viribus incumbebant.

Zamorinus his exemplis in Lusitanorum amicitia confirmatus, ipse in oppugnatione communis hostis perseuerauit, pacemq; cum nostris, tribus conditionibus, præter alia, interpositis, ex omnium nostrum sententia confecit.

Primo dedit facultatem in tota ditione sua Euangelium prædicandi. seq; propenso studio & beneuolentia nostris opem laturum promisit. Omnibus gentilibus, & Mahometanis ad Christianã fidem conuersis, & conuertendis licere dixit pristinis in Republica muneribus dignitatibus, & facultatibus, gaudere, & bonorum suorum hæredes instituere, Arcem ad Ecclesias extruendas idoneam, se daturum spopondit, & omnibus ad eas confugientibus immunitatem concessit.


Secundo promisit, se præstiturum, vt Lusitani omnes, & quiuis alii Christiani, qui ad ipsius terras casu aliquo in captiuitatem lapsi appulerint, Præfecto arcis, aut quæstori regio reddantur.

Vltimo (quod magni momenti est) promisit, se nullo vnquam tempore permissu-

missurum, vt Christiani S. Tomæ, qui in ipsius terris habitant, Episcopum, siue Prælatum quemuis nisi à Summo Põtificē, & à Rege Lusitaniæ missū agnoscant. ad sextum Calend. Aprilis, anno 1599.

His ita transactis, ad residentiam suam nostri reuersi sunt: Attamen superstitē potentissimo hoste Cunale, nostris in illa gente optatum fructum ex labore capere non licebit. Ex his quæ dicta sunt, licet V. P. facile possit huius missionis Calecutanæ rationem, & statum omnem cognoscere, tamen quia oppugnationis, cuius modo memini, infausto successu res nonnihil sunt perturbatæ; visum est hoc loco litteras P. Francisci Rossis opponere, qui tempore conflictus Calecuti cum Zamorino erat.

*E X E M P L V M L I T T E-
rarum P. Francisci Russis ex castris Zamorini septimo id. Martii 99.*



Go V. R. iussu cum Zamorino in castris restiti. scripsit enim V. R. Patres, qui Goa venerant,

nerant, classi sufficere: me vero neq; oppugnationi interesse, neque belli consiliis me immiscere volebat, quod sane præstiti. Oppugnationis vero ratio fuit eiusmodi. Ludouicus Gamma classis maritimæ Præfectus, postquam exercitum, in quo mille & quingenti Lusitani numerabantur, in terras Ariori trans flumen Cunalis exposuerat, nauigia in pontis speciem colliganda curauit, atque hac arte pontibus triginta vno confectis, negotium dedit Ludouico de Sylua, Duci exercitus, viro fortissimo, vt cum trecentis militibus, totius exercitus flore, traiecto flumine oppugnationi principium daret. Ipse interim in castris substitit cum reliquis copiis, subsidio futurus, vbi opus esset. His ita constitutis, quarta vigilia non dum exacta, quinta feria ad quartum nonas Martias fluuium traiciunt, & dato signo hostem in litore expectantem acerrime propellunt. Ex alia parte Nairum quinquaginta circiter millia cum aliis trecentis Lusitanis, arcu appropinquant. Zamorinus, & Princeps paruulus ac nonnulli Reguli, & Dynastæ, atque ego, ex edito & tuto loco pugnam inspectamus, incendiis

diis formidabilem, & crebris tormentorum fulminibus latè lumen præbentibus. Zamorinus cum collatis signis cominus iam pugnari videret, flexis genibus, & manibus iunctis, oculisq; in cælum sublatis, atq; obortis lacrymis Deum præcabitur, vt opem ferret. Nostri per tela, por ignes in illo horrifico tormentorum boatu, & scintillantium globorum turbine, incredibili ausu hostiũ confertos cuneos perrũpentes, iam magis, magisq; præsidii portis appropinquabant. At vnum illud infaustum, & luctuosum accidit, quod Ductor exercitus Lusitani, & quasi omen pugnæ, Ludouicus de Sylua in ipso initio certaminis, sulphurei pulueris iaculo in capite ictus occubuit. Mortem eius socii syndone inuoluto corpore, quoad poterant, alios cælare conabantur. Atque hoc pacto cum Cunale certamen iniuerunt. Ex hostibus occidit Curimussa, is, qui multos annos mare omne latrociniiis infestum, nostris quasi imperium reddiderat, & multis nauibus Lusitanorum captis, opima spolia sæpe ex eis retulerat. Atque ad hunc diem semper elapsus etiã à nostris nonnunquam victus ca-

K pinon

pinon poterat. Cecidit & huius pater Cutiacemus, & eiusdem consobrinus; & Cunialis consobrini duo, & Cutamue-mus, qui superioribus diebus triremem à nostris ceperat; & alii multi Duces, & Principes viri, ipso Cunale perniciosiores. quin & ipse tribus vulneribus, nempe duobus punctim, & vno cæsim infl-ctis vix tandem euasit. Delubrum quod extra arcem erat, totum conflagrauit, & cum illo ædes quamplurimæ. Ex Mahometanis trecenti, ex nostris quindecim in illo certamine ceciderunt, in his Frater quidam Capucius. Naires, qui à parte Australi pugnam commiserant, sepibus quibusdam incensis Mahometanos nonnullos interfecerunt. At vallum securium inopiæ rescindere non poterunt. Ex illis perierunt centum cum Lusitanis quatuor. Nostris hac victoria potitis, diuulgata est Ducis mors. Et iam sulphureus puluis, & plumbeæ glandes, & tela nostros defecerant. Quæ subsidia, cum essent trans flumen à Duce petenda, frustra expectabantur. Nam vna, & triginta scaphæ colligatæ (Almadias vocant) quibus nostri appulerant, à remige deser-

desertæ in medio flumine, temere fluctuantes, neutri parti vsui esse potuerunt. Quare Antonii Leiuæ Indiæ Antesignani famulus (ipse enim Antonius fortissime dimicans, edita magna hostium strage, paulo ante ceciderat) receptum cecinit. At nostri vbi se viderunt Ducibus & signifero priuatos, nullo ordine, nulla militari disciplina, præpropera festinatione pedem referentes, abiectis armis flumini se commiserunt. Atque ita Lusitani ducenti, & sexaginta plus minus sunt desiderati. P. Sebastianus Consalius, & Frater, quem socium habebat, euaserunt. At Frater dum inter ceteros nauigio detrudendo incumbit, plumbea glande percussus est, & brachium dexterum confractum. Septuaginta sex Lusitanorum corpora in litus eiecta, sepulturæ mandauimus adiuuante optimo illo neophyto, qui occultus apud nos agit. Dici non potest, quanto hæc clades dolore Zamorinum, & Naires affecerit. Iam antea & Zamorinus, & viri Principes non nulli Lusitanos monuerant, vt paulatim & lente rem gererent, atque in primis, vt multas biremes in

flumine expeditas haberent, quibus milites commode exponerēt, & è prælio reuersus excipere tuto possent. Suaferunt etiam vehementer, ne soli, sed multis Nairum millibus in societatem adscitis, hostem aggrederentur: quod si fecissent, proculdubio multo maiora damna hostibus intulissent. At illi, vt ad se solos victoriæ laudem deriuarent, Nairum auxiliares copias non curarunt. Egomet vidi non neminem ingemiscentem, quod in hoc exercitu caput aspersum canis nō videret. Zamorino diem pugne constitutū noluerunt indicare, nec ex qua parte arcem essent oppugnaturi. quam rem ægerimè tulit Rex, & infelicem pugnae successum huic vni culpæ tribuit, quod hominem sibi fidelem fallere, & omnia sibi tribuere voluerunt. Hunc dolorem auxit Rex Cocini, cui nos tantum tribuimus, qui Zamorinum per litteras monuit, ne nimium Lusitanis crederet. Huius congressus infelicem euentum voluit Deus signis quibusdam prænotare. Triduo enim, haud scio, an quatrIduo ante pugna, noctu à parte cœli, quæ Cunalem respicit, descendit fulgor triste rutilans omnibus

bus cōspicuus, qui totam classem percurrens, tandē (vt affirmant) supra triremem prætoriam euauit. Pater item Theophilus, qui in hac residentia Calecutana mansurus, Cocino paulo antea venerat, postridie huius cladis mihi narrauit, quod sibi quatrIduo ante conflictum accidisse dicebat, nimirum se de nocte in Prætoria-na, spiritum quendam repente prætereuntem vidisse, & ipsum brachio apprehenso ita alloquentem audiuisse, Castigo te Deus. quibus verbis iram, & ultionem diuinam denuntiare visus est. Hic successus nostris tam funestus, hostibus tantum terrorem incussit, vt occisorum corpora eo die sepelire nemo auderet: timebant enim ne nostri restaurato exercitu, de integro in eos impetum facerent. At cum videbant, totam classem sublatis velis litora deferere, timor, & trepidatio omnis in nostrorum irrisionem versa est, nec immerito, si enim biduum tantummodo in castris egissent, hostes, vt opinor, deditio-nem fecissent. Quare Præfectus raptim colligere vasa, & in altum vela facere coactus est. At ne epistola hæc tota luctuosa sine aliquo doloris leuamine persistat,

rem solatii plenam in fine subtexam. Regina, mater Principis, qui in Regno creditur successurus, colloquiis & exhortationibus nostrorū commota, se Christiana sacra suscepturam promisit: multum autem ad hanc rem momētum habet, quod illa cum Christiano occulto cuius modo memini, sanguine coniuncta est. Reges item Tanoris, & Chales nostros sacerdotes, & Ecclesias in suis terris vehementer exoptant. Viderit, R. V. quid eis respōderi velit. E Cunale 7. Idus Martias anno 1599.

Non minori omnibus solatio fuit profectio quam & zelo salutis animarum, & nostrorum suasu suscepit Dominus Alexius Menesius, Goę Archiepiscopus, ad visitandos Christianos antiquos, a S. Thoma Apostolo propagatos, qui in Regione Malauarica loca montana obtinent. Huius visitationis occasio fuit eiusmodi. Postquam Angamalæ Archiepiscopus Abrahamus fati concessit, & Georgius Archidiaconus iuxta consuetudinem antiquissimam, Ecclesiam pastore carentē gubernandam suscepit, suspitio vehemens non leuibus de caussis suborta est,

est, eam Ecclesiam tandem ad Nestorianos pastores esse reuersuram. Nec defuit inter ipsos quidam Ecclesiastica dignitate pollens, & opibus affluens, qui reciperet se Babylonem profecturum, vt inde Archiepiscopum accerferet. Archiepiscopus vero Goanus, cui non modotantum Metropolitano, sed etiam litteris Apostolicis iubentibus competit administratio illius Ecclesiæ sede vacante, Archidiaconum in obedientia sedis Apostolicæ vacillantem, in officio continendi munus suscepit, ne videlicet in schisma laberetur. Ac Rectori Collegii Societatis terræ nouæ, seu Vaipicotæ mādauit, vt Archidiacono litteras, quibus ipsum Archiepiscopus auctoritate Apostolica eius Ecclesiæ gubernatorem renuntiabat, hac lege redderet, si ipse coram eodem Rectore fidei professionem solennem faceret. Litteras Archidiaconus lætus accepit, & fidei protestationem die festo se facturum promisit. Verum postea nec fidei protestationem coram Patre edere, nec gubernationē Ecclesiæ, tanquam ab Archiepiscopo sibi delatam, accipere voluit: quod ipse postea de consilio quorundam

fecisse causabatur. Quare conciliatis animis tum Cocinensis Præfecti, tum aliorum sæcularium, atque ecclesiasticorum, conuentum celebrarunt Vaipini, quo urbis senatores, & Ecclesiæ Cathedralis presbyteros conuocarunt, exclusis tantummodo nostris quos aiebant Archidiaconum nolle huic negotio interesse. In hoc conuentu Archidiaconum amplexantur, in manibus tenent, ac demulcent. Interim musicis instrumentis editur festæ lætitiæ signum. mox in cathedra sublimē statuunt, urbis Præfecto, atque Episcopi Cocinensis Vicario (Episcopus quippe in Ceilano aberat, & hunc conuentum se absente factum, postea reuersus moleste tulit) & reliquis omnibus in scamnis sedentibus. Assurgit deinde ecclesiasticus quidam inter primos, tanquam procurator idoneus Archidiaconi præsentis (vt ipse aiebat) profitetur Archidiaconum non esse schismaticum (vt forsan inquit, aliqui putant) neque errorem vllum contra fidem catholicam tenere: fuisse enim diligenter ab se examinatum, atque nunc illuc venisse, vt fidei protestationem faceret. His dictis Archidiaconus procumbit

cumbit in genua, & prælegente quodam fidei protestationem lingua Lusitana, cuius ne verbum quidem intelligit Archidiaconus, interrogatur, an illud totum credat, respondet ille Malauarice, O, id est etiam. Atq; hoc pacto tametsi gubernationem ab Archiepiscopo, vel Apostolica auctoritate habere noluit; catholicus tamen, & Apostolicæ Sedi obediens iudicatus, & publicatus est.

Per eosdem ferè dies Cocinum ægrotus appuli. Et ante omnia omnes nervos contendit, ut tum ipse Præfectus, tum reliqui omnes errorem agnoscerent, in quem ceciderant, summi periculi plenum. Docuimus quam perniciosum rei Christianæ foret, in ore omnium neophytorum, & antiquorum Christianorum, detrahare veræ, ac solidæ doctrinæ, qua nostri à tot annis Christianos suæ fidei cōmissos imbuerant, excludendo eos à confessu publico, & à protestatione fidei ab Archidiacono faciendæ; idq; inuito, & contrarium præcipiente Archiepiscopo, qui eam protestationē in manu alicuius e nostris fieri iubebat. Ex alia parte quanti esset incommodi, quantique in fide periculi, tam te-

mere, & præcipitanter cohonestare, approbare, & publicare doctrinam Archidiaconi, quam ipse quasi de lacte Archiepiscopi Abrahami à teneris annis imbiberat, hauseratque è libris Nestorianorum, quos nostri tanto labore emendandos curabant, atque hoc pacto viam, & quasi compendium tradere ad introducendum, & acceptandum Episcopum Babylonicum, Cocini Præfectus, vir nobilissimus, his monitis facilè præbuit aures, factum excusans, ac professus, se non esse Theologum, at vero Theologorum, & litteratorum consiliis adductum, conuentum illum indixisse. Reliqui restitere primum, deinde prætexentes excusationes, alij alias: errorem tamen agnouerunt & ipsi & populus Cocinensis vniuersus.

Quamquam hæc ita acta sunt, tamen quia constabat, aduersarios multa ad Archiepiscopum detulisse, quibus artificiose Vaipinensem conuentum excusabant; instrumēta publica legitimis testibus approbata, ad Proregem, & Archiepiscopum misimus, vt vtrique veritas innotesceret. Quoniam vero multum intererat, igno-

ignorantiam demere, qua Ecclesiastici illi, & alij multi in hac re laborabant (quod utique magno Reipublicæ Christianæ detrimento futurum erat) dedi negotium Patri Rossi, ut re prius diligenter inquisita, & comperta, mihi ad quædam interrogata responderet, quæ nouem erant, quæ cum ipsis responsis multam huic negotio lucem attulerunt: è quibus duo tantum hic inferere placuit, quo liquidius constet, quantopere Societati fauerit Deus, cum etiam ex ipsorum aduersariorum præfidiis ei arma præbuerit, quibus se defenderet.

Interrogatio. Quid responderit Archidiaconus, Vaipino discedens, Cassanaribus (ita vocant Sacerdotes) & Christianis laicis interrogantibus, cuius rei gratia conuētum illum ingressus esset. Responsio. Dixit se nihil aliud, quam fidem suam professum esse contra Patres S. Pauli, qui ipsum hæreticum vocauerant: Præfectum vero, & totū conuentū ipsum hortatum, ut viueret secundum antiquas cōsuetudines viæ S. Thomæ cū Patriarcha suo, atq, hac in re nihil esse periculi: item, se vna cū illis statuisse, ordines ab Archiepiscopo Goensi,

Goenſi, aut quouis alio Latino collatos, non eſſe validos, niſi à Babylonica poteſtate proficiſcantur: ſe vero Archiepiſcopum Goenſem, Archiepiſcopū quidem, id eſt Prælatum agnouiffe, at non ſuum: item Patres S. Pauli vehementer contendere, vt in orationibus publicis Papæ nomen enunciaretur, at ſe nescire an Caſſanares id ratum haberent.

Interrogatio. An Archidiaconus in orationibus publicis Papam nominare reſuſauerit, & quare? An ipſo conſentiente nominētur Patriarchæ hæretici, aut ſchiſmatici? & quo titulo Patriarcham coram ipſo nominent, an tanquam Patriarcham Summo Pontifici ſubditum, an vero tanquam Prælatum vniuerſalē, & ſecundum Chriſtum immediatum? Reſponſio. Non ſolum reſuſauit, verum etiam reſtitit, atq; acerbè tulit noſtros ipſum hortantes, vt Papam nominaret, immo ſeſe excuſauit, quod certo ſciret, Eccleſiaſticos ſuos nolle acquieſcere. Mirum vero Eccleſiaſticos nolle acquieſcere, qui in rebus, quæ ipſos magis angunt, ei parere non reſuſant. Quid? quod hoc quoque à multo tempore in aliquibus locis in more poſitum eſt, etiam

etiam Abrahamo adhuc viuento, & nemine resistente, quo postea defuncto, huius Archidiaconi auunculus, in oppido Carturto, cuidam Diacono Papam in litaniiis nominanti, imperavit, vt Pape nomine omisso, morem pristinum obseruaret, Qua de re Archidiaconus monitus nihil respondit, imo potius in conuentu quodam Angamalico decreto Malauarico, licet occulte, statuit, ne quis Papam in orationibus nominaret. Cuius loco bis singulis diebus in orationibus publicis nominant Patriarcham Babylonico, Simeonem defunctum, eumq; schismaticum, & hæreticum, quem lingua Syriaca Sanctum, & Patriarcham totius Ecclesiæ vniuersalem nominant in libro quodam Syriaco, qui inscribitur liber Patrum. quo nomine intelligunt personam, quæ omnium dignitatum Ecclesiasticarum primas tenet, supra quam non est alius, nisi Christus Dominus. Hac quoque de re persæpe monitus est Archidiaconus, qui etiam bene meminit, Simeonem eundem esse, cuius iussu Abrahamus Angamalem venit, quem nimirum vt à Patriarcho schismatico missum, Iosephus tunc
tempo-

temporis Archiepiscopus Angamalenfis, in Lusitaniam vinctum relegauit.

His interrogatis, ac responsis euulgatis inter eos, quorum intererat, dici non potest, vt obstupuerint conuentus Vaipinensis fautores, postquam eis innotuit, quod vulgo Archidiaconus de ipsis apud suos iactitabat. Id vero eos male habebat, quod Archidiaconus diceret, se præter Patres S. Pauli, contradicentem habuisse neminem.

Nunc tempus est, vt ad Christianos S. Thomæ nostra redeat oratio. Archiepiscopus re cum nostris cōmunicata, Archiepiscopatum Angamalensem visitare decreuit eo fine, vt sedē illam ad suscipiendum Prælatum de manu Summi Pontificis paratiorem redderet. At hostis humani generis cum hoc vnum, præcipuum his tot incommodis remedium esse perspiceret, variis technis Archiepiscopo profectum intercludere conatus est, dehortatibus hinc Religiosis, illinc sæcularibus, iisque non infimæ fortis hominibus; dicebant enim hac visitatione non solum honorem, personam & vitam Archiepiscopi, verum etiam Rempublicam ipsam in
peri-

periculum non dubium vocari. Hæc illi tanta pertinacia inculcabant, atque urgebant, ut optimus Prælatus ad in-
scriberet, cœlum & terram in ipsum con-
iurasse. Veruntamen omni terriculamen-
to contempto, visitationem singulari
constantia cum prudentia coniuncta,
præsente diuini numinis auxilio incepit,
promouit, perfecit. Archidiaconus post
multas tergiuersationes & versutias, ita
ut parum abfuerit, quin à communione
fidelium eiiceretur, tandem ad cor re-
diens, se sub Apostolicæ sedis obedi-
entia victurum pollicitus est. Multa in hac
visitatione præstitit Archiepiscopus, quæ
magnum ad animarum salutem momen-
tum attulisse compertum est. Primum
sacramenta, ut valide conferrentur, effe-
cit: deinde libros Nestorianos, quorum
maximus erat numerus, à sexcentis erro-
ribus, & sententiis catholicæ fidei repu-
gnantibus, expurgandos curauit: quic-
quid Summi Pontificis supremam aucto-
ritatem impugnabat, deleri fecit. Postre-
mo Parochos idoneos, qui nullibi pen-
reperiebantur, diligenter conquisitos, Ec-
clesiis præfecit. Media, quæ Archiepisco-
pum

pum ad hunc finem consequendum maxime iuuerunt, hæc fere fuerunt. Ipse per se Ecclesias visitauit. Octoginta Paræcias instituit, Synodum diœcesanam indixit, ad quã Ecclesiasticos illius Archiepiscopatus, & nostros Sacerdotes solummodo iuxta antiquam consuetudinem conuocauit, assistente Præfecto Cocinensi Antonio Noronia, & primariis ciuitatis, qui Regis Lusitaniæ nomine horũ Christianorum tutelã in se susceperunt. Quæ res quanto Regiæ Maiestati emolumento sit futura, norunt, qui non ignorant, quanti sit momenti, gentem in tota India lectissimam, à temporibus B. Thomæ Christiano cultui deditam, tamque numerosam & potentem, vt armatos ad triginta millia in promptu habeat, cum Lusitanis vnire, ad Ecclesiæ Romanæ obedientiam reuocare, & in fidem, ditio- nemque Regis Catholici accipere. Magna etiam fuit adiumento, animarum zelus & vitæ exemplum, quo optimus ille Prælatus nouem mensium spatio, plus (vt nostri affirmant) in animarum salute promouenda profecit, quam quotquot à B. Thoma ad hæc vsque tempora illam sedem

sedem tenuerunt. Quam bene affectus sit erga nostri ordinis homines, qui in illa vinea laborarunt, indicant verba, quæ ex ipsius litteris decerpsi. Quid mihi animi sit, inquit, post Cunalis & Malacæ infelices clades, V. P. æstimandum relinquo. Benedictus Deus, qui nos his flagellis emendare dignatur. Visitatio illa montana me oppido lassum reddidit. Sed memoria teneo, quod dixit Spiritus sanctus, Bene patientes erūt, vt annuntient. Quo in statum res illorum Christianorum reliquerim, & quæ gesta sint, Patres scripsisse puto, quæ ideo omitto. Vnum affirmo V. P. ego si istic hyemassetem, actum fuisse de illis Ecclesiis; neque ego meæ conscientiae consulissem, si oues pro tempore meas, Pastoris & doctrinæ catholicæ extremè indigentes prodidissem, ac non potius doctrina sana imbuissem, sicut feci, & facio vna cum Patribus Societatis, qui me comitantur. Peto etiam, atque etiam vt ipsi laborem hunc pene intolerabilem quem in hac vinea colenda, & propaganda sustinent, V. P. gratissimum esse intelligant. Profecto amor & caritas, qua omnia propter Deum alacriter sustinent,

me illis non parum deuinxit, quippe qui sine illis nihil effecissem, ab illis subleuatus, laborum ac molestiarum umbram quandam, quæ mihi tanquã tepido, & imperfecto nonnunquam obuersabatur, facile didici contemnere. Dominus illis præmium reddat in cælo, & illis V. P. benedictionem largam impertiat. Angamalæ Residentia cum omnium approbatione instituta est. Nec dubitet V. P. quin in Residentiis montani huius tractus tota versetur Christianorum salus. Hactenus Archiepiscopus. Quod autem dicit de approbatione omnium in Residentia Angamalensi in ipsa Archiepiscopatus sede instituta, intelligit de voluntate Reguli, & Magnatum, qui se se huic Residentiæ exstruendæ beneuolos exhibuerunt, & ipsi in omnibus his terris per totam oram Malabari cam, Patrum Residentias, & Ecclesias se exoptare significant. Neq; vero ipsi Lusitani minore alacritate, & studio huic vineæ antiquissimæ, ad perfectum cultum reducendæ incumbabant. Enituit in ea re singularis duorum Lusitanorum virtus. Quorum alter Rochus Mellus Pereira, qui Patribus se adiungens

gens non solum itineris comes, verum etiam expensarum largitor eximius fuit, muneribus quoque & officiis in Regum illorum studio, & gratia promerenda diligentissimus. Alter Antonius Guedes Morales, qui Vaipicotæ Collegium optima structura fundat, & iam pridem sua omnia Societati ad conuersionem gentium vir optimus consecrauit.

Collegium Malacense Sociorum numero auctum esse, ad V.P. anno superiore scripsi, idque non solum ad tuendam domesticam disciplinam, sed etiam quod inde ad vicina regna facilis sit traiectus. Acheni sane, & Sionis populi, & si (vt à fide dignis accepimus) nostrorum aduentum penitus non repudiant, tamen in præsentia multa sunt, quæ omnium opinionem à spe fructus faciendi excludunt. At in regno Cambogiæ omnia paratiora esse intelligo. Rex enim, & populus nostros ultro inuitant. Faxit diuina bonitas vt, V.P. adiuuante, multi operarii ad hæc, & alia regna, ad fidem conuertenda opportunè mittantur. Quæ de hoc regno narrantur, spemque nobis faciunt, ex sequentibus litteris V.P. cognosceret.

*EXEMPLVM LITTERARVM
Patris Emmanuelis Carualij Malaca.
Mense Ianuario anno. 1599.*

IN S litteris faciam certiore
V. R. de noua missione, quæ
hoc anno ad Regnum Cam-
bogiæ Collegio Malacensi ob-
lata est. Quamquam non dubito quin
hoc idem & P. Rector, & P. Christopho-
rus de Veiga, Maluccarum Visitator, pro
suo vterq; officio præstiterit. Verum cum
ego in spem venerim, me ex eorum nu-
mero futurum, quos V. R. ad ea loca sit
destinatura, ea omnia, quæ dum Malacæ
resideo, de illarum regionũ statu cogno-
ui, quæque cum Legatis à Rege Cambo-
giæ missis nuper acta sunt, paulo fusius ex-
ponere decreui.

Cambogia regnum est peramplũ, quod
promontorio Malacensi, & Peguensium,
ac Bengalenfium, regnis opponitur è re-
gione orientis, à septentrione habet Cau-
ci, nostris Cocincinam, ab austro regnũ
Sionis, medium inter Cambogiam, & Pe-
gũ; ab occidente alluitur mari. Flumen
habet, quod instar Nili totam regionem
quo-

quotannis statis temporibus inundat, à nostris Cambogiæ flumen dicitur. Ad regnum Cambogiæ eadem fere via nauigatur, qua ad Sinas. Nam soluentibus à portu Malacæ, & iuxta continentem recto cursu iter radentibus, ferè quintodecimo die nullo periculo ostium fluminis occurrit. Abundat regio oryza, pecore, capris, butyro, legumine: materiem habet ad vsum ædificiorum, & nauigiorum admodum accommodatam, beiuini magnam copiam, & alias merces non paucas. Aiunt, Cābogienses olim potentia & incolarum numero, vicinis nationibus præcelluisse. Verum à multo tempore, ex quo inter eos, & Regem Sionis bellum exarsit, maxime vero à viginti annis elapsis, ab exercitu Sionensi multis cladibus confecti, valde imminuti sunt.

Vltra regnum Cambogiæ, huius fluminis ortum versus, exstat alia natio gentis incultæ, & barbaræ, quos Laos vocant, qui iuxta fluminis ripas, & lacus ingentes, quos flumen efficit, in casulis ligneis, & magnis nauigiis vitam agunt. Protenditur enim hoc flumen ad mille & ducenta miliaria adeo vt eius ortum Cambogien-

ses ignorent. Verisimile est à regione septentrionali iuxta Sinarum, & Tartarorum fines oriri. Lai igitur, qui huius fluminis superiora loca obtinent, ante viginti annos rerum nouarum cupidi, & maris visendi studio allekti, ducentorum millium hominum coacto exercitu, secundo flumine ad oras maritimas delati, omnes ad vnum interierunt. Periit in hoc conflictu Cambogiæ Rex, qui res Malacenses, & Lusitanam Rempublicam magno semper amore & studio coluerat. Huic superstes fuit filius paruulus, qui etiã nunc regnat, iuuenis viginti annos natus, qui licet diu in Laorũ potestate esset, & multis incommodis circũseptus, ab ipsis Laïs, & à Lusitanis, atq; Hispanis adiutus, Deo fauente, patri in regno successit : & Sioniis pulsis, qui totum decennium ipsius regnum infestis armis inuaserant, tandem omnia ferè in potestatem redegit. Oppida sunt ibi maxima, templa, & delubra quamplurima cum suis Bonzis, more Iaponiorum & Sinarum, licet hi Deos suos minus superstitiosè colant. Populo ius dicunt Mandarini, sicut apud Sinas. Quos isti forma corporis, & oris specie non nihil superant,

perant, Pegusiis similes, quantum ex Legatis, & ipsorum famulis conicerelicit. Non defunt Lusitani, qui existiment, aurum, quod Pachinum Sinarum urbem regiam, asportatur, è Laorum terris provenire, quippe qui Sinis vicini sint. Fidem facit Lusitanus quidam, qui quo tempore Lai ad regnum Cambogiæ descenderunt, inter eos versatus est; hic testatur, se tantam aurearum bractearum copiam apud eos vidisse (nam his bracteis Lai pro monetis utuntur) ut earum permutatione Cambogienses multi, diuites euaserint. Laos ad Sinarum, & Tartarorum fines aiunt pertinere : nationem esse in multas gentes distributam, bona corporis statura, colore ad albedinem vergente: multos apud eos esse auri, atq; argenti laborandi artifices. Cum Sinis, & Tartaris tantummodo habent commercium.

Rex Cambogiæ iuuenis, qui nunc regno præest, suasu Iacobi Velosi Lusitani, quo erat his temporibus familiariter usus (vixerat enim Velosus multis annis in Cambogia, & Regi carus, & nostræ Societatis studiosus) huius, inquam, sua-

su, & cum Lusitanis ineundi commercii cupidus, anno huius sæculi nonagesimo octauo nauem, quam Iuncum vocant, cū Legatis & apparatu Malacam misit. Litteras ad Ducem Malacæ, & ad alios non nullos dedit, ad omnes etiam Religiosorum ordinum Prælatos, additis insuper muneribus in primis beiuini copia non exigua, orabat vt pacem, & amicitiam ab aliquot annis, propter assidua bella non satis cultam, & quasi obliuioni traditam, cum Rege Lusitaniæ, & Orientali eius imperio liceret renouare. Per Legatos summopere vrgebat, vt ex omnibus ordinibus aliquot Religiosos ad se mitterent, esse enim in tam amplo regno locum omnibus. Iacobus quoq; Velosus peninsulam, ad nouem milliaria in mare excurrentem, quam à Rege ob res bene gestas dono acceperat, & arce, bellicisq; tormētis bene munitam tenet, Lusitaniæ Regi se donaturū spondet, ea lege, vt è nostris aliqui ad ea loca mittantur, quos in illis regionibus maximo cum animarum lucro, diuino obsequio vacaturos affirmat. Addit Legatus, sibi à Rege & Veloso imperatum esse, vt Patres S. Pauli (quo nomine in toto fere Orien-

Oriente nostri ab omnibus nuncupantur) omnino mittendos curaret. Sine his aiebat, Regem in animum inducere non posse, vt sibi persuadeat, pacem cum Lusitanis firmam, ac ratam fore. Qua de causa Legatus in hanc curam magno conatu, & totis viribus incumberebat, vt saltem vnum quempiam è Societate secum ducere liceret.

Huic tam ardenti Regis, & Velosi, reliquorumq; Lusitanorum studio, cū quod maximè optabamus, sine V. R. consensu, imo & subsidio in tanta sacerdotum penuria satisfieri non posset, quod solum restabat, litteræ à nostris ad Regem, & Velosum rescriptæ sunt, gratorum animorum significatione plenæ, quibus spem faciebant, Patres omnino non defuturos quam primum facultas, quæ non nisi à Goa expectari posset, vertente anno daretur.

Hæc de legatione breuiter dicta sufficiant. Restat vt causas, quæ pro hac missione faciant, paucis exponam. In primis hac ratione Lusitanis cum Cambogiensibus quæ studiosius erit commercium, & indies magis stabile, & firmum reddetur.

Atq; hoc Lusitani omnes, qui in Cambogia commercium exercent, vno ore Regi iuggerunt, fieri non posse, vt pacem cum Malacensibus, & Indiæ Prorege ex animi sententia conficiat, nisi Patres Societatis penes se habeat.

Secunda ratio est, quod ea res magno solatio, & subsidio futura sit Patribus, & incolis Christianis, qui in Iapone sunt: tum quod Cambogiæ magna fertilitas Iaponicæ inopiæ facile subueniet: tum etiã quod hoc pacto qui in Iapone degunt, de rebus Indicis bis singulis annis certiores fient, hinc Sinis, inde Cambogiensibus diuersis temporibus ad ipsos commutantibus. Habent enim Iaponii Burgenfes frequens cõmercium cum Cambogiensibus. Et rursus Cambogienses Malacam appellunt mensibus Ianuario & Februario, quo tempore Goa nihil affertur.

Tertia & potissima ratio est, quod illud regnum latissime patet, gens ipsa affabilis & moribus ad fidem Christianam suscipiendam magis idoneis, quam vicini Sionii. Sunt enim gentiles, & à natura insitam simplicitatem adhuc retinent, quod non nullis nationibus non contingit, quæ ex
fre-

frequenti cū Europæis hominibus confortio, astutiores plerunque, & ferociores euadunt. Est porro ea terra Sioniis admodum vicina, vt illis Patres, qui in Cambogia fuerint, facile præsto esse possint, quacūq; oblata occasione, quæ nō defutura videtur, cum præsertim hoc tempore apud Sionios legatione fungatur vir quidam Lusitanus Iacobus Pereira Tibao, atque inde ad Iaponem nauigationem parat. Hactenus P. Emmanuel Carualius.

In regione septētrionali huius prouinciæ, quam Deo annuente hoc anno peragrarē decreui, quæ ad missionem Mongolicam spectant, prospere cuncta procedunt, & futuri fructus spem non contemnendam præstant. Quæ omnia quoniam satis fuse in litteris huius missionis annuis cōmemorata sunt, hic breuiter rem omnem ad quædam capita reductam, paucis perstringam.

Inter cætera, quæ nos ad missionem Mongolicam animum intendere cogunt, illud primum locū obtinet, quod suo diplomate Achebar, vulgo Mogor Rex, facultatē nostris concessit in Regno Cābatiæ Euangeliū prædicandi. In hanc missio-

nem destinati sunt Patres Antonius Machi-
adus, & Petrus Paes. Quæres fuit iu-
cundissima cum ceteris omnibus, qui fi-
dei Christianæ amplificationē exoptant,
tum vel maxime Goano Archiepiscopo,
qui eis ad hoc negotium promouendum,
facultates suas concessit, quæ in India sunt
amplissimæ. Et sane fructus, qui ex hac
missione speratur, non solum ad Lusitano-
rum animas deriuatur, verum etiam ad i-
psorum ethnicorum salutem redundat,
qui superstitionis quibusdam cæremoniis
mirum in modum addicti, si conuersi fue-
rint, non minore studio veram Religio-
nem colent. At humani generis hostis suo
more impedimenta multa obiecit, quæ
Patrū nostrorum profectionem hætenus
retardarunt; quibus, si Deo placuerit, se-
mel sublatis (vti speramus breui sublatum
iri) iter inchoatum perficient. Interea no-
bis non defuit Dei bonitas, quo inspirante
Lusitanus quidam primarius, qui Camba-
ietæ (ea est Cambaię Metropolis) merca-
turam exercet, promittit se Patribus o-
mnia necessaria largiturum: quod sane eo
minus mirādum videtur, quod etiam ipsi
gentiles quidam, quos Bancanes vocant,
qui

qui mercatores sunt, suam quoque opem nostris non defuturam recipiant.

Secundū illud est, quod de regno Xatai, quod latè in orientem tendit, multa narrantur, quæ nouā aliquam missionem videntur desiderare. Est autem Xatai (ut multis videtur) idem quod nostris Catai. De hoc regno scribit P. Hieronymus Xauerius in litteris datis septimo Calend. Augusti anno huius sæculi nonagesimo octauo, cuius verba sunt.

Mercator quidam, secta Mahometanus, ætate sexagenarius, dum ego cū Principe colloquebar, in Palatium ingressus, atq; interrogatus à Principe, vnde venerat, & qua via, respondit, se à regno Xatai per Mecham venisse. Mox affirmant alii, qui hunc cognoscebant, illum aureorum centena millia Mechæ in eleemosynas profudisse: atq; ipse à Principe interrogatus an ita esset, minime negauit, seq; ideo tantā sumam elargitū aiebat, quod senex esset & cito moriturus, & hæc secū auferre nō posse certo sciret. Interrogatus de statu regni Xatai, in hanc sententiā respondit, se nimirum tredecim annos in illo regno commoratum in vrbe Xambalū, nostris

stris Cambalù, quæ sedes est Regia; huius Regem potentissimum esse, habereque inditione sua ad mille & quinquaginta vrbes, atque harum non nullas ingenti ciuium multitudine refertas. Regem se, dixit, sæpe vidisse, quo cum nemo loquitur nisi per libellum supplicem, ipse vero nemini responderet nisi per eunuchum. Interrogatus mercator, quomodo in illud Regnum penetraffet, respondit, se, Regis Cayga-rensis Legati simul & mercatoris persona imposita, ingressum, atq; in prima ciuitate detentum esse à magistratu, quoad sciret quis esset, & quid quæreret: agnitis demum sigillis litterarum, quas afferebat, illico veredarium ad Regem profectum, & intra mensem reuersum, adeundi facultatem attulisse: quod facile fieri potuit mutatis, vt fit, subinde equis, quo fit, vt singulis diebus nonaginta, vel centum coffos decurrant. Singulis autem coffis singula milliaria Italica respōdent. In toto itinere nemo illi molestus fuit. maximā enim iustitiæ rationem habent, & latronibus minime parcunt. Gentem dixit esse colore candido, facie decora, barbibus oblōgis nec se hæctenus homines elegantiore corpo-

corporis forma vidisse aiebat, quos Rumis, vel Turcis anteponebat. Quod ad Religionem attinet, dixit esse Isauitas, id est Iesuitas; illi enim Christianis à Iesu, sicut nos à Christo, nomē imponunt. Interrogatus, an essent omnes Isauitæ, Nequaquam inquit, multi enim apud eos sunt Mussauitæ, id est, Iudæi, Mussam enim illi Moysem appellant: esse præterea multos Mahometanos. Rex (inquit Princeps) estne Mahometanus? Nōdum, inquit ille, at propediem futurū sperant Mahometani. Princeps, vt mihi gratificaret, iussit senem post aliquot dies ad se reuertere. Ego vero ante diem assignatum hominem rursus conueni, eumque interrogavi de lege, & religione illius gentis, affirmavit esse Christianos, seque cum illorum nonnullis familiariter egisse: Ecclesias multas habere, & in iis aliquot magnitudine prestantes: Imagines esse multas cum pictas tum sculptas, in primis Crucifixi effigies, quas omnes summa religione veneratur: singulis Ecclesiis suum præesse sacerdotem, quem valde obseruant & ei dona offerunt. Interrogavi, an haberēt Episcopū. Non bene intellexit quod quærerem, di-

xit tamen esse inter eos Sacerdotem ceteris dignitate superiorem, Sacerdotes cælibem vitam colere, scholas habere, pueros postea sacris initiandos instruere, atque hos omnes Regis impensis ali. Regem Ecclesias exstruere, vetustate collabentes reficere. Patres, inquit, pullis vestibus induuntur, & pileos gerunt vestris istis nō ab similes, sed maiores. Caput non aperiunt in salutationibus, sed manus carminatas ad pectus iunctas, ad caput eleuant. palliis quoque vtuntur, vestes quoq; habent rubras, quas reseruant in dies festos, & celebriores. Cæteri incolæ pro magna parte vestibus nigris induuntur, exceptis diebus festis, in quibus gaudent rubro. Dixit; sc Regem sæpe vidisse ad Ecclesiam procedentem, quia Christianus est: esse præterea multos vtriusq; sexus, qui in ædibus, à populi concursu separatis vitam cælibem, & quasi monasticam profitentur: alios esse, qui etiam domi inter priuatos parietes vitam cælibem colunt: gentem diuitiis abundare, multas esse argenti fodinas: Regem in præcipuis vrbibus reconditos habere thesauros: quadringentos habere elephantes, quos aiunt

aiunt Malaca asportari. A Pegù multos mercatores illuc per mare inuehi affirmabat, quod non alia via fieri posse crediderim, nisi per mare, quod Sinas, & Iaponios interiacet, atque hoc iter plerunque semestrem esse aiebat. Hæc (inquit Xauerus) summa est eorum, quæ mihi mercator ille narrauit. Ego vero existimo, omnium esse facillimum, Regis huius Achebaris opera in hac peregrinatione vti. Nam Lahore proficiscentibus prius Caximir, eiusdem Achebaris regnum occurrit. Hinc ad Regnum Rebat, quod Regem habet Achebaris peramicum, recta si contendes, eius litteris fretus, facile ad ciuitatem Caygarem peruenies, inde ad primam ciuitatem Xatai, quæ Christianorum est, paucorum milliarium interuallum exstat. Mihi quoque dum in Caximire agebam, nunciatum est, esse in regno Rebat multos Christianos, & Ecclesias cum sacerdotibus, & Episcopis. Ad hos ego è Caximire litteras scripsi tribus viis lingua Lusitana, & Persica: cum illi rescribent, faciam V.R. certiore. Lahore 7. Cal. Augusti anno 1598.

Post hæc Achebar ab vrbe Lahore re-
M cedens,

cedens ad ciuitatem Agram, Lahore trecentis miliaribus distantem versus hæc regna Decanica, id est australia, cum ingenti exercitu contendit, atque tanto apparatu, vt Regiæ supellectili, & ipsius Regis tentoriis vehendis octingenti elephantes cum septem millibus camelorum vix sufficerent. Neq; hoc mirum videri debet, cum solus is, qui Regi à secretis est, septingentos camelos, & septuaginta elephantes onerauerit. P. Emmanuel Pinerius Lahore in Ecclesia remansit. P. Xauerus, & Frater Benedictus Goes Regem comitantur. Eos Rex vltro se itineri, & eius obsequio offerentes, humaniter amplexatus iussit, vt pecuniam, equos, camelos, elephantes, & quæcunque alia desiderarent, secum tollerent, & illis respondentibus, vnum camelum sufficere, addit aulicus Regi carus, Imo duos accipiant; instat Rex, dentur quæcunque volent. Quare Regis famuli quatuor inuitis obtrudunt. Hæc Regis Achebaris expeditio, vicinos Reges magno terrore concussit, vtpote qui à vicino potentissimo non immerito sibi timendum censeant. Dum Rex Agræ remanebat, filium suum contra Decanum

num & terras Meliquij, in quibus est vrbs Ciaulum (nostris Chaul) quod Goa non amplius ducenta, & decem milliaria distat, cum quinquaginta hominum millibus misit. Ei nuper defuncto, alium filium subrogavit: cui ipse gladium suum, & in itineris expensas, quadringenta aureorum millia dedit. Nos hæc missa faciamus (quæ tamen Deo enixe commendanda sunt) vt ad nostras missiones redeamus.

De rebus regni Xatai P. Hieronymus Xauerius iterũ scripsit ab vrbe Agra Cal. Augusti anno 1599. se nimirum comperisse omnia, quæ nuper de Christianis Cataiani imperii scripserat, vera esse. Quod ad viam attinet, per Bengalam, inquit, nonnulli eam patere autumant: nimirum per regnum Garagatæ, qui terminus regni Achebaris est: iter vero expeditissimum esse per regionem Cabul, & ciuitatem Lahor: quam viam licet paulo longiorem, publicam tamen, & à mercatoribus tritam affirmant. In his ipsis literis refert Pater sermonem, quem cum Rege de hac missione habuit, quem ait fuisse eiusmodi. Domine Rex, Superiori

nostro indicatum est, in regno Xatai plurimos esse, qui Christianam religionem colant, de quibus propter locorum intervalla, & gentium interiacentium dissidia, à trecentis annis Europæi omnes nihil certi cognoscere potuimus. Impense cupit tres, aut ad summum quatuor sacerdotes illuc mittere, qui illis hominibus in iis, quæ ad diuinæ legis observationem pertinent, adiumento esse possint: nostræ enim vocationis est, quovis periculo posthabito, ad quamvis mundi plagam proficisci, & æternæ salutis legem, ac immortalis vitæ semitam mortalibus commonstrare. Respondit Rex, Rahat met Xodà, id est benedictio Domini super vos, atque alia quædam in laudem nostram effatus est. Ad hæc ego, R. V. scire dixi, in illam regionem nullam patere viam certiore, nec magis publicam, quam per regna ipsius Achebaris: velle scire an Regiæ celsitudini placeret, mitti huc aliquot e nostris, qui Regis auxilio illuc contēderent. Hic Rex, Veniant, inquit, ego legatum eo missurus sum, cum illo ibunt. Occasio sane optima, nam à Cambaia vsq; ad Cabul late dominatur Achè bàr. Inde itur
ad Ba-

ad Badaxam, cuius Rex in huius terris viuit, & tres filij eius nostri discipuli fuerunt; horum frater nunc ibi regnat: hoc pacto Achebaris opera usque ad fines Cataiæ iter patere, atque huius litteris munitos nullum non locum adire posse, comper-
tum est. Haëtenus Xauerus.

Tertium caput est, quod Pater cum Rege egit de facultate, quam ego petebam mittendi alios Patres, qui Lahore, & Agræ degentibus sese adiungerent: cui petitioni Rex libenter annuit, & diploma illico dari iussit; quod & Patribus Cataiā petentibus, & illic manentibus usui esse posset: atque in ipso diplomate in vrbe Cambaia omnia, quæ Patribus ad com meatum opus essent, donari præcepit. quod diploma cum signatum erit, ad me se missurum scribit.

Non arbitror fore iniucundum V. P. si altercationem, quæ Patri cum Rege fuit 17. Cal. Augusti eiusdem anni, hic interferam. Dixit Regi sibi negotiū esse, quod remotis arbitris tractare cuperet, si liceret. Rex parum à turba declinans, a motis circumstantibus stans interrogauit, quid vellet. Xauerus, qui ante duos annos illud

idem in mandatis habebat sic est exorsus. Domine Rex, à Superiore nostro litteras accepimus in hanc formã. Quando quintum iam annum apud Regem linguæ ediscendæ operam datis, non dubito, quin is vos iam probe intelligat. Quare Regiam celsitudinem obtestamini, vt qui nos ad se euocauit audiendi Euangelij causa, viderit nũc, quid velit, vt ego pariter sciam, quid de vobis statuere debeam. Imo nobis, inquit, Xauerius valde molestum est esse otiosis. Quare tu Rex non nos audis, sicut te auditurum dixisti, audire autem te æquum erat, qui temet veri inuestigatorem sagacem profiteris. Ego, inquit Rex, ingenue fateor, me audiendæ veritatis cupiditate adductum, vos vocasse, vt quod veritati & rationi magis consentaneum deprehẽderem, id amplecterer. At nunc Decanũ versus iter ingredior, prope Goam consistam. ibi me expediam, vt vos per otium audiam. Hunc sermonem in longius protrahens, eadem verba repetiit. Ego vos ideo vocavi, ego vos remotis arbitris alloquar, & exaudiam. Quid? cum Mahometani rerum potiebantur, num erat, qui Christum Deum esse dicere aude-

ret?

ret? illico morte multabant. nunc omnia tuta. Ego hoc ita esse confessus, Regi gratias egi, rogans vt nos aliquando audiret, id ipsi summo bono, nobis maximo solatio futurum. Rex se facturum promisit, & finem sermoni imposuit. Hæc Hieronymus Xauerius.

Nunc Patribus in subsidium, & solatium socios aliquot mittam, nō enim dubito, quin illorum opera in hac prouincia colenda, Deo grata sit. Deus enim lucem suam aliis impertit, vt conuertantur: alios ita emollit, vt iam minus de sua secta glorientur, de nostra lege maiorem in dies opinionem concipiant. Hoc anno die Natali Patres præsepium in memoriam, & honorem nati Saluatoris, admodum illustre Lahore construxerunt. ad hoc tanta frequentia omnes omnium ætatum, atque ordinum homines confluxerunt, vt viginti dies continuos ad tria, vel quatuor millia, pueri I E S V nati effigiem adorarent. In his quidam vir nobilis, puerum, quem eadem nocte, atq; eadem qua Christus natus est hora, vxor pepererat, præsepi obtulit, baptizari permisit, atq; ipse cum vxore catechumenus factus est. Non fuit

æque beata fors alterius matris Mahometanæ foeminæ, sed infantis in lucem recens editi adhuc beatior fors fuit. Hunc enim mater suo primum consensu, atque adeo rogatu, & precibus baptizatum, ipsa postea, vicinos & consanguineos petulanter infectantes non sustinens, irata veneno sustulit, quod cum lacte infantis ori ingessit in profesto Ascensionis. Infantulus in tetro illo, & miserando septemdecim horarum cruciatu, Christum nō loquendo, sed moriendo confessus, ante altare vitam finiuit in ipso Ascensionis die, qui à natiuitate quadagesimus erat, & à baptismo decimus octauus. Scripsit P. Emmanuel Pinerius, puerum postquam animam Christo reddiderat, tanta tamq; inusitata speciosi vultus gratia resplenduisse, vt beatæ animæ gloriā, quam ad Christum ascendens, erat consecutus, videretur iam vultu repræsentare.

Quod ad missionē Æthiopicam in terras Presbyteri Ioannis spectat, nulla quantumuis maxima nostrorum diligentia fieri potuit, vt vnquam ad regionē illam via pateret, tanta est Turcarum in finibus regni tuendis industria & vigilantia. Sunt
inter-

in terris illis plus minus mille Lusitano-
rum hominum filii, ac nepotes, extra non
paucos alios Catholicos, qui sponte ad fi-
dem reducti sunt. At postquam in hoc
incœpto & conatu, Patres Antonius Mō-
ferratus, & Petrus Paes in Arabicam cap-
tiuitatem inciderunt, destinatus est illuc
P. Abrahamus Maronita, quem V. P. Ro-
ma misit. is & si linguā Turcicam, & alias
nonnullas sciret, tamen à Turcis retentus
in ciuitate Delec, in portu insulæ Mazuç,
coram Præfecto occisus est, eo quod Ma-
hometem execratus Christianum se con-
fessus est, & ideo iter ingressum, vt Chri-
stianis succurreret, & quos posset, ad
Christum conuerteret. Quare Lusitani
antiqui, qui iam non amplius quinque
sunt, qui cum Patriarcha ad illas terras
iuerunt, ad nos scripserunt, se catholici sa-
cerdotis maxime indigere ad Christiano-
rum solatium & salutem, quod P. Fran-
ciscus Lopez, qui ex sociis Patriarchæ so-
lus supererat, è vita decessisset: tamen fieri
non posse, vt societatis sacerdos quispiam
sine euidenti mortis periculo, aut saltem
captiuitatis, in Æthiopiam euaderet: pos-
se tamen sacerdotem aliquem Indum sub

nautæ vestitu, facile ad ipsos penetrare. His litteris ad nos perlatis nonnulli è nostris alacres se nobis obtulerunt, ita ad omnia parati, vt nullum pro salute illarum animarum discrimen sibi pertimescendum putarent. Rem ad Proregem, & Archiepiscopum retulimus. fuit ea quidem Archiepiscopo iucundissima, qui ideo in Domo professa nostros pro concione laudauit, sumpta occasione ex illis sacræ paginæ verbis, Sequuntur agnum, quocunq; ierit. Quæro, inquit, qui mortis, & captiuitatis contempto periculo, Æthiopicam missionem prosequantur, non inuenio nisi Patres Societatis. Attamen re maturè deliberata, visum est Lusitanorum illorum consilio parere, & sacerdotem Indum mittere. Electus est P. Melchior de Sylua, nostri Collegii Sanctæ Fidei antiquus alumnus, grauis sacerdos, & bonus Theologus. Is in vrbe Dio conscensa nauis cuiusdam Saraceni, in habitu nautæ ad insulam Mazuæ, & oppidum Delet saluus peruenit. Hæc insula intra fauces Erythræas adducenta, & quadraginta miliaria Arquico oppido maritimo Abassini litoris obiecta, per angusto freto à continente

nente Aethiopiæ dirimitur. Hic sacerdos nulli cognitus, Turcarum turbæ se se immiscens, tanquam vrbis visendę causa, Arquicum ingressus, incidit in Abassinum quendam, qui olim Patriarchæ seruierat, & illuc litteras à Goa expectaturus aduenerat. Perfertur illico ad Lusitanos optatissimus nuntius. Illi summo studio, & alacritate sacerdotem accersunt. Peruenit ad eos sacerdos non sine vitæ discrimine, nam à Saracenis quibusdam cognitus, vix euasit: audiuit enim noctu inter se mustitantes, se nimirum istorum Christianorum audaciam satis mirari non posse, qui cum scirent alium sacerdotem (Patrem Abrahamum intelligebant) in simili conatu anno superiore occisum, tamen iterum idem iter aggredi ausi essent. Exceptus est Pater à Christianis maxima omnium lætitia & gratulatione in Tigarc oppido, in quo P. Patriarcha vitam egit, mortemque obiit, & reliqui Patres, qui illi successerunt, sepulti sunt. Lusitani immortales gratias Deo egerunt, qui ipsis catholicū sacerdotē reddidisset, sibi que ipsis de tanto bono gratulabantur: hospiti quoque, qui tot ac tantis Turcarum,

carum, & latronum periculis ereptus, saluus & incolumis ad ipsos peruenerat. Sacerdos statim ad ea, quæ officii sui erant, animum adiecit, multa deprehendit, quæ ipsi negotium facefferent. Christiani enim cum iam pridem catholicum sacerdotem frustra expectassent, desperatis rebus, cum Abasfinis Ichisinatidis contracta amicitia, & mutuis cōmerciis deuincti, paulatim errores & ritus parum catholicos imbibentes, sese ad illorum sectam magis, magisque aggregabant. Etiam Ecclesias Abasfinorum frequētare, & eorum sacramenta participare cogitabant. Iam liberos simul & circumcidebant, & baptizabant. Sabbathum cum die Dominico obseruabant. Diebus vetitis carnem manducabant, vigiliarum, & quatuor temporum ieiunia omittebāt. Contra, singulis quartis & sextis feriis ieiunabant. Hac legis Mosaicæ, & legis Græcæ commistione factum est, vt parum abfuerit, quin omnes à veris Christianis penitus degenerauerint. Quare Pater, vt hos abusus mature tolleret, & Christianis moribus, qui iam pene erant aboliti, populum denuo imbueret, præter alia in primis

mis calendarium Gregorianum, & constitutiones Archiepiscopatus Goensis publicè in mores, vsumque ecclesiasticum induxit. Catholici in tria oppida, à se inuicem nō parum distita, sunt distributi. Primus locus Tigare dicitur, qui multa prædia habet annexa, Ecclesiæ olim à Rege Abassino donata. Secundus locus est Dambea, nempe imperii Abassini sedes. Tertium Dai, Quare Tigarensis Christianis in doctrina catholica iam mediocriter instructis, scripsit Pater se reliqua loca lustraturum.

Illud autem præcipuū in mandatis habebat, vt accuratè perspiceret, an ad regnum Presbyteri Ioannis pateret nostris aditus, per fauces portus Melindæ: an potius per alium portum iuxta fauces maris Erythræi, qui Bai lur dicitur, Regulo cui-dam Dencali subiectum. Pater se comper-to habere scripsit, viam per portum Melindanum latronibus valde infestam esse, aliam vero per portum Bailur facile peruiam futuram, si eius loci Regulum muneribus & officiis placatum reddiderint. Atque hoc in statu rerum versatur bonus ille sacerdos, qui socios sibi mitti petit,
saltem

saltem aliquot suæ nationis, quibus faciliorem constat esse aditum in illas terras.

Redeo nunc ad missionem Vissanagorānam, siue Bisnagensem, cuius supra meminimus. Dixi Patrem Emmanuelem Veigam cum suis sociis expectare Regis adventum, qui ab expeditione Mandurena cum exercitu redibat, ut ad urbem Regiam contenderet, & in ea sedem Societati figeret. Cœptis affuit Dominus, ut ex ipsius litteris V. P. intelliget.

EXEMPLVM LITTERARVM

P. Emmanuelis de Veiga ab urbe regia

Chandegrino 14. Cal. Oct. an-

no. 1599.



Collegio urbis S. Thomæ pridie Idus Augusti P. Franciscus Ricius, & ego profecti perreximus ad urbem Chandegrinum. In hac urbe Rex Vissanagoræ imperii sedem tenet, in oppido nimirum naturæ loci munito, in cuius medio exsurgit arx, quæ aquis scatentibus abundat, ac propterea inexpugnabilis habetur. Secunda nocte postquam à S. Thomæ discessi-

cessimus, ad locum quendam venimus, cui nomen Triualur ibi in porticu fani cuiusdam, gentilica superstitione celeberrimi pernoctauimus. Quam non gratus fuerit Dæmoni aduētus noster, per ministros suos illico prodidit, vnus è Brachmanis, qui loco præerat nunciari iussit, ea nocte Deum foras cum pompa proditurum, qui nostrorum conspectum molestè laturus esset: quare vt confestim discederemus monebat. Respondimus, nullum alium hospitium nobis patere: idolo vero nō esse nos impedimento, quo minus in publicum deferretur, cū plateæ latæ, & compita complanata essent, nos vero in porticu manere. Illo adhuc urgente, & iam præira vociferante, Pater Ricius exsurgens, Obonis Reguli, atq; ipsius Regis nomen opponit, interminans etiam, ni taceret, quo ille audito, conticuit.

Post solis occasum effertur idolum in throno sublime, & octo baiulis portantibus in plateam prodit. Effigies illi parua, quæ trium palmorum longitudinem non superabat; indusium interius linteum, superiorem amictum ex serico rubro gestabat. Oris figuram per noctem discernere

nere non potui, nisi quod vultus nigredo, speciosis vestibibus discolor quodammodo cōspicuum reddebat, vestem & thronum multæ herbæ odoriferæ, & flores pingebant. Pompam vniuersam præcedebat elephas, seruitio idoli inancipatus. Hic album vexillum ingens in dorso ferebat, post hunc tres boues eiusdem idoli, quibus supersedebāt, qui tympana pulsabant. Post hos alii quam plurimi buccinatores, diuersarum formarum tubas, & cornua inflabant: alii enim cornua adunca septem palmorum, alii buccinas quasdā rectas oblongas, buccis inflatis quatiebant, alii tubis, quæ duodecim palmorum longitudinē æquabant, ita clangebant, vt fulcimine ligneo à femore exeunte, cum eas ori ad mouebant, vti necesse esset. Nonnulli grandibus conchis insonabant, cum quibus viginti plus minus tympanistæ permisti ibant. Hi cuncti nullo ordine, nullo tempore obserato, confuso atque aspero sono aerem, atque aures obtundebant. Hos sequebantur perpetua serie fœminæ triginta saltatrices, quæ idolī perpetuo obsequio se deuinxerant, quibus nubere non licet, atque hæ plerunque pudici-

dicitiā prostituunt. Ibant omnes vestitu eleganti, in auribus & monilibus ornatae. Prima vas æneum magnum cum lumine ferebat, reliquæ cum singulis lampadibus accensis sequebantur. Mulierum agmen claudebat idolum cum suis baiulis & sacrificulis, qui fani istius reditibus viuunt.

Hinc inde plebs vniuersa cum lucernis accensis, confertim incedebat. Hæc pompa per quatuor plateas ad quadrum concurrentes incedebat, quarum singulæ patebant in latitudinem pedes octoginta in longitudinem passus quadringentos, longa palmarum series æqualibus spatiis, platearum latera vtrinq; ambibat.

In reditu antequam delubrum ingrederentur, idolum in quadriuiū statuunt, ut ibi de more cæremonias, & ritus solennes peragerent. Locus erat columnis quadratis viginti palmorum altitudinis, affabre constructus, tectum lapideum columnis impositum. in medio idolū collocant. Nobis è Regione in porticu sedentibus, à magistratu indicitur, ut assurgamus, Deum nempe coram esse : minime obtemperantibus secundo denuntiatur,

N

ut

vt sedentibus Patribus saltem pueri surgant. Respondemus, pueros esse Christianos, Diis gentium non assurgere. Cum viderent nos obfirmato animo in sententia permanere, orauerunt, vt sileremus, quod vtiq; fecimus, illorum cecitatem sub silentio deplorantes. Vniuersa illa turba ter circa idolum gradiebatur. Hac cæremonia peracta longo agmine vsq; ad portã templi duplici serie incedebāt. E templo procedunt quatuor Brachmanes, qui idolum capitibus inclinatis venerabantur: hos quidam ministri sequebantur, è quibus vnus canistrum oryza cocta plenum capite ferebat, in cœnam scilicet idolo. Hunc ventilatores comitabantur, qui flabellis muscas arcebant. Cibo appposito duo ministri locum syndone cooperiunt, ne quis Deum manducantem aspiceret. Interea tubis, cymbalis, & tympanis magnus editur sonus: post paululum ablato velo, & amota oryza, ministri intro se recipiunt, prodit mox antistes, qui lingua peregrina egregia Dei facinora, & res ab eo præclare gestas alta voce decantat. Quo peracto in templum omnes redeunt. Quid ibi fecerint, nescimus, hoc vnũ scimus, quatuor horas

horas & eo amplius superstitiosis ritibus, & cæremoniis peragendis absumptas.

Non defuerunt, qui nobis interea problemata quædam, & quæstiunculas ponerent. Primum an essent dies boni, & mali, fausti, & infauti. Deinde an præscire quis possit, quoto quis anno vitæ curriculum sit absoluturus. Tertio quo genere mortis sit moriturus. Ea, quæ ad hæc respondimus, approbauere omnes. Vnus vt cæteris plus sapere videretur, hæc omnia se diuinatum recepit. Scis igitur (inquam) quot annos sis victurus, & qua morte moriturus? Hæc, inquit ille, in libello quodam meo scripta continentur. at ego cum aliorum fata legam, quæ ad me pertinent, legere nequeo. Quin igitur (inquam) alteri das, qui tua legat, vt scias? ille rubore suffusus, cum nihil occurreret quod responderet, omnibus risum mouit. Alii de Diis suis, & de mundi constructione, & fabrica inaudita quædam prodigia somniabant. Septem dicebant esse maria, vnum aquæ falsæ, aliud aquæ dulcis, aliud mellis, aliud lactis, aliud lactis in acorem iucundum, & pinguem spumam densati, quod Tairum vocant; aliud sacchari, aliud

butyri. Alii dicebant, terram nouem constare angulis, quibus cælo innitur. Alius ab his dissentiens, volebat terram septem elephantis fulciri, elephantes vero ne subsiderent, super testudine pedes fixos habere. Quærenti quis testudinis corpus firmaret, ne dilaberetur, respondere nesciuit. Quare horum opinionibus confutatis, ea quæ philosophia tradit, pro illorum captu in medium protuli: quibus illi assentientes, ac rationi cōsentanea æstimantes, ea quæ Brachmanes dicebant, tanquam falsa & inepta reiecerunt.

Postera luce iter prosequimur, & tandem decimo septimo Cal. Septemb. ad hanc urbem Chandegrinum peruenimus. Obo Regulus de nostro aduentu per nuntium certior factus, ædes quasdam pro tempore accommodari iussit, donec aliæ meliores pararentur. Vno aut altero die elapso, Obonem visitauius, is magnam vultu lætitiā præ se ferens, perhonorificè nos excepit. cathedra, serico villoso instrata vti noluit, sed super tapete discumbens, alterum nobis sterni iussit. Postridie ad Regem accessimus. Is quoque benignissimè nos excepit. Regi assidebat
Obo

Obo Regulus, & alius è magnatibus, Regis nepos. Saluatoris, & B. Virginis pictas effigies proferimus, quas ille vultu admodum læto, atq; intento animo contuebatur. Erat effigies B. Virginis, ex illo exemplari Romano transumpta, quod à S. Luca pictū accepimus. Huius imaginis non solum viuida colorū specie, & picturæ artificio, sed etiā multo magis iis, quæ à P. Riccio dicebantur, delectatus est. Post mutua duarū horarum colloquia, datis de more muneribus, nos humanissime dimisit. Velle nos in urbem sedem figere, sibi gratum esse, diuertis verbis affirmavit. O boni præcepit, vt quem in tota vrbe locum eligeremus, eum nobis confestim possidendum traderet Diplomata se concessurum promisit, quibus facultatem daturus esset omnibus, qui Christiana sacra susceperint, vtendi pristinis officiis, atque honores, dignitates, & magistratus, & bona quæuis retinendi, sicut in Paganismo retinebant. Harum omnium facultatum capita, quæ in folio syluestris palmæ scripta attulimus clara voce coram omnibus lecta, & recitata sunt.

Post hæc alios Palatinos, & magnates

N 3 non-

nonnullos visitauius. In his nepotem Regis, quem vocāt China Ragium, id est, secundum à Rege, qui ei in regno creditur successurus. Hic tanto nos cōueniendi desiderio tenebatur, vt ad se visitādum quodammodo inuitaret. Dum res nostras Palatini tam secundo cursu ferri cernunt, ipsi quoq; visitandi, & congratulandi officiis certare cœperunt. Duo quoque filii Obonis Reguli, solito illo equorum, & elephantorum comitatu ad ædes nostras venerunt; & antequā ingrederentur, diu multumq; imagines illas inspectando, oculos pascebant: & quasi hoc parum esset, orabant vt eas domum deferre, & vxoribus ostendere liceret. In charta cosmographica, quam Mappam appellant, immensi Oceani spacia, terrarum, mariumq; sinuosos tractus, atq; insularum diuersam magnitudinem, numerum, & situm accuratius obseruantes, maxima admiratione affecti, incredibilē perceperunt ex illa descriptione lætitiā, & voluptatem.

Facultate à Rege data Ecclesiæ extruendæ, arcem idoneam quærimus, quam vt in area & ambitu palatii nullo modo concedi posse compertum est, paululum
extra

extra eius muros locum elegimus satis accommodatum. Est enim intra urbem, & ab vno latere hortis & campis obiectus, solitudinem, & recessum promittit. Possidebat hunc fundum Regina, Obonis filia, quæ parentis hortatu nostris precibus libenter annuens, è vestigio Procuratorem misit, qui suo nomine Patribus quod vellet, possidendū traderet. Quare ad quintum Idus Septembris in fundi huius possessionem pedem posuimus, ad tertium Idus eiusdem mensis eo ad habitandum conuenimus. Antiqui habitatores nōnulli ad alia loca cōmigrarunt. Atq; hic nunc temporis huius missionis est status: quæ deinceps succedent ex litteris, quas via S. Thomæ missurus sum, V. R. cognoscet. Chandegrini 14. Calend. Octobris. anno 1599. Hæc P. Emmanuel Veiga.

Adiiciam & aliam epistolam breuem P. Francisci Ricii, quæ eiusmodi est. Perbenigne cum ab ipso Rege, tum à Regni Proceribus fuimus excepti. Vix dici potest, quanta animi voluptate inspexerint Domini Saluatoris imaginem, & B. Virginis aduocatæ nostræ, quæ pro materna pietate voluit, vt infra octauas suæ bea-

tissime Assumptionis aditus nobis in palatium pateret. quæ etiam deprecante factum est, ut Rex, & Proceres omni nos humanitate complecterentur, ut facultas concessa sit, Ecclesias ædificandi, crucerigendi, atque in toto hoc amplissimo imperio homines ad veri Dei cultum reducendi, saluis interim bonis omnibus, & officiis quibuslibet, & facultatibus, quibus ante baptismum gaudebant. Area quam Ecclesiæ construendæ elegimus ad Reginę pertinebat. Illam, Obonis patris commendatione fretus, visitavi in profesto Natiuitatis B. Virginis, sermoni internuntia fuit ancilla ostiaria. renuntiat illa Reginam, quamcūq; arcam, aut fundum Patres vellent, ad se pertinentem, libentissimo animo eis in perpetuum donare, atq; eiusdem possessionem post die se nobis tradituram promisit. Dilatamē res est usq; in diem tertium, eo quo postridie infaustum esse diem sacrifici dictitabant. Speramus tandem aliquando fore, ut omnes optime intelligāt, quam felix fuerit ille dies, quo B. Deipara Virgo in gaudium, & solatium vniuersi mundi in lucem edita est. Die igitur ad libitum
illorum

lorum constituto , misit Obo Regulus
ucem exercitus, Regina matronam. Hi
erbis & actibus solennibus, fundi posses-
ionem nobis tradiderunt. Mox quinquaginta
familiaë, quæ ibi habitabant, loco
efferunt. Atque hoc pacto iam in Vissa-
agorano regno, & regia sede habet Do-
minus Deus Domum, in qua adoretur, &
olatur, & diuinum offeratur sacrificium.
apum Regulum indies expectamus : is
bi venerit , de exstruenda in eius terris
cclesia, cum illo agemus. Delauaius, qui
z supremus militum Præfectus , ad Re-
em venit, vt de crimine quodam sibi il-
ato, se purgaret. Is quanquam in primo
ongressu non bene acceptus est à Rege,
amen iam videtur æquiore animo esse.
Per hos dies quingentis sclopetariis co-
nitatum, à Palatio redeuntem vidimus.
os vbi vidit, ad Brachmanes conuersus,
lixit, Ecce aduenere Patres, vt Ecclesias
ondant : parate vos, eritis omnes Chri-
tiani. Tunc temporis aperto tantum ca-
ite prætereuntem salutauimus. Pedi-
um suorum copias Regi ostendit, quos
ulgo dicunt quindecim milliũ numerum
xplere. Chãdegrini 14. Cal. Octob. 1599.

Hæc habui, quæ ad V. P. in præsentem scriberem de missionibus, in quibus nos summo cum ardore, & rei Christianæ promotione versantur in primis ipsi professi, qui non solum resident in locis pristinis, & antiquis Moluccarum, & Manaris insularum atque in oris Piscariæ, & Trauancoris, locis etiam Malabarium, & utriusque Salti Goani, & septentrionis, verum etiam omnibus fere novis missionibus destinentur. Profecti enim sunt, alij ad regna chebaris, alij ad regnum Cambaiæ, qui men expectant in propinquis locis (de enim tantummodo Proregis consensu alij ad Zamorinum in urbem Calicuti, qui præter eos, qui iam ibi erant, missi sunt duo cum Andrea Furtado Mendotio, militaris gloria præstante viro, qui cum hæc scripsi, in Cunalicam illam expeditione classem cum exercitu educebat. His ad missionem novam Angamalis, & Benlæ, quarum posteriorem aliorum duorum Patrum accessu auximus. addo etiam riapatanum, Negapatanum & Vissanagram. His omnibus locis nostræ Societatis homines, amplius ducenta, & septuaginta

Christianorū millia, qui ad centū, & sexaginta nouem Ecclesias pertinent, penes se catholica fide, & in doctrina ac morib. Christiano homine dignis, erudiendos habent. Quod autem attinet ad Iapōem, & Sinas, P. Alexander Valignanus, is V. Prouinciæ Visitator, ad V. P. suo impore scribet. Cæterum defuncto iam Gumbaco tyrāno, expectamus nuntios, litteras hoc anno admodum lætas: imo Iaponensem Procuratorem hinc anno quenti transmissurum. Tyrannus ille in vrbe Meaco graui morbo decumberet, quam primum D. Ludouicus, Episcopus Iaponēsis, & P. Visitator cum aliis tribus ad portum Nangasacqui applicissent, in ipso tempore graue deliquium assus, post aliquot dies extinctus est, atque vna cum illo restincta persecutio, quam à tot annis in Societatem, & Ecclesiam Iaponicam mouerat. Reliqua sciet P. ex P. Alberto Laertio, qui hoc anno Procuratorem à prouincia electus est. In loco, electus etiam secundo loco, Procuratori posset succedere, P. Franciscus Viera, quem pariter in Lusitaniam iam est mittere, vt certior esset Procura-

cura-

curatoris ad vrbein profectio. Cum duobus Patribus cuncta prouincia spe fore, vt P. V. ex istis prouinciis Europ mittat multos egregios operarios, tam præclara initia prouehant, & ardei animarum zelo nobiscū in gentium conuersionem incumbant. Quod reliquum est, ego & Fratres mei omnes, V. P. ceterorumque Patrum, ac Fratrum nostrorum sanctis sacrificiis, & orationibus nix commendamus. Goæ Oct. Cal. Ia in die festo S. Thomæ Apostoli Indiæ Patroni. Anno 1599.

V. P. Filius in Domino

Nicolaus Pimenta.

MOGVNTIÆ,
Ex Officina Typographica
IOANNIS ALBINI, Anno

M. DCI.

